

LUZAYIKISU YA YESU KLISTO



Kieleka matondo, mingi, Mpangi Neville.

Beno lenda vwanda.

² Mu banza ti ba tubaka kilumbu mosi, ti, “Mu kele na kyese ntangu ba ke tubaka na munu, ‘Beto kwenda na yinzo ya Mfumu.’”

³ Ntangu yayi, beto ke lomba lemvo samu ti beto kele ve na kivinga, to bisika ya kuvwanda, samu na bantu nyonso yina kele awa, mpe ya lendaka kuma mingi na sabala yina ke na kwiza, samu na bantu yina ke kwiza, na kuwaka lukutakanu.

⁴ Kasi ya kele samu na ntangu ya mutindu yankaka yayi kele samu ti beto ke . . . Na ntima ya munu Mpeve-Santu vwandaka me tula malongi yayi ya kundima, ti, “Dibuundu na kilumbu yayi zolaka kuzwa Nsangu yayi.” Samu, mu ke kwikila ti ya kele Bansangu ya Biblia ya kulutula ngundi, samu ti ya ke monikisa Klisto na kati ya Dibuundu ya Yandi na ntangu yayi.

⁵ Na yina, muntu ve lenda kuzwa lukwikilu to kuzaba yina bawu ke na kusalaka, to kisika bawu ke na kukwendaka, kana ti bawu kele na kima, na kima mosi samu na kuvwandisa mabanza ya bawu mpe lukwikilu. Na yawu, kana Masonuku ke monikisa Klisto na beto na bilumbu ya nsuka yayi, mpe nkadulu ya ntangu, ya ke sala beto mbote na—na kulunguka Yawu mpe kutala kisika beto kele.

⁶ Ntangu yayi, beto ke—beto ke lomba lemvo ti dibuundu ya beto kele nene ve, beto ke na kivuvu ti kilumbu beto ke kuzwa yawu.

⁷ Mpe ya kulutula, bilumbu yiya yayi me luta, mu vwandaka longoka na yayi na zulu ya kitini ya disolo ya—ya Buku ya Apocalypse, mu kotaka na bima yina mu banzaka ntete ve ti salamaka ya kieleka. Mpe ya me nata na munu nsatu ti, na manima ya kutala yawu, *Bansungi Sambwadi ya Dibuundu* yayi, mu ke zola kuzwa mutindu yankaka ya bandandani na kulakisa “Dibuundu ya kieleka mpe dibuundu ya luvunu,” kintwadi, mpe kaka na nzila ya disolo mpe Masonuku. Mutindu mbala mosi mu mekaka, na dilongi mosi, na kubakaka “Vinu ya kieleka mpe vinu ya luvunu,” yina kele na kati ya Biblia. Mpe beto kele . . .

⁸ Beto ke meka na kuzwa mwa bakiti, na yina mu ke na kubanza na bantu yina ke meka na kuvwanda. Mpe beto ke kwenda kuzwa, ke meka na kuzwa, mwa bakiti mingi, samu na kumeka na kufulusa bivinga na manima awa, mpe na ngaanda, mpe dyaka mingi na ziunga, samu ti beto vwandisa bantu mwa mingi na balukutakanu.

⁹ Ntangu yayi, samu na yayi, mu ke lomba na mosi na mosi ya beno yina kieleka zola bima yayi, na—na kwiza ntangu nyonso yina beto ke—ke tendula Yawu. Mpe mu ke ndimisa ve, to kusala yina mu me banza munu mosi. . . [Kisika ya mpamba na bande—Mu.] . . . kundimisa na. . . [Kisika ya mpamba na bande.] . . . Buku ya nene yayi ya Apocalypse. . . [Kisika ya mpamba na bande.] . . . Bansungi Sambwadi ya Dibuundu. Kasi mu ke na kutala kaka na Nzambi, samu—samu na kumonisa yawu na munu kaka na yina mu ke baka yawu.

¹⁰ Masolo ya ntama, yina kele ya. . . kubaka na bantu ya kulutula nene ya masolo bayina mu zaba. Mu me bumba na kati ya kivinga ya munu ya kutanga, malu-malu kaka yayi, pene ya milabu tanu to sambanu, *Les Deux Babylones* ya Hislop, *Livre Des Martyrs De Foze*, mpe babuku yankaka ya nene; mutindu Lukutakanu ya Ntete ya Nicée, pene ya babuku yiya na zulu ya yawu, pene ya ba-page nkama yiya na konso buku. Mpe kuna Lukutakanu ya Nicée, mpe masolo nyonso yina beto lenda kuzwa. Samu ti, na manima ya yayi, na bande manietiki, beto ke sonika mulabu na zulu ya Bansungi ya Sambwadi ya Dibuundu, samu na kufidisa na yinza nyonso, na bayina beto lenda fidisa, samu ti beto kele na bilumbu ya nsuka. Beto kele na nsuka.

¹¹ Mu me bakulaka yawu ntete pwelele ve na ntima ya munu tii ntangu ya bavoti ya nsuka, mpe kuna mu monaka kisika beto kele. Kuna Mpeve-Santu bandaka na kumonisa na munu, na—na kupesa malongi na bantu, mpe na kutula yayi na kisika. Mpe mu lenda sala yawu ve na mutindu ya kulunga, na dibuundu mutindu yayi. Mpe na yina kana mu vwanda mpe mu sonika kaka buku. . . Mu ke tala ti kana mu kwiza na chaire, mpe ntwadusulu ya Mpeve-Santu na kati-kati ya Miklisto kukwiza na zulu ya munu, samu na kusadisa munu, na yina mu ke vwanda mingi ya kulunga samu na kusonika buku kuna, na manima mu me baka yawu na bande, samu ti kuna beto ke kuzwa ntwadusulu ya yawu. Kieleka, na babuku, ya ke vwanda mutindu ya kusungika fyoti, samu ti, na kati awa, beto ke tulaka bima yina beto lenda tula ve na buku. Mpe kuna beto. . . Mpe beto ke bakaka ntangu mingi na kuvutukilaka beto mosi, to mutindu mu ke salaka. Mpe kuna, na buku, ba ke sungika yawu nyonso. Kasi beto ke meka na kuzwa yawu nyonso, na mutindu nyonso yina beto lenda, na ba-bande.

¹² Ntangu yayi, ba-bande, konso nkokila, babuku mpe nyonso yankaka, bampangi ya babakala ke basisa kaka yawu na ngaanda ya yinzo kuna.

¹³ Ntangu yayi, mu ke lenda ve konso nkokila, mutindu beto me kota beto mosi na kumeka samu na nkembo ya Nzambi, samu—samu na kunata Bansangu ya dibuundu ya sambwadi yayi, to Bansungi ya Dibuundu ya Sambwadi; na kubakaka konso nkokila, nsungi mosi. Mutindu, na Kilumbu ya ntete na nkokila, Ephese; na Kilumbu ya zole na nkokila, Smyrne; na

Kilumbu ya tatu na nkokila, Pergame; na Kilumbu ya yiya na nkokila, Thyatire; na Kilumbu ya tanu na nkokila, Sardes; mpe na Kilumbu ya sambanu na nkokila, Philadelphie; mpe Lumingu na suka mpe Lumingu na nkokila, ya Laodicée, nsungi ya dibuundu na kati ya yina beto ke na kuzingila. Na kupesaka disolo ya dibuundu ya ntete, mpe—mpe misoniki mpe bantu ya masolo, mpe bawanzio ya nsungi yango, mpe—mpe bansangu, mpe nzila ya dibuundu, bisika ya me lutila tii na ntangu yayi.

14 Mpe ya kele ngitukulu na kumona mutindu konso dyambu yina ba tubaka na ntwala na Masonuku yango kuvukana mbote na disolo, kaka kieleka, na kubanza na yawu. Ya yitukisaka munu mingi, ti, mazono, mu tangaka tii mu talaka mutindu ti meso ya munu vimbaka. Mpe mu basikaka mpe mu tubaka na kento ya munu, “Mu me lotaka ntete yawu ve kuvwanda mutindu yina.” Beno me mona? Wapi mutindu nene ya vwandaka!

15 Mpe ntangu yayi, ntangu yankaka, mu lendaka baka yawu nyonso ve na nkokila mosi, dibundu, nsangu na dibuundu. Mpe kana mu lenda manisa na yawu ve, na nkokila, na yina suka yina ke landa na ngunga ya kumi. Ba ke samuna konso nkokila, samu na bayina ke zola kukwiza mpe kuwa yina bikanaka ya yawu, samu ti beto ke, meka, na kubaka yawu na bande. Na yina mu ke kuzwa balukutakanu kubanda na ngunga ya kumi, na suka, tii na midi, na ntangu, samu na kumeka na kunata yawu, yina bikanaka ya nsangu, samu bawu kuzwa yawu na bande. Ve . . .

16 Beto samunaka ti ya ke vwanda ve na balukutakanu ya kubeluka ya nzutu, samu ti beto ke na kumeka na kuvwanda na nzila ya kutuba ya bapofesi ya Biblia. Mpe awa, beto vwandaka me kuzwa lukutakanu ya kubeluka ya nzutu kaka ntama mingi ve. Na yina na manima balukutakanu yayi me manisa, kuna beto ke kuzwa dyaka balukutakanu ya kubeluka ya nzutu awa.

17 Kasi ntangu yayi mu—mu zola kukumisa yayi kieleka pwelele, samu ti muntu nyonso kubambuka moyo, ti ntangu yayi, na awa, ya lenda zenga mpe kukatula, mpe kupesa beto nyonso kutekita ya nene. Kasi mu kele mfumu, ve samu—samu na kima kasi na kulonga Ndinga. Beno tala, kaka yina. Kaka—kaka kukangama kaka na Ndinga. Mpe bambala mingi ya lendaka, na bansungi ya dibuundu yayi, ya lendaka nata ntembe na dénomination ya muntu. Mpe kana ya sala yawu, ya ke zola kuvwanda ve na ngolo. Ya—ya ke tuba kaka yina Masonuku me tuba, mpe luzayikisu yina kele na munu na Yawu. Mpe kana beno banza ti mu kele na foti na yawu, na yina beno tula yawu ve na zulu ya munu, beno sambila kaka samu na munu ti Nzambi ke lakisa munu yina kele ya kulunga, samu ti kieleka mu zola kuvwanda ya kulunga.

18 Mpe kima yankaka dyaka, na kuzabaka ti kizitu yina kele na munu, na—na mutindu ya lukutakanu mutindu yayi, ti kulonga bantu, ti Mpeve-Santu ke sala munu mfumu ya bandinga yina

mu ke tuba na chaire yayi. Na yawu beno ke mona mutindu nene beto ke belama na yayi. Ntangu yayi, beto . . .

¹⁹ Mu zolaka kuzwa yayi na ngaanda na kisika mosi yankaka. Kasi, yawu na kuvwandaka malongi, kuna na ya beto . . . Kuna na balukutakanu ya kumwangisa nsangu, mosi na mosi ya beto kele na dibanza to—to mutindu ya kumona, to mutindu ya vwandaka na nzila ya nsungi, mpe beto kele na mabuundu ya beto mosi, mpe yina mabuundu ya beto longaka beto, mpe yina beto ke kwikila. Beto . . . Mu ke zolaka ve kukwenda na dibuundu ya muntu yankaka, to na kati-kati ya bantu mutindu yina, mpe kutuba kima yina kele ya kuswaswana na yina ba longaka bantu. Samu ti, na manima ya nyonso, mu me mekaka na kutuba pwelele ti . . .

²⁰ Kana muntu kele ya Katolika, mpe ti yandi ke na kusalaka na Dibuundu ya Katolika samu na mpulusu, yandi kele ya kuzimbana. Kana yandi kele Baptiste, ke na kusalaka na Dibuundu ya Baptiste, yandi kele ya kuzimbana. To muntu ya Pantekote, na kusalaka na Dibuundu ya Pantekote samu na kuvulusa yandi, yandi kele ya kuzimbana. Kasi . . . Dibuundu nyonso! Kasi kana muntu yina kele kaka ya kuvwanda na zulu ya lukwikilu ya bisalu ya kumanisa ya Klisto na Calvaire, yandi me vuluka, mu ke kipe ve wapi dibuundu yandi kele. Samu ti, “Na nzila ya lukwikilu beno kele ya kuvuluka, mpe yina na nzila ya lemvo.”

²¹ Ntangu yayi, bantangu yankaka, na kusalaka yayi, kuna mu ke banza, na mwa yinzo ya munu awa yina beto bandaka bamvula mingi me luta, kaka na kikunku ya nene ya matadi mpe nyonso, mpe ya kele mutindu ya kisika ya santu samu na beto. Beto ke yinaka yawu, ke yinaka kaka na kumona yawu kusoba, na mutindu mosi, samu ti yayi kele kisika Nzambi bandaka ntete na kukutana na beto, mpe na ntangu beto vwandaka ve na mabaya na yawu. Kasi ya me—ya me kuma na kisika ntangu yayi ti ya me kuma ya ntama, mpe beto ke na kutunga—ke na dikani ya kutunga awa, samu na kubaka kisika nyonso yayi ya dibuundu awa.

²² Ntangu yayi, tii kuna, mu ke tala ti ntangu mu ke vutukaka na bilanga ya kumwangisa nsangu, kisika mu zola ve kunyongisa bampangi mpe, to, na bansangu mpe nyonso yankaka, na yina ya ke pesa munu muswa ya kubasisa mabanza ya munu, awa—awa ya munu . . . awa na chaire awa. Mpe na yawu kana beno tuba, “Ba longaka munu fyoti mutindu yankaka,” mu ke . . . Mpe na yina, na yayi, beto ke bokila kaka muntu nyonso yina ke zola kukwiza. Beno me mona? Ya kele ve na muntu yina ke na kupesaka mbongo samu na yawu, to kima. Ya kele tabernacle awa. Mpe muntu nyonso yina ke zola kukwiza, beto ke yambaka kaka yandi mbote. Beno kwiza kaka. Na yawu mu ke lomba beno na kunata Biblia ya beno, na konso lukutakanu, mpe kunata kilapi mpe papié.

23 Mpe ntangu yayi, na milabu nyonso mpe nyonso, mu zolaka nata ve babuku nyonso. Na yawu mu sonikaka kaka, notikaka, ntangu nyonso, na zulu ya papié awa, mwa banoti mu bakaka na masolo mpe milabu, mpe nyonso yankaka, ti mu zolaka tanga kaka yawu na banoti awa, na kisika ya kuzwa buku mpe kubalula ba-page. Na mutindu nyonso, ntangu ya ke tala Masonuku, beto ke baka Biblia. Mpe na manima na mulabu, mu ke tendula; to na disolo, yina wandaka muntu yina sonikaka disolo tubaka na yawu, mpe nyonso yankaka. Na yina na... Kieleka, na ntangu ya ke kuma na kusala buku, mbote, kuna beto lenda bula yawu nyonso mbote kuna, mpe kusala yawu nyonso mbote.

24 Ntangu yayi, beto ke sala nyonso yina beto lenda na kubanda na ngunga ya mbote mpe kubasika na ntangu ya mbote landila mutindu beto lenda. Ya ke vwanda bilumbu nana, balukutakanu, Lumingu na Lumingu.

25 Na suka yayi mu ke banda na kapu ya 1te ya Apocalypse, ya Buku ya Apocalypse. Mpe Apocalypse kele ya kukabuka na bitini tatu. Mpe bakapu ya tatu ya ntete kele yina beto ke tala na bilumbu nana yayi. Na yina, nsungi mosi ya dibuundu lenda baka beto ngonda mosi. Kasi beto fwana tala bisika ya ngudi, mutindu beto lendaka bokila yawu. Na yina ntangu beno ke kuzwa buku, ya ke vwanda ya kusonama mingi, na bufyoti-fyoti.

26 Ntangu yayi, Apocalypse, bakapu tatu ya ntete, ke tala Dibuundu, na manima Dibuundu ke zimbana. Beto ke mona dyaka Yawu ve tii nsuka ya ntangu. Kubanda Apocalypse 1 tii 3, ya kele Dibuundu; Apocalypse 4 tii 19, ya kele Israël, yinsi; mpe 19 tii 22, ya kele nyonso zole, kintwadi. Mpe bampasi mpe malongi, mpe nyonso yankaka, na nsuka! Ya kele ya kukabuka na bitini tatu. Beto me mona? Mpe beto ke baka bakapu tatu ya ntete, yina ke tala Dibuundu, mpe nsungi ya dibuundu yina beto ke na kuzingila.

27 Ntangu yayi, na ntete, ya lendaka monana mutindu ya kuyuma samu ti beto fwana vutuka mpe kusala lufulu. Mu me sambila mpe me longoka, mpe me sala nyonso yina mu lendaka, samu na kumeka na—na kuzwa dibanza ya Mpeve-Santu, wapi mutindu ya kuvwandisa yayi, samu ti bantu ke mona yawu, mpe ti beno lenda, na kumonaka yawu, kuvwanda ya kulezima mpe ti ya kusala beno kubelama na Klisto, samu ti beto kele na ntangu ya nsuka.

28 Mpe ya kele kima mosi ya kuyituka, na yina mu wandaka longoka masolo, kutala mutindu dibuundu yango bandaka, mpe mutindu yawu kwendaka ntama, mpe yina salamaka, mpe na kumona mwa Nkuna yango ya Nzambi kutambula na mosi na mosi ya bansungi yango; kubasika nyonso, pene, na kisika mosi.

29 Ntangu yayi, mbasi na nkokila, beto ke banda, mpe ke vwanda—ke vwanda na kifikulu awa; kifikulu ve, kasi tablo, ti

mu zola mutindu kulonga yawu na tablo. Mu banza ti mulongisi ya lukolo ya Lumingu, mosi ya bawu, kele na tablo. Mu me mona yawu na manima. Mu ke lomba na mukengi ya yinzo na kunata yawu na zulu, kutula yawu awa na mantwala, samu mu longa na tablo yango, mpe kusonika na zulu ya yawu samu beno tala pwelele. Mpe beno lenda fikula yawu na zulu ya papié ya beno, mpe nyonso yankaka yina, mpe kubakula yawu mbote na yina beto ke nata yawu.

³⁰ Kasi mu zola kaka kutuba yayi ntete kubanda: Na kumona mbandukulu ya nsungi ya dibuundu, mpe kumona mutindu bantumwa, malongi, mpe bima yina bawu longaka, mpe misiku ya Biblia; mpe na manima kumona dibuundu yango, pene na nkonga ya zole ya bantumwa, mutindu ya bandaka na kukulumuka, ya kieleka, malongi ya kieleka; na nkonga ya tatu, kuvwanda ntama mingi; na nkonga ya yiya, ya me kulumuka na kukuma madidi ve tiya ve, dibuundu me buta dibuundu ya madidi ve tiya ve.

³¹ Mpe kuna Dibundu ya kifuluka na Mpeve! Na yina, mu ke tuba yayi na buzitu nyonso ya kinzambi na konso lukwikilu ya muntu. Kubanda mbandukulu, tii ntangu yayi, Dibundu ya mbote, ya kieleka me vwanda Dibundu ya pantekote. Ya kele kieleka. Nzambi me bumba Dibundu yayi.

³² Mpe ntangu yankaka mu ke kumiyufulaka, ntangu Yesu salaka remarque, tubaka, “Benoni vwanda na boma ve, mwa nkonga ya mameme, ya kele Tata ya beno yina me tala mbote na kupesa beno kimfumu.” Mu ntangu yankaka ke kumiyufulaka yinki ya zola kutuba, kasi mu me bakula yawu ntangu yayi.

³³ Sabala me luta beto kuzwaka lukutakanu na Shreveport, na Louisiane, lukutakanu ya kulutila kimpeve yina mu me kwendaka, na luzingu ya munu. Na Shreveport!

³⁴ Mu vwandaka . . . Mu kuzwaka bilumbu zole ya konze, mpe mu kwendaka na Kentucky na Mpangi Wood awa, mosi ya badiakre ya dibuundu, to ba-administrateur, na kisika, samu na kuzomba. Beto kwendaka na mfinda.

³⁵ Mu kubulaka mpadi ya ntete. Mpe mu tubaka, “Mu ke vingila kaka,” samu ti muntu mosi lutaka na mwa bayimbwa. Mpe mu tubaka, “Mu ke vingila kaka tii ntangu bampadi ke basika na mabulu. Bawu me kima na bayinti, na kati ya mabulu, mpe me bumbama ntangu yayi.” Mu tubaka, “Ntangu bawu ke basika . . . Mu ke vwanda awa mpe ke vingila.” Samu ti, kieleka madidi vwandaka mpe galasi, mpe makutu vwandaka tatika. Mpe, beno zaba, mipepe ya ngolo vwandaka bula na biwanda. Mu tubaka, “Mu ke vingila kaka tii ntangu bampadi ke basika.”

³⁶ Mu vwandaka me vwanda kaka, ti Mpeve-Santu tubaka, “Telama, mpe kwenda na kisika yina nge ke bokilaka ‘kiwanda ya muntu ya sport.’ Kuna Mu ke zonga na nge.”

³⁷ Mpe mu kwendaka na kisika yayi yina mu pesaka nkumbu ya “kiwanda ya muntu ya sport.” Samu ti, ya kele samu na yina mu pesaka biwanda yango nkumbu, munu mosi, samu mu zaba kisika mu vwandaka. “Kiwanda ya muntu ya sport,” vwandaka samu ya vwandaka. . . Mu kwendaka kuna mpe monaka bampadi kumi na sambanu ya kuvwanda na yinti mosi; mu kubulaka lutangu ya kulunga, bikaka yankaka ya yawu kuna, mpe kwendaka. Mpe beno tala sport, mutindu ya kusala. Na yawu kuna mu bokilaka yawu, “kiwanda ya muntu ya sport.”

³⁸ Mpe Yandi tubaka na munu, “Kisika yina nge ke bokilaka ‘kiwanda ya muntu ya sport.’” Ve yina Yandi bokilaka, kasi yina mu bokilaka.

³⁹ Na yina mu kwendaka na yintu ya kiwanda yango mpe me vwanda na yisi ya yinti ya chène ya mpembe, mpe vingilaka pene-pene ya ndambu ya ngunga mosi, mpe kima mosi ve kusalamaka. Mu me lala na ntoto, me fukama na ntoto, me tandula maboko. Kuna Yandi me zonza na munu.

⁴⁰ Mpe na yina Yandi salaka yawu, Bandinga yina Yandi monisaka munu, na Masonuku yayi kaka ti beto ke kuma na suka yayi, mu me monaka yawu ntete ve, na luzingu ya munu nyonso.

⁴¹ Mpe na yina ntangu mu kumaka na Shreveport, na Louisiane, kento mosi yina kele kento kele na makabu, nkumbu ya yandi kele Mama Schrader. . .

⁴² Bamvula mingi me luta, ntangu Wanzio ya Mfumu kukutanaka munu awa na nzadi, mbala ya ntete, mpe monikaka na kati ya Nsemo yina, mpe Bandinga yina Yandi zonzaka kuna; bamvula kumi na mosi lutaka, ntangu mu kwendaka na lukutakanu mosi, kento yayi kutelamaka mpe zonzaka na bandinga mpe tendulaka. Ya vwandaka mpova na mpova kima mosi na yina Wanzio tubaka.

⁴³ Mpe mwa kento mosi yayi, ntangu mu kwendaka na tabernacle na. . . to na kisika na Shreveport beto vwandaka, na Life Tabernacle, Mpeve-Santu me simba kento yango mpe tubaka mpova na mpova yina Yandi tubaka na munu kuna na mongo. Na manima Mpeve bandaka na kusala mpe kupesa ntendulu, na kutubaka na ntwala bima na nzila ya luzayikisu, na nzila ya profesi, bima yina ke salama na nkokila ya lukutakanu yina ke landa, mpe ata mbala mosi ve ti ya kondwaka.

⁴⁴ Ntete na yina, mwa kento mosi telamaka na lukutakanu, kento mosi ya Baptiste kwizaka kuna na kuzabaka ve yinki yandi zolaka sala. Mpe yandi telamaka na kati-kati ya lukutakanu mpe Mpeve-Santu kubwaka na zulu ya yandi, mpe yandi bandaka na kuzonza na bandinga, kento mosi ya Baptiste yina vwandaka ya Dibuuundu ya Ntete ya Baptiste ya Shreveport. Mpe na manima yandi zabaka ve yinki yandi salaka. Mpe kuna, ntete ti yandi tuba dyambu, Mpeve-Santu me pesa ntendulu, na tubaka, “MUTINDU ME TUBA MFUMU, ‘Na kati ya bangonda tatu, ya

ke vwanda na Mpeve ya Moïse, ya Élie, mpe ya Klisto, ke sala na tabernacle yayi.” Kuna ya salamaka, na mutindu ya kulunga.

⁴⁵ Bakala mosi ya Baptiste na Meridian, na Mississippi, na yina yandi bandaka na kutula diboko na réfrigérateur, samu na kubasisa kima na réfrigérateur, mpe Mpeve ya Nzambi kwizaka na zulu ya yandi. Mpe yandi zonzaka na bandinga, na kuzabaka ve yinki yandi vwandaka sala. Mpe ntete yandi kuzwa . . . bakula yina yandi vwandaka sala, Mpeve-Santu zonzaka dyaka mpe tubaka, “Kwenda na Shreveport, na Louisiane. Kisadi ya Munu ke tuba na nge yinki ya kusala.”

⁴⁶ Mpe yandi kwizaka kuna, tubaka, “Mu ke na kubakula yayi ve; ya me salamaka ntete ve.” Oh, la la!

Beto ke na kuzingaka kaka na bilumbu ya nsuka na ntuala ya Nkwizulu ya Mfumu.

⁴⁷ Mwa Dibuundu yango ke vwandaka ntangu nyonso ya bantu fyoti, Pantekote. Mu ke na kuzonzila ve na ba-dénomination ya Bapantekote. Mu ke na kuzonzila yawu ve. Kasi, bantu na kimbangi ya pantekote! Pantekote kele organisation ve. Pantekote kele kimbangi yina ke kwenda na muntu nyonso yina zola. Katolika, Juif, Prosélyte, ba-Méthodiste, ba-Baptiste, “Muntu nyonso yina ke zola, ti yandi kwiza.” Ya kele kimbangi yina muntu . . . Nzambi ke salaka ve na dénomination, to dyaka ti Yandi ke salaka na Bantu ya makanda mutindu dikanda to bantu. Yandi ke salaka na bantu, “Muntu nyonso yina ke zola.” Ti yandi vwanda mundele, mundombe, jaune, mbwaki; Méthodiste, Baptiste, Misyoni, Katolika, nyonso yina yandi kele, “Ti yandi kwiza,” muntu nyonso. Mu kele na nsayi mingi ti Yandi salaka yawu mutindu yina. Mu . . .

⁴⁸ Mutindu muntu tubaka kilumbu mosi, “Mu ke zola mingi kuwa Yandi kutuba yawu kulutila na kubokila nkumbu ya munu, “Ti William Branham kwiza,’ samu ti ya lendaka vwanda na William Branham mingi. Kasi ntangu Yandi ke tuba, ‘Muntu nyonso,’ mu *zaba* ya ke baka na munu.”

Na yawu ya kele mutindu beto lenda tala beto nyonso, “Muntu nyonso yina ke zola, ti yandi kwiza.”

⁴⁹ Ntangu yayi, mu zaba ya kele na bantu mingi awa yina ke na kuingila na ba-hôtel mpe ba-motel, bayina me katuka bisika na yinza. Beno me mona? Ya kele na bantu awa me katuka Irlande mpe bisika yankaka, bayina ke na kuingilaka na malaka yayi. Kasi mu lenda kaka tala yawu ve ntangu yayi. Mu zola kupesa ntangu ya munu na yayi, beno ke bakula.

⁵⁰ Ntangu mu ke katukaka na banzyetolo, na bunene mu ke vutukaka samu na kusolola—na kusolola na bantu, samu ti bawu kuzwaka malaka. Kasi na ntangu kaka yayi beto fwana bika yawu na lweka samu na Yayi.

⁵¹ Ntangu yayi, kaka kima mosi ntete beto banda na Buku yayi. Na mbandukulu ya vwandaka Dibuundu ya Pantekote. Dibuundu ya Pantekote me kwenda na ntwala na ngolo ya Mpeve mpe me sonika Buku ya Actes. Na nkonga ya zole, ya bandaka na kukulumuka, dibuundu kumaka ya misiku. Na nsungi ya zole ya dibuundu, ya vwandaka mingi ya misiku, kasi mwa Nkuna yango ya Pantekote landilaka na kukwenda, na kimpeve. Na manima yawu kotaka na kisika ya bansungi ya ndombi, pene ya bamvula funda mosi na bankama yiya mpe kima, ya mpasi ya ndombi. Mwa nsungi yango ya Pantekote landilaka na kuzingila na nzila ya yawu. Mutindu yawu vulusaka, beno yufula munu ve. Ya vwandaka diboko ya Nzambi, kima kaka yina zolaka sala yawu.

⁵² Samu ti, ba komaka bawu, na bapoto. Mpe bakaka babakala mpe balulaka bawu na zulu ya musisa, mpe bakaka kinsongini ya yinti mpe kotisaka yawu na makulu ya bawu, mpe bikaka bibulu, bayimbwa, kudya bawu na manima, kubasisa na bawu misopo, ntete bawu kufwa. Bawu bakaka bakento, zengaka mabene ya bawu, na kuzengaka mutindu *yayi*, dimene ya bawu ya bakala, mpe telamaka mpe bikaka kaka menga yina kubasika, tii luzingu ya bawu ke basika na bawu. Basisaka ba-bébé na bivumu ya bamama mpe pesaka bawu na kudya na bayimbwa mpe bangulu, na yina bawu vwandaka tala bawu. Na kutubaka ti ya kele Buklisto; kasi Biblia ke tuba, mpe Yesu tubaka, “Ya ke salama ti bawu ke kufwa beno, na kubanzaka ti bawu ke na kusalaka kisalu ya Nzambi.” Beno me mona?

⁵³ Mpe ntangu yayi kima yango syelumuka tii na nsungi yankaka. Kuna na nsuka yawu me basika. Kuna beto ke tala na yina dibuundu me basika na kusungika, yawu me kwenda ntama mpe ntama, katuka ntangu yina, mpe kwendaka ntama na Mpeve, kwendaka ntama na Mpeve, na kulandilaka na kukulumuka tii nsungi ya nsuka yayi kisika yawu kele ya kuyilama na kuvukana yawu mosi mpe kusala kizizi na niama.

⁵⁴ Kasi mwa Mpeve yango ke zinga na kati ya bantima ya bantu tii ntangu Yesu ke kwiza. Ya fwana vwanda. Beno simba yawu na dibanza.

⁵⁵ Beto ke fikula yawu na tablo, kubaka disolo mpe nyonso, mpe kulakisa beno ti ya kele kaka mutindu yina. Ti beno mosi, beno baka disolo, mpe beno tanga yawu. Beno mona yina Biblia ke tuba, mpe na manima yina disolo ke tuba. Beno mona kaka mutindu ya ke vukana kieleka mutindu yina. Oh!

⁵⁶ Ti beto nyonso kubaka kaka yayi ve mutindu ntangulu mosi, kasi ti beto baka na bukieleka, na bukieleka malongi ya Mpeve-Santu mpe kusambila, kilumbu mpe mpimpa. Ti kima ve kukanga beno na kusambila.

⁵⁷ Na kukotaka na kati, beto ke basisa baluzingu ya bantu yango ya nene ya ntangu yina kuna, mutindu bawu pesaka baluzingu. Beno ke mona mutindu beno me sala fyoti. Ya ke

salaka munu mosi nsoni bantangu yankaka, mutindu beto fwana kuzwa nyonso na mutindu ya pete-pete, mpe ti bawu kuzwaka nyonso na mutindu ya ngolo. “Bawu vwandaka yenga-yenga,” Paul ke tuba na Hébreux 11, “ya kulwata bilele ya bampusu ya mameme mpe ya bampusu ya bankombo, ya kutralisa mpasi mpe ya kunyokola, ya kukondwa nyonso.” Wapi mutindu kimbangi ya beto ke telama na lweka ya ya bawu? Wapi mutindu yawu ke telama na lweka ya yawu? Mpe ti beto fwana kuzwa nyonso na mutindu ya mbote.

⁵⁸ Ntangu yayi, kaka samu na buzitu, ntete beto zibula Buku, mu ke zola beto nyonso, bayina lenda, na kutelama kaka ntangu fyoti samu na kisambu. Ntangu yayi na bukieleka ya ntima ya beno, beno bokuta dyambu na kisambu samu. . . na Nzambi.

⁵⁹ Mfumu Nzambi, Kiyidiki ya mazulu mpe ntoto, Mfumu ya Luzingu ya Kukonda nsuka, mpe Mupesi ya nyonso ya mbote mpe ya makabu ya kulunga. Beto ke lomba Nge, Mfumu, na ntete, na kulemvokila beto na nyonso ya bakukipe ve ya beto, mpe masumu ya beto mpe bayimbi ya beto na ntwala ya Nge, mpe na ntwala ya mosi na yankaka mpe bayina kele muntindu beto.

⁶⁰ Ti mwa ntangu ya kuvukana yayi kuvwanda ve kaka samu na kupesa malongi na myoyo ya beto mosi, kasi ti ya vwanda samu na kulezima beto na mutindu mosi, mpe kutwadisa beto, tii beto ke kwenda tuba na bayankaka. Ti ya vwanda ntangu ya kubyala dyaka, na kuvukanaka na Nzutu ya kufuluka ya Klisto mpe kuvwanda ya kuvilama samu na Enlevement.

⁶¹ Tata Nzambi, ve na banzila ya munu mosi, na kuzabaka ti kisadi ya Nge, mpe bisadi nyonso yankaka, kele yina me kulunga ve na kusalu ya nene yayi. Na kubakulaka mutindu bantu ya nene, ya ntangu ya ntama, kubakaka na zulu ya bantima ya bawu na kumeka na kumonisa Yayi, to na kusala mulabu na zulu ya Luzayikisu ya nene; na yina beto ke bakula ti beto kele, ya kulutila bawu, bayina kele ya kulunga ve. Kasi Nge kele yina kele ya kulunga ya beto.

⁶² Mpe mu ke sambila, Tata ya Mazulu, ti Nge ke sala kima ya mutindu yankaka na kati ya ntangu yayi, ti Mpeve-Santu ke kuzwa lutumu na konso ntima. Vedisa bikoba yina ke zonza mpe makutu yina ke kuwa. Mpe na yina yayi ke manisa, mpe ti beto ke pesa yawu na Nge, ti beto luta nkotolo ya yinzo yayi, na kutubaka, “Ya vwandaka mbote samu na beto na kuvwanda kuna. Mpeve-Santu vwandaka me zonza na beto na yina beto vwandaka ya kuvwanda kuna. Mpe ntangu yayi beto me kanisa na kusala nyonso beto lenda na yina Bansemo ya nkokila ke na kulezima.” Pesa yawu, Mfumu.

⁶³ Ti, na kati ya lukutakanu yayi, babakala mpe bakento kubaka kusimba, ya malu-malu. Ti Nge telemisa bantu ke zonza na bandinga, bayina ke tendula bandinga. Ti Nge telemisa makabu ya profesu. Telemisa milongi, ba-pasteur, bansamuni,

nyonso, samu ti Dibuundu vwanda na malongi. Telemisa bamisionaire na kukwenda na bilanga ya kumwangisa nsangu kuna mpe na kunata Nsangu ya mbote ya nkembo yayi. Kisika nyonso yina Ndinga ke kwenda, ti Yawu kubwa na ntoto ya mbote, samu na kubutana bambala nkama, samu ti beto ke kwikila ti beto kele na nsungi ya nsuka. Nsuka me kuma pene pene.

⁶⁴ Pesa bima yayi, Tata. Mpe na zulu ya bima nyonso, Mfumu, na ntangu yayi, Nge sadisa munu, munu yina kele na nsatu. Samu ti mu me lomba yawu, na yina mu ke pesa munu mosi na Nge samu na balukutakanu yayi, na Nkumbu ya Yesu Klisto. Amen.

[Mpangi mosi ya kento ke na kuzonza na ndinga yankaka. Mpangi mosi ya bakala ke na kupesa ntendulu—Mu.]

⁶⁵ Nzambi ya Ngolo nyonso, Yina vumbulaka Yesu na lufwa, beto kele na kyese mingi na kuzaba ti Mpeve ya Nge kele na kati-kati ya beto. Yandi ntangu nyonso ke zonzaka kieleka mpe ata mbala mosi ve dyambu ya luvunu. Mpe ntangu yayi, Tata, siamisa dyaka Ndinga ya Nge na yina beto ke tanga, samu na nkembo ya Nge. Mpe ti ntima nyonso, mutindu Nge tubaka, “Kuwanda ya kukubama mpe ya kuyilama, samu ti kima mosi ke salama.” Ya lendaka vwanda ti bantu ke kuzwa malongi ya bawu ya nsuka samu na kusoba landila mambu yina bawu zaba ntangu yayi, na mutindu ya kulunga. Beto me tonda Nge, Nzambi ya Santu, na Nkumbu ya Mwana ya Nge, Mfumu Yesu. Amen.

⁶⁶ Beto baka ntangu yayi Buku ya Apocalypse, kapu ya 1te. Ntangu yayi, ya ntete, mu zola kutanga banzila tatu ya ntete ya Apocalypse.

Luzayikisu ya Yesu Klisto, yina Nzambi pesaka na yandi, samu na kulakisa na kisadi ya yandi bima yina fwana salama na ntangu fyoti; mpe yandi fidisaka mpe tubaka yawu na nzila ya wanzio ya yandi na kisadi ya yandi Jean:

Yandi yina pesaka kimbangi ya dyambu ya Nzambi, mpe ya kimbangi ya Yesu Klisto, mpe na nyonso. . . ya bima nyonso yina yandi monaka.

Kyese na yandi yina ke tanga, mpe bawu yina ke kuwa bandinga ya profesu yayi, mpe ke bumba mambu yango yina kele ya kusonama na kati kuna: samu ti ntangu me kuma pene-pene.

⁶⁷ Mutindu mu vwandaka me tuba na ntwala, ntangu yayi, na kati ya yayi beto ke meka na kusala mwa fyongonono ya Buku awa, na kulandaka masolo mpe nyonso yankaka. Mpe ntangu nyonso ntangu beno ke mona munu kutala na ba-page yina mu sonikaka awa, ya kele kima yina mu bakaka na milabu mpe nyonso.

68 Ntangu yayi, musoniki ya Buku yayi kele Jean, Santu Jean ya ntumwa, yandi sonikaka samu na nsungi ya bilumbu na ntwala (A). (B) Samu na bawanzio sambwadi ya bantangu ya kuswaswana sambwadi ya nsungi ya Klisto, nsungi kubanda bilumbu ya bantumwa tii Nkwizulu ya Mfumu. Mpe. . . ntangu yayi, bansungi ke monika na kulandasanaka, mosi na mosi, kubanda nzanguka ya Mfumu ya beto ti Nkwizulu ya Yandi dyaka. Konso nsungi ya dibuundu kele ya kulakisa landila mutindu ya yawu ya kimpeve. (E) Konso nsungi ya dibuundu lenda tala yawu mosi na nzila ya Masonuku ya yawu mpe na kuzonza ya kimpeve na bawu. Mutindu Mpeve ke zonza, nsungi nyonso lenda tala yawu mosi. Konso nsungi me pesa kimbangi ya Vinu ya kieleka ya Klisto, mwense ya Mayela. Mpe konso nsungi me pesa vinu ya kubwela, mwense ya kizoba.

69 Bantu ya masolo ke ndima, yayi kele luzingu ya Jean. Jean zingaka bamvula ya yandi ya nsuka na mbanza ya Éphèse mpe kufwaka kuna. Yandi vwandaka na kisanga ya Patmos, na ntangu yandi sonikaka Buku, ya Apocalypse. Ya vwandaka ve disolo ya luzingu ya yandi, kasi disolo ya Klisto na bansungi na bilumbu na ntwala. Beno me mona? Ya vwandaka profesi. Ve luzingu ya Jean, ve luzingu ya Klisto, kasi kupesaka profesi ya nsungi ke kwiza. Ya vwandaka ve bakuzonza ya profesi ya yandi; kasi, ba-visions ya nene, ya Mfumu. Ya vwandaka ve Luzayikisu ya Santu Jean ntumwa, kasi Luzayikisu ya Klisto Mfumu.

70 Ya kele Buku ya nsuka ya Ngwisani ya Malu-malu, dyaka ya ke tuba mbandukulu mpe nsuka ya kilumbu yankaka ya Nsangu ya mbote. Bantu ya mayele ya Biblia kele ntima mosi na yawu.

71 Mikanda na bansungi sambwadi ya dibuundu vwandaka ya kusonika, na mutindu ya profesi, samu na bansungi ya bilumbu na ntwala. Paul sonikaka na luzingu mpe nkembo ya mabuundu sambwadi yina vwandaka na kilumbu ya yandi. Jean sonikaka na luzingu mpe nkembo ya mabuundu sambwadi ya bilumbu na ntwala, ti Jean vwandaka tuba na ba-pasteur sambwadi to mizabisi mutindu mbala mosi na Miklisto nyonso na yisi ya bawanzio sambwadi yayi.

72 Ntangu yayi, Buku ya Apocalypse, ntangu yayi beto ke baka, na yina beto ke kabula kitini yayi samu na suka yayi mpe kitini yayi samu na nkokila yayi. Mpe beto ke meka na kubasika pene ya ngunga kumi na mosi to na kumi na mosi na ndambu, kima mutindu yina, mpe kuvutuka dyaka na nkokila yayi na ngunga ya sambwadi.

73 Ntangu yayi yina zola kutuba kapu ya 1te yayi. Nzila ya 1te, kieleka ya—ya ke na kuzonzila na Yawu mosi, samu ti ya kele Luzayikisu ya Yesu Klisto. Nzila ya 2, Santu Jean ntumwa kele musoniki mpe kisadi. Nzila ya 3, ba me tuba balusakumunu. Nzila ya 4 tii na 6, mbote na dibuundu. Nzila ya 7, nsamununu.

Nzila ya 8, bunene ya Bunzambi ya Yesu Klisto. Nzila ya 9 tii na 20, vision ya Patmos.

⁷⁴ Mpe, dyaka, banzila ya 14 mpe ya 15 ke lakisa bima sambwadi ya nkembo ya Yandi ya Persona ya Yandi. Oh, ya kele kitoko ntangu beto ke mona Klisto na kati ya bima ya Yandi sambwadi ya bumuntu ya . . . bima sambwadi yina ke sala bumuntu ya Yandi, na mvumbukulu ya Yandi ya nkembo.

⁷⁵ Ntangu yayi, yintu ke bangula muntu.

Luzayikisu ya Yesu Klisto, . . .

⁷⁶ Ya kele ve luzayikisu ya Santu Jean ntumwa, kasi Luzayikisu ya Yesu Klisto, Mwana ya Nzambi.

⁷⁷ Ntangu yayi, mpova na Grec ya *luzayikisu* kele *apocalypse*, yina zola kutuba “kumonisa.” Mpe mu bakaka mpova yango mpe vwandaka longuka yawu mbote. Ya zola kutuba, *apocalypse*, ya kele . . . Mutindu kisadisi-biteki, me sala kiteki ya nene, mpe yandi me fuka yawu na vwale. Mpe na manima yandi ke kwenda mpe ke pasula vwale yayi mpe ke monisa yina kele na yandi na manima ya vwale. Ya kele kumonisa.

⁷⁸ Mpe Buku yayi kele ve kumonisa ya, mingi, ya Persona ya Yesu Klisto. Kasi, kieleka ya zonzila na Bunzambi ya Yandi mpe bima sambwadi ya bumuntu ya Yandi, mpe dyaka ya bima ti Yandi kele, mutindu Nganga-Nzambi, Ntinu, mpe nyonso yankaka yina. Kasi ya kele kumonisa ya bisalu ya Yandi ya bilumbu ke kwisa na ntuala na bansungi ya Yandi sambwadi ya dibuundu yina ke kwiza. Ya . . .

⁷⁹ Ntangu Mfumu ya beto vwandaka na zulu ya ntoto, bilandi yufulaka Yandi, mpe bawu tubaka, “Mulongi, Nge ke vutula na ntangu yina kimfumu na Israël?”

⁸⁰ Mpe Yesu tubaka, “Ya kele na beno na kuzaba ngunga yango to ntangu.” Mpe muntu mosi ve ke zaba. Yandi tubaka, “Mpe Mwana,” na ntangu yina, “zabaka ve.”

⁸¹ Kasi na manima ya lufwa, ya luzikulu, mpe ya mvumbukulu, mpe ya nzanguka ya Yandi na Nkembo, Yandi kuzwaka na Nzambi bilumbu ya ntuala ya Dibundu. Na yina Yandi me vutuka, samu na kunata Nsangu yayi na Dibundu, mpe Nsangu yayi ya nkwezulu ya Yandi mpe nkadulu ya mabuundu ya Yandi na nzila ya Nsungi.

⁸² Yandi zolaka sala yawu ve ntete lufwa, luzikulu, mpe mvumbukulu ya Yandi, samu ti Yandi zabaka ntete ve yawu. Kasi beno me tala mutindu Masonuku ke tanga yawu awa?

Luzayikisu ya Yesu Klisto, yina Nzambi pesaka na yandi (Klisto), . . .

⁸³ Wapi mutindu ti Nzambi Tata pesaka Luzayikisu na Mwana ya Yandi Yesu Klisto. Mpe Yandi fidisaka wanzio ya Yandi na Jean, samu na kutuba bima yayi yina vwandaka; yina vwandaka,

yina kele, mpe yina ke vwanda. Oh, ya kele ya kuvwanda na mutindu ya kitoko!

⁸⁴ Ntangu yayi, na nsungi ya nene yayi yina ke na kwiza yina Jean monaka! Ntangu yayi, bayayi, Luzayikisu yayi kupesamaka na yandi, na mutindu kaka, samu na kulakisa lukanu kaka ya Klisto, yina Yandi ke vwanda mpe mutindu Yandi ke vwanda, na konso nsungi. Ya kele samu na yina mu tubaka, na suka yayi, beno bumba na dibanza ya beno Dibuundu ya kieleka. Dibuundu ya kieleka bandaka na Kilumbu ya Pantekote.

⁸⁵ Ya kele na ata muntu ya théologie, muntu ya mayele ya Biblia, to muntu ya disolo, yina lenda tuba ti ya bandaka na bilumbu ya nsungi ya Martin Luther, ya Wesley, ya Katolika, to nsungi nyonso yankaka. Ya bandaka na Pantekote. Yina vwandaka mbyekolo ya Dibuundu. Ya vwandaka mbandukulu. Na yawu, kuna, na kusololaka na muntu, beno telama na mwelo yango ya Pantekote, mpe bawu lenda kwenda kisika yankaka ve.

⁸⁶ Ya kele kaka mutindu kutula kalumbu na kati ya mfinda. Beno zaba kisika konso dibulu kele, na yawu beno me kanga yawu nyonso. Yandi ke vutuka kaka na mbangu na kisika mosi yayi kisika yandi kotaka.

⁸⁷ Mbote, ya kele mutindu, muntu nyonso ke zonzilaka na yina me tala mabuundu mpe bansungi ya dibuundu, mpe bisalu ya Mpeve-Santu, beno ke vutuka na ya ntete, na mbandukulu. Beno fwana vutuka kuna samu ti Nzambi kele ya seko, mpe Yandi kele Ngolo nyonso. Na yawu, Yandi na kuvwandaka ya seko, Yandi lenda sala kima ve *awa*, mpe kusala kima ya kuswaswana na yawu, na lweka *awa*. Yandi fwana sala konso ntangu mutindu Yandi salaka mbala ya yawu ya ntete.

⁸⁸ Mutindu Pierre tubaka, na kilumbu ya . . . ntangu Bantu ya makanda kuzwaka Mpeve-Santu, yandi tubaka, “Beto lenda yimina maza, na kumonaka ti bawu me kuzwa Mpeve-Santu mutindu beto salaka na mbandukulu?”

Yesu, ntangu Yandi vwandaka na zulu ya ntoto, zonzaka mpe tubaka, “Ya . . .”

⁸⁹ Muntu mosi kwizaka mpe tubaka, “Ya kele ya kulunga samu na beto, na kukatula bakento ya beto na makwela samu na dyambu mosi?”

⁹⁰ Yesu tubaka, “Yandi yina salaka bakala, salaka kento. Ya kele samu na yina bakala ke . . .”

Yandi tubaka, “Kasi Moïse pesaka beto muswa ya kupesaka mukanda ya kufwa makwela.”

Yesu tubaka, “Ya vwandaka ve mutindu yina na mbandukulu.”

⁹¹ Beno vutuka na mbandukulu. Na yawu, kana beto ke zonzila na nsungi ya dibuundu, beto fwana vutuka na mbandukulu,

na kutulaka na lweka nsamanunu nyonso yina muntu mosi me sonikaka na nzila ya nsungi.

⁹² Yayi kele Buku ya kulutila lutumu na kati ya Buku nyonso na Biblia. Yayi kele Buku kaka yina Klisto tulaka kidimbu ya Yandi na zulu. Yawu ke banda na lusakumunu mpe ke suka na nsingulu. “Kyese na yandi yina ke tanga.” Mpe, “Ya kusinga kele yandi yina ke katula kima na Yawu.”

⁹³ Ya kele Buku kaka yina Klisto sonikaka, Yandi mosi, na Biblia nyonso. Yandi sonikaka Balutumu Kumi, na musapi ya Yandi. Ya kele kieleka. Ba-Juif me kangamaka na yawu. Mpe, bubu yayi, ya kele Apocalypse.

⁹⁴ Mpe kana Satana ke yinaka Buku mosi na kati ya Biblia, ya kele Apocalypse. Ya kele na zole. . . Yandi ke yinaka Masonuku nyonso, mpe ya kele kikubudi ya muvimba ya Masonuku. Kasi, kana kima, yina yandi ke yinaka mingi, kele Apocalypse mpe Genèse. Samu ti, Genèse ke tubila na mbandukulu. Apocalypse ke monisa yina ke salama na yandi na kilumbu ya nsuka. Ba ke kanga yandi bamvula funda mosi; na manima yandi, mpe profete ya luvunu, mpe niama, ba ke losa bawu, ya moyo, na kati ya Dyanga ya Tiya.

⁹⁵ Mpe yandi ke nwanisa Buku ya Genèse samu ti yawu kele—yawu kele kieleka. Yandi ke tuba, ti, “Yawu kele kieleka ve.” Mpe yandi ke kwamisa mabanza ya bantu. Beno tala mbote kisika dyabulu kele, Buku yango ya Genèse to Buku ya Apocalypse, ya ntepe mpe ya nsuka.

⁹⁶ Mpe Buku ya Apocalypse kele na bidimbu mingi na yawu kulutila Babuku nyonso yankaka na Biblia. Ya kele na bidimbu mingi samu ti ya kele Buku ya profesu. Ya kele Buku ya baprosesi. Na yawu ba fwana bakula yawu na nzila ya mutindu mosi ya bantu ya baprosesi. Buku yayi kele ve ya muntu nyonso. Na mpasi, ya kele na muntu yina lenda bakula yawu. Ba salaka Buku yayi samu na mutindu mosi ya bantu. Kuna na Deutéronome, Ya ke tuba, “Bima ya kubumbama kele ya Mfumu.” Ya kele kieleka. Mpe Yandi ke monisaka na beto, bana ya Yandi, bima ya kubumbama. Na yawu ya ke kwenda ve. . .

⁹⁷ Dibanza ya nsuni lenda bakula bima ya nene yayi ve ya Masonuku, samu ti ya kele bulawu samu na bawu. Kasi samu na bayina ke zolaka Ndinga ya Nzambi, ya kele samu na bawu ba sonikaka Buku, na Dibuundu. Luzayikisu ya Yesu Klisto, “Na dibuundu ya Éphèse, na dibuundu ya Smyrne, na dibuundu, na mabuundu,” tii na yisi. Luzayikisu ya Yesu Klisto na Dibuundu. Mu zola yawu.

⁹⁸ Mpe beno tala, ya kele mpe nsuka ya Masonuku, nsuka ya nyonso. Mpe ya kele ya kutula landila géographie na lweka ya bakala, na nsuka ya Biblia. Luzayikisu ya kima nyonso kele ya kutula na manima awa na lusakumunu na bayina ke tanga Yawu mpe ke kuwa Yawu, na nsingulu na bawu yina ke bwela to ke

katula. Ya kele kikubudi ya muvimba, oh, ya kieleka. Kima ve ba lenda bwela na Yawu. Mpe ntangu muntu ke meka na kukatula na Yawu kima, to kubwela kima na Yawu, Nzambi tubaka Yandi ke katula ndambu mosi yango na Buku ya Luzingu. Beno me mona? Yandi ke katula ndambu ya yandi na Buku, kana yandi bwela kima mosi na Yawu.

⁹⁹ Na yawu, ntangu beto ke mona ya mutindu na mutindu ya Luzayikisu ya Mfumu ya beto, nani Yandi kele, yina Yandi kele, kana muntu ke bwela kima na Yawu to ke katula kima na Yawu, ya kele profesi ya luvunu. Bantu mingi mekaka na kutuba ti bawu kuzwaka kima mosi na manima ya Yawu. Kasi Yawu kele Luzayikisu ya muvimba ya Mfumu Yesu na kati ya nsungi ya dibuundu ya Yandi mpe na Kilumbu ya Yandi, Luzayikisu ya Mfumu ya beto.

¹⁰⁰ Ntangu yayi—ntangu yayi, *kulakisa*, na mpova ya Grec, ya kele kima yina ba bumbaka, kukondwa kumo-... “ke monisa” Klisto.

Ntangu yayi, na nzila yina ke landa, beto ke tala, na nzila ya 2.

¹⁰¹ Nzila ya 1te ke na kulakisa Klisto, Luzayikisu, to kumonisa. Oh! Mutindu nsungi ya nsuka mpe Nkwizulu ya Mfumu vwandaka ya ku-...vwandaka ya kubumba, na bantumwa! Bawu yufulaka, kasi kaka mosi zingaka samu na kuzwa Luzayikisu. Mpe dyaka, yandi bakulaka yawu ve, samu ti disolo kusalamaka ntete ve.

¹⁰² Ntangu yayi, disolo ya Buku yayi, to dibanza ya Buku yayi, vwandaka samu na mabuundu sambwadi na Asie Mineur, yina vwandaka na ntangu yina. Ya vwandaka samu na mabuundu sambwadi yango. Ya vwandaka na mabuundu mingi kulutula basambwadi yina, na kilumbu yina. Kasi mosi na mosi ya mabuundu yango vwandaka tuba na yina me tala nkadulu ya dibuundu yina, yina zolaka tambula na yawu nsungi nyonso, nkadulu ya dibuundu yina. Mutindu Éphèse, ya vwandaka na nkadulu. Smyrne, Pergame, mpe tii na yisi, Philadelphie, mosi na mosi ya mabuundu yango vwandaka na nkadulu ya yawu, ya ke monika dyaka na bansungi ke kwiza. Oh! Kana beno lenda kaka...

¹⁰³ Muntu nyonso lenda mona kusalama ya kimpeve ya Masonuku mpe lendaka tuba ti bawu vwandaka ve ya kutwadisama? Kaka bisalu ya beno, kaka bamitifi, kaka balukanu ya bantu, beto tala, ya ke lakisa ti Masonuku kele ya kutwadisama, na kumonaka mutindu Nzambi ke nungisa bima yango. Kaka yina beno ke salaka, *awa*, kele kifwanusu ya kima mosi.

¹⁰⁴ Mutindu Abraham ke pesa na munkayulu Isaac, mwana mosi ya yandi; kifwanusu ya Nzambi yina pesaka Mwana ya Yandi, bankama ya bamvula na ntwala. Mutindu ti ba tekaka Joseph

mpe na boloko, ya kuyina na bampangi ya yandi kasi ya kuzola na tata ya yandi; Yesu, na kifwanusu. Mutindu Mpeve salaka na nzila ya Joseph, muntu, mpe fwanikisaka kaka luzingu ya Klisto, na mutindu ya kulunga. Mutindu, David, Mwana ya David kuvwandaka na mongo mosi. Ntangu ba mangaka David mutindu ntinu mpe yandi mataka na mongo, na Mongo Ya Olive, yandi talaka na manima, dilaka, mutindu ntinu ba mangaka; nkama fyoti ya bamvula na manima ya yawu, Mwana ya David mataka mongo yango mosi, mutindu Ntinu ba mangaka, mpe dilaka na zulu ya Jérusalem. Mpeve na bifwanusu mpe na mitindu. Oh!

105 Na yina beno lenda mona Dibuundu ya nene ya pantekote na kilumbu ya nsuka yayi? Beno lenda mona mutindu Nzambi salaka mbyekolo ya yawu na Kilumbu ya Pantekote? Mpeve yina zolaka vwanda na kati ya Dibuundu na nzila ya bansungi nyonso.

106 Bawu kumaka ya misiku mpe ke kipe ve. Bawu zolaka kuzwa dénomination. Bawu zolaka vukisa dibuundu mpe yinsi kintwadi, mpe na nsuka bawu salaka yawu mpe nataka bankama ya bamvula ya kutalisa mpasi. Na manima, Kusungika, bawu basikaka. Mpe konso mvula, bawu vwandaka katula na Mpeve mpe vwandaka bwela ya yinza, na kukatulaka ya Mpeve mpe na kubwelaka ya yinza, tii ntangu yayi bawu kele kaka ya kuyilama na kusala dyaka yawu. Beto ke na kuzingaka na bangunga yayi, ya nsuka, ya nsuka ya dibuundu. Beto kele na Philadelphie . . . to na Nsungi ya Dibuundu ya Laodika.

107 Ntangu yayi, kapu ya 1te, nzila ya 1te, kumonikisaka na—na Jean. Ntangu yayi, nani kele musoniki? Jean. Jean. Ya vwandaka ve luzayikisu ya Jean, mpe beto zaba ti ya vwandaka ve, samu ti ya vwandaka Luzayikisu ya Mfumu Yesu Klisto. Yandi vwandaka yayi, yandi vwandaka ya kusola samu na kuvwanda kilandi. Mpe Buku Yawu mosi ke monisa kima yina ya vwandaka, Yesu Klisto, na nani Yandi vwandaka pesa luzayikisu.

108 Mpe ya vwandaka ya kufidisa na . . . “Mpe tubaka yayi na nzila ya wanzio ya yandi na Jean.” Beto zaba ve nani wanzio vwandaka. Biblia ke tuba ve nani wanzio vwandaka. Kasi beto zaba ti ya vwandaka profete, samu ti Biblia ke tuba na ntuala, ti, “Munu Yesu me fidisa wanzio ya munu samu na kupesa kimbangi ya bima yayi yina fwana salama na ntangu fyoti.”

109 Na manima beto ke tala ti ntangu Jean bandaka na kusambila wanzio, wanzio tubaka, “Tala kusala yawu ve.” Apocalypse 22, mu banza ya kele. Mpe yandi tubaka, “Samu ti mu kele mpangi ya nge ya kisalu mpe ya baprofete.” Ya lendaka vwanda Elie. Ya lendaka vwanda mosi ya baprofete. Jean vwandaka ntumwa. Kasi profete yayi ba fidisaka yandi.

110 Mpe Jean, na kuvwandaka ntumwa, beno tala nkadulu ya mikanda ya yandi yankaka, ya ke lakisa ti ya vwandaka ve Jean yina sonikaka yawu, samu ti ya kele ve na nkadulu ya mutindu ya Jean. Beno baka ya Ntete ya Jean, ya Zole ya Jean, nyonso yankaka, mpe beno tanga yawu. Mpe beno tala na nkadulu ya yawu, na manima beno tala na nkadulu ya yayi. Jean vwandaka musoniki mpe vwandaka ntumwa, kasi yayi kele mpeve ya profote. Ya kele muntu ya kuswaswana, na muvimba. Beno me mona? Ya vwandaka ve bisono ya Jean. Ya vwandaka ve luzayikisu ya Jean. Ya vwandaka Luzayikisu ya Nzambi ya Yesu Klisto na mabuundu. Mpe ya vwandaka . . . Jean vwandaka kaka muntu yina sonikaka, musoniki, mpe—mpe Buku ke tuba mutindu mosi.

111 Ntangu yayi, ya vwandaka ve samu na Jean. Ya vwandaka samu na Dibuundu. Mbote mingi. Jean, na ntangu yina, vwandaka pasteur ya dibuundu ya Éphèse. Mpe ntangu yayi Buku kele samu na Jean . . . to samu na dibuundu, na Jean ve.

112 Ntangu yayi na nzila ya 3, Yandi ke samuna lusakumunu. Beno kuwa yayi.

Kyese na yandi yina ke tanga, mpe bawu yina ke kuwa bandinga ya profesu yayi, mpe ke bumba mambu yango yina kele ya kusonama na kati kuna: samu ti ntangu me kuma pene-pene.

113 Wapi ntangu yina me kuma pene-pene? Ntangu bima yayi ke salama, ntangu Luzayikisu yayi ya Yesu Klisto me nungama na konso nsungi ya dibuundu.

114 Ntangu yayi ya kele samu na yina Yandi sonikaka yawu mutindu yayi. Kana yandi tubaka, “Mbote, ntangu yayi, Yandi . . .” Bawu vwandaka vingila Yandi; kana ya vwandaka ya kumonisa, kana Yandi . . . ya zolaka vwanda ya kumonisa na Jean, ti Yandi zolaka kwiza ntangu kaka mabuundu yango kuna zolaka kuma na nsuka. Ya kele mutindu Jean banzaka yawu. Kasi kana ya vwandaka, mabuundu yango, na ntangu kaka ya zolaka kuma na nsuka, yawu . . . Kana yandi zabaka, kana ya vwandaka ya kumonisa na yandi ti ya zolaka vwanda na bansungi ya yinda sambwadi ya dibuundu, ya mafunda mingi ya bamvula, to bankama mingi ya bamvula, na yina ya zolaka vwanda ve na dyambu ya kuingila. Bawu zolaka zinga kaka nsungi ya bawu ya dibuundu.

115 Na yawu, Nzambi zonzaka yawu, mpe ya vwandaka ve ya kumonisa na bawu. Ya vwandaka ve ya kumonisa na Martin Luther, bima yina John Wesley zabaka na yina me tala Masonuku. Ya kele ve ya kumonisa na ba-Baptiste, yina bantu ya Pantekote zaba na yina me tala Masonuku, samu ti ya kele na nsungi yankaka. Ya kele ntangu yankaka. Mpe Nzambi ke monisaka kaka bima ya Yandi na nsungi. Oh!

116 Beno lenda kukuna ve masangu na printemps mpe kubuka na ntangu kaka mosi. Beno ke kukuna nkuna mpe ya ke kula tii kuyela. Nzambi ke kunaka Ndinga ya Yandi mpe na manima Yawu ke banda na kukula. Mpe kuna beto ke tala manima mpe ke tuba, “Kuna Yawu vwandaka.” Mbote, kieleka, beto ke mona Yawu na manima ba me monisa Yawu.

117 Ntangu yayi, “Kyese,” Ndinga, nsamununu ya lusakumunu, na nzila ya 3, “na bayina ke tanga to ke kuwa mansweki ya yawu.”

118 Ke sala . . . dibanza ya nsuni ke kimaka yawu, samu ti dibanza ya nsuni zaba kima ve na yina me tala yawu. Kukondwa ntembe dibanza ya nsuni zaba yawu ve, samu ti ya kele Satana na kati ya dibanza yango ya nsuni. Mpe ba ke lakisa Satana, mpe Satana zola ve ti ba lakisa yandi.

119 Beno ke tala mutindu boma ya kele samu na Satana ntangu yandi ke banza ti ba ke lakisa yandi? Beno tala mbote na lukutakanu mosi. Beno tala mbote nkadulu ya bantu. Beno tala mbote, na lukutakanu. Ntete kaka ti ba lakisa Satana, na zulu ya muntu mosi, beno ke mona kizizi ya bawu kusoba. Beno me mona, bawu zaba ve yinki ya kubanza. Na mbala mosi, Mpeve-Santu ke kulumuka mpe ke lakisa dyabulu yango. Oh! Yandi ke yinaka mutindu yango ya lukutakanu. Ya kele samu na yina beto me kuzwaka mutindu mvita, samu ti Ndinga ya Nzambi ke lakisaka dyabulu. Beno me mona? Ya ke tubaka yina yandi kele.

120 Mutindu kutuba, “Kento yayi ya kuvwanda awa,” na yisi ya ntwadusulu ya Mpeve-Santu, kutuba, “nkumbu ya yandi kele Ma Jones. Yandi me katuka na kisika *yayi-mpe-yayi*.” Yinki ya ke sala? Yina ke simba mpeve ya yandi, ke zangula yawu na kisika mosi.

121 “Wapi mutindu nge me zaba munu? Muntu yina zaba munu ve, na yawu ya fwana vwanda mpeve mosi. Wapi mutindu ya mpeve ya kele?”

“Ya kele Mpeve ya Nzambi.”

“Wapi mutindu? Wapi dyambu na munu?”

122 “Nge ke na tuberculose, cancer,” nyonso yina ya kele, “kasi MUTINDU YAYI ME TUBA MFUMU . . .”

“Oh!” Oh, mutindu Satana yina yawu, samu ti Yawu ke lakisa yandi.

123 Ntangu yayi, dibanza ya nsuni ke tala, ke tuba, “Ya kele kutanga ya mabanza, *télépathie mentale*.” Bawu zaba ve. Ya kele bulawu samu na bawu.

124 Kasi na bayina zaba yina Yawu kele, oh, wapi lusakumunu! Yinki ya kele? Luzayikisu. Luzayikisu ya nani? Ya muntu na chaire? Ya Yesu Klisto na nsungi yayi ya dibuundu ya nsuka, na kumonisaka Yandi mosi mutindu Yandi silaka ti Yandi zolaka sala. Beno me mona?

125 Ya kele luzayikisu, beno me mona, mpe Satana yina yawu. Oh, mutindu yandi ke yinaka yawu! Ba ke lakisa yandi, ba ke lakisa dikani ya yandi. Satana ke yinaka Apocalypse mpe Genèse, mu me notika yawu awa. Ya kele kaka kieleka.

126 Ntangu yayi, samu na yinki yandi ke yinaka luzayikisu? Samu na yinki yandi ke teleminaka mingi luzayikisu? Ya kele samu ti kikubudi nyonso ya Ndinga ya Nzambi mpe Dibuundu ya Nzambi kele kaka ya kutunga na zulu ya luzayikisu.

127 Ya ke vwanda ata mbala mosi ve na nzila ya lukolo, ata lutangu ya baseminere ya mbote yina kele na beto. Bawu kele mingi na manima ya nsungi ya mpimpa. Biblia mpe Dibuundu kele kaka luzayikisu.

128 Beto baka, mu kele na mwa Masonuku ya kusonama awa. Matthieu, kapu 16 mpe nzila ya 18. Beto tala kaka fyoti—fyoti na Matthieu 16:18, kumona kisika Masonuku kele, kisika ya kele luzayikisu. Na kukulumukaka na mingo, na nzila ya 17.

Mpe Yesu vutulaka mpe tubaka na yandi, Kyese na nge, Simon mwana ya Jonas: samu ti nsuni mpe menga ve me monisa yawu na nge, kasi Tata ya munu yina kele na mazulu.

Mpe mu ke tuba . . . na nge, . . . nge kele Pierre, mpe na zulu ya ditadi yayi Mu ke tunga dibuundu ya munu; mpe myelo ya difelo ke nunga yawu ve.

129 Ntangu yayi, dibuundu ya Katolika ke tuba, “Yandi tungaka yawu na zulu ya Pierre.” Mbote, yina, kieleka yina kele dibanza ya nsuni. Beno lenda banza ve dibanza ya kimpeve kubakula kima mosi mutindu yina; mutindu Nzambi, na Mwana ya Yandi Mosi ya kutelama kuna, mpe dyaka ke tunga Dibuundu ya Yandi na zulu ya muntu, ya mpamba, ya mbala mingi, yina butamaka na disumu. Muntu yango lakisaka yawu. Yandi, na mpeve mosi yango na zulu ya yandi, yandi vwendaka Yesu mpe mangaka Yandi kaka na kizizi ya Yandi. Ya vwendaka ve Pierre.

130 To, dyaka ti ya vwendaka ditadi yina vwendaka kuna, mutindu mabuundu yankaka ke tubaka ti ya vwendaka. Ya vwendaka ve ditadi. Samu ti, Pierre. . .

131 Ditadi yina Yandi vwendaka zonzila kuna, vwendaka ve Pierre, to dyaka ti ya vwendaka Yandi mosi.

132 Ntangu yayi, mingi ya bantu ya Misyoni ke mekakaka na kutuba, “Ya vwendaka Yesu. Ya vwendaka na zulu ya Yandi ti Yandi tungaka Dibuundu. Yandi!” Ve, ya kele dyaka ya luvunu. Kana beno tala, ya vwendaka ve Yesu, to dyaka ti ya vwendaka Pierre. Ya vwendaka luzayikisu.

. . . nsuni mpe menga ve me monisa yayi na nge, kasi Tata ya munu yina kele na mazulu me pesa luzayikisu yayi.

133 Beno tala. Mu zola kuyufula beno. Na nsaba ya Eden, ya vwandaka na ata Masonuku ya kusonama. Mpe kuna babakala zole yayi, Caïn mpe Abel, mpe bawu zole vwandaka zola kusala munkayulu mpe kuzwa lemvo ya Nzambi. Na yina bawu salaka mutindu yayi, Caïn kwizaka mpe tungaka autel; Abel tungaka autel. Mbote, kana yina kele nyonso yina Nzambi ke lomba, Nzambi ke vwanda ya kulunga ve na kufundisa Caïn. Mbote mingi. Na yina Caïn salaka munkayulu; mutindu mosi salaka Abel. Bawu zole salaka munkayulu. Caïn sambilaka, mpe mutindu mosi salaka Abel. Caïn salaka nyonso yina Abel salaka.

134 Na yawu kana kukwenda na dibuundu, kuvwanda ya dibuundu, kusala munkayulu, mpe kusambila, mpe kukembila Nzambi, kele nyonso yina Nzambi ke lomba, na yina Nzambi ke vwanda ya kudedama ve na kufundisa Caïn na kusalaka kieleka yina Yandi tubaka na kusala.

135 Kasi, beno me mona, Abel, na nzila ya luzayikisu, yandi zabaka ti ya vwandaka ve mbuma yina salaka bawu kubasika na nsaba ya Eden, mutindu mabanza mingi ya nsuni ke banzaka bubu yayi. Abel kwizaka mpe pesaka munkayulu ya mbuma ya ntoto, mpe Nzambi mangaka yawu, kasi ya vwandaka ya kumonisa. . . mu zola tuba, Caïn salaka, beno lemvokila munu. Caïn pesaka munkayulu ya mbuma ya ntoto samu ti yandi banzaka ti ya kele yina basisaka bawu na nsaba ya Eden. Beno tala mbote luzayikisu yango. Beno tala mbote luswaswanu na yawu. Beno tala mbote mutindu yawu ke nyongisa bubu yayi. Kasi ya vwandaka ve mbuma yina basisaka bawu. Eve kudyaka ata mbala mosi ve ba-pomme. Kieleka. Wapi mutindu yandi bakulaka ti yandi vwandaka kinkonga, kana na kudyaka pomme? Ya ke na kutala na luzingu ya kuvukisa banzutu. Ya fwana vwanda yawu!

136 Ntangu yayi, beto ke baka yawu mutindu leso, beto talaka yawu, mpe beto ke vutukila yawu. Ba kele na ata Disonuku mosi.

137 Bayankaka ya bawu ke tuba, “Mbote, yandi tubaka, ‘Mu me kuzwa mwana na Mfumu.’” Yinga, tata. Mutindu mosi ke salaka ndumba. Nzambi kele yina ke salaka luzingu nyonso.

138 Kasi ya kele luzingu ba me bebisa. Beno tala na nkadulu ya mwana ya bakala yina. Yandi vwandaka ya papa ya yandi, dyabulu; muntu ke yinaka, muntu ya yimbi, muntu ke kufwaka bantu. Beno me mona?

139 Mpe na yina wapi mutindu, Abel, ntangu bawu. . . kukondwa ntembe bibuti ya yandi tubaka na yandi ti—ti bayinti vwandaka na bambuma na zulu ya yawu, mpe nyonso yankaka yina. Kasi, ya vwandaka ya kumonisa na Abel. Abel kwendaka mpe bakaka mwana - dimeme, samu na menga, na kubakaka luzingu. Yinti ya bambuma ve, yina ke pesaka ba-pomme mpe mankondo mpe ba-poire. “Kasi Abel, na nzila ya luzayikisu ya kimpeve,” Hébreux 11, “pesaka na Nzambi munkayulu ya kulutila mbote. Nzambi

pesaka kimbangi ya yawu, samu ti ya vwandaka ya kumonisa na yandi na nzila ya lukwikilu.”

140 Ya kele kisika Nzambi tungaka Dibuundu ya Yandi. “Samu ti nsuni mpe menga ve me monisa yayi na nge.” Ata mbala mosi ve longokaka Yawu na seminere. Muntu ve longaka Yawu na beno kisika. “Kasi Tata ya munu yina kele na mazulu me monisa Yawu na nge.” Kuna, nyonso kele na zulu ya luzayikisu, Dibuundu ya mvimba, “Na zulu ya ditadi yayi ya Luzayikisu ya Yesu Klisto, Mu ke tunga dibuundu ya munu.”

141 Beno lenda baka yina pasteur ke tuba. Beno lenda baka yina seminere ke longa. Beno lenda baka yina dibuundu ke tuba. Mpe Kasi dyaka, ya kele ve ya kulunga. Beno lenda kutendula yawu na mutindu ya mbote. Kasi tii ntangu Nzambi ke monisa na beno ti Yesu Klisto kele Mwana ya Yandi, mpe ti beno kele ya kuvuluka na nzila ya Menga ya Yandi; na zulu ya luzayikisu yina, ti, “Yandi kele Mvulusi ya munu.”

142 “Na zulu ya ditadi yayi Mu ke tunga Dibuundu ya Munu, mpe myelo ya difelo lenda nunga yawu ve.”

143 Na yawu kuna beno ke mona samu na yinki Satana ke telemina mingi Buku ya Apocalypse. Nyonso yina kele ya kumonisa, luzayikisu ya kimpeve, Satana ke teleminaka yawu. Ya kele samu na yina yandi ke teleminaka mingi kisalu ya kulonga bubu yayi. Samu ti, yinki ya kele? Luzayikisu ya Klisto.

144 Ti dibuundu landila na ba-dénomination ya yawu ya nene mpe ba-organisation, mpe bansangu ya bawu ya fyoti ya kitoko mpe nyonso yankaka yina. Ti bawu landila, Satana ke kipe yina ve. Bawu ke kuzwa ata bankwamusu ve. Muntu nyonso ke tonda bawu na manima.

145 Ntangu kuna ke kwiza ntangu yina Nzambi, na nzila ya Mpeve-Santu, ke monisa dyaka Klisto na kati ya Dibuundu, na ngolo mpe bakumona ya kubeluka ya bimbevo, mpe kusala bidimbu yina Yandi tubaka ke tambula na mikwikidi, kusalama, kuna Satana ke vutuka na mbeto ya yandi. Yandi ke sala kima mosi samu na yawu. Tii ntangu yina, Satana ke kipeke ve lutangu ya mabuundu beno ke kwendaka. Yandi ke kipe ve lutangu. Kasi ntangu Klisto ke monikisa na beno ti Yandi kele Mwana ya Nzambi, mpe bisalu yina Yandi salaka beno ke sala mpe; mwa bisalu yankaka ve, kasi bisalu ya mutindu mosi.

146 “Yandi yina ke kwikila na munu. . .” Santu Jean 14:7 “Yandi yina ke kwikila na munu, ke sala bisalu yina Mu ke salaka. Ke sala bisalu mutindu mosi, mpe kulutula nene na yayi.” Samu ti, Klisto zolaka longa ve mbotika ya Mpeve-Santu, ya zolaka vwanda nene mingi. Yandi zolaka nata yawu ve na bawu, samu ti Mpeve-Santu vwandaka ntete ve ya kupesa. Kasi ntangu Yesu kwizaka mpe pesaka munkayulu ya Luzingu ya Yandi, mpe ti Mpeve-Santu me vutuka, kuna ba lendaka kupesa Luzingu ya Seko na bantu. Ya kele yina kele “ya kulutula nene.”

147 Kasi bidimbu mpe mambu ya ngitukulu, Yesu tubaka pwelele, na Mark 16, “Beno kwenda na yinza nyonso, mpe beno longa nsangu ya mbote na konso kivangu.” Tii wapi sika? Yinza nyonso. Na nani? Na konso kivangu. Yinda mutindu Nsangu ya mbote ke longama, bidimbu yayi ke landa na bawu yina ke kwikila. Mpe ntangu yawu ke kuma luzayikisu, mpangi, kuna beno me kuma pene-pene na Kimfumu. “Na ditadi yayi Mu ke tunga Dibuundu ya Munu, mpe bankotolo ya difelo lenda nunga yawu ve.”

148 Samu ti, bakala to kento yina me vwandaka ntete yandi mosi na manima ya ntoto yango ya kuyuma, mutindu vwandaka Moise, mpe ti luzayikisu ya Nzambi me talana na yandi na nzila ya Mpeve-Santu, ya kele ve na kima mosi lenda ningisa yandi. Yandi kele kaka ya kutelama mbote mpe ya ngolo mutindu yandi lenda vwanda.

Satana ke yinaka Luzayikisu. Yandi ke zolaka yawu ve, ata fyoti ve; yina ke mwangisaka makani ya yandi.

149 Nkadulu ya Buku ke lakisa ti Jean sonikaka yawu ve. Ya kele kieleka. Samu ti ya kele—ya kele samu na yankaka. . . Ya kele kusunika ya yandi, kasi ntwadusulu ya yandi ve. Ya kele ntwadusulu ya Nzambi yina sonikaka Buku. Mbote mingi.

150 Beto mona yina ya ke tuba awa.

Kyese na yandi yina ke tanga, mpe bawu yina ke kuwa. . . ya profesi yayi, mpe ke bumba mambu yango yina kele ya kusonama na kati kuna: samu ti ntangu me kuma pene-pene.

151 Ntangu yayi, “Ntangu me kuma pene-pene.” Yinki? Ntangu Luzayikisu ya muvimba ya Yesu Klisto me zabana na mabuundu ya Yandi. Mpe na yina bansungi ke landila, ya ke monikisa kaka na bawu.

152 Ntangu yayi beto kele kaka na nsuka ya ntangu, na yawu ntangu yayi kieleka beto kele na nsuka ya yinza. Beto kele na nsuka ya disole ya yinza. Mpe ntete sabala yayi suka, mpe ti Nzambi vwanda na beto, sadisa beto, beto ke lakisa ti beto kele na nsuka ya bansungi ya dibuundu. Beto kele na Philadel- . . . to na Nsungi ya Dibuundu ya Loadika, nsuka ya bansungi nyonso. Beto kele na nsuka ya yinza ya politiki. Beto kele na nsuka ya—ya yinza ya nsuni. Beto kele na nsuka ya bima nyonso. Beto kele na nsuka ya konso kima ya yinza, ya kuyilama na kukota.

153 Na kukwizaka kilumbu yankaka yina, mu banza mu vwandaka kwenda na Shreveport, to vwandaka kwenda kisika. Mu talaka. Mu tubaka, “Bayinti ke na kufwa. Matiti ke na kufwa. Bafololo ke na kufwa. Mu ke na kufwa. Yinza ke na kufwa. Nyonso ke na kufwa. Nyonso na yinza yayi ke na kufwa.” Beto kele ya kuvwanda awa na suka yayi, ke na kufwa.

154 Kieleka ya kele na yinza kisika mosi, kisika nyonso ke kufwa ve. Kana ya kele na mosi kisika nyonso ke kufwa, ya fwana vwanda na mosi kisika nyonso ke zinga. Ya kele na yina beto kele na nsatu, na kukuma na kisika yina kisika ya kele. . . bayinti yina ke kufwaka ve ke telama. Oh, kisika nyonso yina ke kufwaka ve mpe ya ke telamaka na—na nkembo ya Nzambi.

155 Ntangu yayi, awa, banzila ya tatu ya ntete yina beto vwandaka me baka ntangu yayi, kele lufulu. Ya 1te, “Luzayikisu ya Yesu Klisto.” Ya 2, “Ya pesamaka na Jean na wanzio.” Mpe ya 3, kele, “Kyese, lusakumunu na bayina ke tanga, mpe,” kana beno lenda tanga ve, “kyese na yandi yina ke kuwa.” Beno lenda tanga ve? Beno ke kuwa kaka Yawu. Kaka yina. “Kyese na yandi yina ke tanga, mpe,” kana beno lenda ve kutanga, “kyese na yandi yina ke kuwa, samu ti ntangu me kuma pene-pene.”

156 Ntangu yayi, beno banza na yina zola kutuba kikubudi yayi, ya kele ti, Jean, musoniki kuna, na kusonikaka yawu, vwandaka. . . *Yayi* kele Jean awa, yina ke na kutubaka kaka “balusakumunu” mpe nyonso yankaka. Ntangu yayi, yina mu banza ya vwandaka, na Ngwisani ya Ntama, nganga-Nzambi vwandaka telama na suka mpe vwandaka tanga Masonuku. Dibuundu vwanda kuwa. Mingi vwandaka tanga ve. Na yawu yandi tubaka, “Kyese na yandi yina ke tanga, mpe yandi yina ke kuwa.” Beno me mona? Muntu yina ke tanga mpe muntu yina ke kuwa; muntu yina ke kuwa, kele ya kusakumuna. Na yawu kana beno vwanda kaka mpe ti beno kuwa yawu, beno kele ya kusakumuna. “Kyese na yandi yina ke tanga, mpe na yandi yina ke kuwa, samu ti ntangu me kuma pene-pene.”

157 Ntangu yayi, kubanda 4 tii 6 ya kele mbote na Dibuundu. Ntangu yayi beto zola kubaka yayi ya 4 mpe ya 6.

158 Ntangu yayi, ntete beto kota na yawu, mu zola muntu nyonso na kumeka na kubanza ngolo ntangu yayi. Yinki Yawu kele ntangu yayi? Ya kele luzayikisu ya Yesu Klisto, kisika Nzambi katulaka vwale ya ntangu. *Awa* kele ntangu, yina Yesu lendaka kumona ve ntangu Yandi vwandaka awa na zulu ya ntoto, bansungi ya dibuundu, yinki zolaka salama. Na yawu, Nzambi katulaka vwale, katulaka yawu, mpe bikaka Jean kutala mpe kumona yina konso nsungi ya dibuundu zolaka sala, mpe sonikaka yawu na buku mpe fidisaka yawu na mabuundu sambwadi.

159 Yinki ya kele? Klisto ya kumonikisa na bilimbu ya kusalu ya Yandi—ya Yandi. Ya kele ya kifuluka na kusalu, Buku. Mpe ya kele Buku ya profesi yina Klisto me pesa, Nzambi me pesa na beto na nzila ya wanzio ya Yandi, Jean sonikaka. Mpe lusakumunu na muntu nyonso yina ke tanga Yawu to ke kuwa Yawu, samu ti—samu ti ntangu me kuma pene-pene ntangu nyonso yayi ke salama.

160 Beto kele na kisika ya mbote ya kuvwanda ntangu yayi. Mpe beno bambuka moyo, beto ke bumba Dibuundu na dibanza. Na lweka mosi, Dibuundu me banda; na lweka yankaka, dibuundu me suka. Beto ke kota mingi na yawu, na Kilumbu ya ntete na nkokila, ntangu beto ke kota na bansungi ya dibuundu.

Jean na mabuundu sambwadi yina kele na Asie: Lemvo vwanda na nge, mpe ngemba, na yandi yina kele, . . . yina vwandaka, mpe yina ke kwiza; mpe na Bampeve sambwadi yina kele na ntwala ya kiti ya yandi ya kintinu.

161 Ntangu yayi beto ke na kukota na bitini ya mansweki mpe ya kati mingi ya bidimbu. Ya kele samu na mabuundu sambwadi yina kele na Asie Mineur. Bawu vwandaka—bawu vwandaka . . . Bansungi, na ntangu yina, zolaka kwiza na bilumbu na ntwala. Mpe yandi kembilaka bawu mpe—mpe siikaka bawu samu na kosalu ya bawu mpe na yina bawu salaka. Kasi, ntangu yayi, ya kele samu na mabuundu ya bawu, na mabuundu sambwadi yina kele na Asie Mineur.

162 Ntangu yayi, Asie Mineur vwandaka ve Asie nyonso, ntoto ya Asie. Ya vwandaka kaka mwa kitini. Bawu ke tuba, kisika pene nene na yinsi ya Pennsylvanie, beno me mona, to kima mutindu yina, to Indiana; kaka kisika ya fyoti kisika mabuundu sambwadi vwandaka. Ya vwandaka na mabuundu yankaka na ntangu yina. Mpe, kasi, ya vwandaka monikisa nkadulu ya bawu. Ntangu yayi mu ke na kutangaka awa yina mu kuzwaka na kutanga ya munu na disolo ya yawu.

163 “Mpe yandi kele . . . Ya kusinga kele yandi yina ke kuwa mpe, to, mpe ke kuwa na Yawu ve.”

164 Mpe—mpe ntangu yayi, ya me kuma na ntangu ya nzila ya 4 yayi yina beto zola kutendula kima mosi awa. “Na Yandi yina vwandaka, mpe yina kele, mpe yina ke na kwiza, mpe yina kele na Bampeve sambwadi; na Bampeve sambwadi yina kele na ntwala ya kiti ya Yandi.” Ntangu yayi, “Bampeve,” beto ke baka yawu na ntwala.

165 Ntangu yayi, awa ya ke lakisa, kana beno ke tala kuna—kuna. Mpe na nzila ya 7, to na nzila ya 8, Yandi ke kwiza dyaka mpe ke tuba, ke lakisa dyaka. Ntangu yayi beno tala mbote. Ya kele samu na mabuundu sambwadi. “Na Yandi yina kele, yina vwandaka, mpe yina ke na kwiza. Yina vwandaka, mbala mosi; yina kele ntangu yayi; mpe yina ke na kwiza.” Ntangu yayi, Yandi ke lakisa awa bima tatu ya Yandi, bima tatu ya kutalana ya Yandi na kosalu ya Yandi.

166 Ntangu yayi kana beno ke baka nzila ya 8. Beto ke kuma na yawu, kaka na minuti mosi. Beto ke baka nzila ya 8.

Mu kele Alpha mpe Omega, mbandukulu mpe nsuka, ke tuba Mfumu, yina kele, . . . yina vwandaka, mpe yina ke na kwiza, ya Ngolo nyonso.

¹⁶⁷ Ntangu yayi beto na kutalaka banzila ya 4 mpe ya 6, bawu zole kele mutindu mosi. Na mosi, Yandi ke tuba, “Na Yandi yina vwandaka, yina kele, yina ke na kwiza.” Yinki Yandi ke na kumekaka na kutula na ntuala ya Dibuundu? Banzambi ya Yandi. Bubu yayi, bantu ke meka na kusala Yandi profete. Yandi kele ya kulutula profete. Mpe bantu yankaka ke meka na kusala Yandi Banzambi tatu. Yandi kele ve Banzambi tatu. Yandi kele Nzambi mosi yina ke zingaka na bisalu tatu, bakumonisama tatu ya Nzambi mosi.

¹⁶⁸ Ntangu yayi, beno bambuka moyo, yayi kele Luzayikisu, “Mpe muntu nyonso yina ke kuwa yawu mpe ke bumba ve bakutuba ya buku yayi, ba ke katula ndambu ya yandi na buku ya luzingu.” Yesu ke na kumonikisa Yandi mosi ve mutindu Banzambi tatu, kasi Nzambi mosi mpe bisalu tatu. Oh! Ya ke kuma mbote mingi na manima ya ntangu fyoti, ntangu beto ke kota na bansungi yango ya dibuundu mpe kumona kisika bawu zimbisaka yawu. Yawu salaka kukabuka ya nene na Lukutakanu ya Nicée. Bawu zole bakaka banzila ya yimbi.

¹⁶⁹ Mpe bawu ke sala dyaka kima mosi na bilumbu yayi ya nsuka, kaka mutindu Lukutakanu mosi dyaka ya ntete ya Nicée, samu ti ya ke vwanda na mosi yankaka. Kaka kieleka mutindu mu kele ya kutelama awa, mabuundu ya Katolika mpe Misyoni ke vukisa kima mosi kintwadi, to ke vwanda ntima mosi na yankaka. Beno tala archevêque ya Canterbury kuna ntangu yayi. Nyonso ya yawu ke na kuvukanaka kintwadi. Mpe ya kele ve na malongi ya butatu ya Nzambi na Biblia. Ya kele na Nzambi mosi.

¹⁷⁰ Mpe ya kele ya kumonikisa awa na Buku ya Apocalypse, ti kikubudi ya muvimba ya Masonuku lendaka vwanda ya kulakisa awa, mpe Klisto ke tula kidimbu ya Yandi na zulu ya yawu. Yayi kele Yawu. Kana muntu katula to bwela, kima mosi mpe ba ke katula na Buku ya Luzingu, ya yandi. Na yawu beno belama na yayi ve na munimi, beno belama na yayi na ntima ya kufunguka mpe dibanza ya kufunguka.

¹⁷¹ Ntangu yayi, na Lukutakanu ya Nicée, bawu kumaka na balukanu zole ya nene. Na . . . Oh, mingi ya bawu na kilumbu yina ya batata ya ntete ya dibuundu, bawu vwandaka na bakumona zole ya nene. Mosi ya bawu vwandaka butatu ya Nzambi, butatu. Mpe mosi yankaka vwandaka Nzambi mosi. Mpe bawu zole basikaka mpe basikaka na bintala zole, basikaka mutindu *yayi*. Butatu Nzambi kumaka kisika ya persona ya banzambi tatu. Ba-Unitaire me kuma ba-unitarienne, kaka yimbi mutindu yankaka yina vwandaka. Na yawu bawu zole me kwenda na bintala, kasi kaka na kati *Awa* ke monikisa Kieleka.

¹⁷² Yesu zolaka vwanda ve Tata ya Yandi mosi. To dyaka, kana Yandi vwandaka na tata na ngaanda ya Mpeve-Santu, na yina Yandi kele mwana ya makangu. Mpe ve . . . Mpeve-Santu salaka kivumu ya Yandi, mpe Yandi tubaka Nzambi vwandaka

Tata ya Yandi. Na yawu Mpeve-Santu mpe Nzambi. . . Yina kele Matthieu 1:18. Kana. . . Mpeve-Santu mpe Nzambi zolaka vwanda Muntu mosi, to Yandi zolaka kuzwa bapapa zole. Mpe ba bokilaka Yandi *Emmanuel*, yina kele, “Nzambi na beto.” Yandi tubaka, ntangu Yandi vwandaka awa na zulu ya ntoto, ti Yandi mpe Tata vwandaka Mosi.

¹⁷³ Mu kele na Masonuku nyonso ya kusonama awa samu beno tala, kana beto kuzwa kyuvu yayi—yayi, to kima mosi yankaka.

¹⁷⁴ Ntangu yayi, ntangu Yandi monikaka awa, mutindu bima tatu ya kisalu ya moyo ya Yandi, “Yandi yina vwandaka, Yandi yina kele, Yandi yina ke kwiza, ya Ngolo nyonso,” ntangu yayi, ya kele ve na Banzambi tatu kuna; ya kele na Nzambi mosi.

¹⁷⁵ Mpe na Lukutakanu ya Nicée, na kusalaka yayi, samu na kusalaka yayi, bawu zolaka baka butatu ya Nzambi, samu ti na yinza ya Rome bawu vwandaka na banzambi mingi. Bawu vwandaka sambila bankooko ya bawu ya kufwa. Mu kele na disolo kaka awa kisika beto lenda tanga yawu. Beno me mona? Bawu vwandaka sambila bankooko ya bawu. Ya kele samu na yina bawu vwandaka na Santu Cécile, mpe Santu Marc, mpe santu, santu, santu, santu, santu, santu.

¹⁷⁶ Ntangu, Ntumba Pierre tubaka, “Ya kele na muvukisi yankaka ve na kati-kati ya Nzambi mpe bantu, kasi Muntu yango Klisto Yesu.” Mosi.

¹⁷⁷ Bawu zolaka kuzwa nzambi ya butatu. Na yawu, bawu—bawu kuzwaka Jupiter, Mars, Venus. “Mpe ya vwandaka ve ya kulunga, samu na kutula yawu nyonso na Nzambi mosi,” na yawu bawu kabulaka yawu, mpe salaka bima tatu ya bisalu ya Nzambi kuvwanda Banzambi tatu ya kuswaswana.

¹⁷⁸ Kasi Yandi tubaka pwelele awa, na Apocalypse, Nani Yandi kele. “Mu kele Yandi yina vwandaka, Yandi yina kele, mpe Yandi yina ke na kwiza, ya Ngolo nyonso.” Beto ke baka Yawu ntama fyoti na mantwala awa, Yandi tubaka, “Mu kele Alpha mpe Omega,” A tii Z, ya muvimba, na bisono ya Grec. “Lis ya Vallée, Rose ya Saron; Tata, Mwana, Mpeve-Santu; Yandi yina vwandaka, yina kele, mpe yina ke kwiza; Kifumba mpe Nkuna ya David.” Yandi kele Nzambi, Nzambi. “Kukon-. . .” Ya Ntete ya Timothée 3:16, “Kukondwa ntembe, dinsweki ya kinzambi kele nene: samu ti Nzambi kumonisamaka na nsuni, kumonanaka na Bawanzio, ya kukwikila na yinza, kuzangukaka na Nkembo.” Nzambi! Muntu ya tatu ve to profete, kasi Nzambi Yandi mosi, kumonisamaka na mutindu ya muntu. Ntangu yayi, yayi kele luzayikisu, beno bambukila moyo.

¹⁷⁹ Ntangu yayi, Nzambi, na mbandukulu, vwandaka Yehowa ya nene yina vwandaka zingaka na Dikunzi ya Tiya, yina vwandaka na zulu ya Israël, mpe yina vwandaka twadisa bawu. Ya vwandaka Nzambi, Wanzio ya Ngwisani. Yandi kulumukaka na mongo; mongo ya muvimba kuzwa Tiya. Tiya basikaka na

ngolo na mongo, mpe sonikaka Balutumumu Kumi. Ba bokilaka Yandi “Nzambi na kati ya Butata,” na bana ya Yandi, bantu yina Yandi solaka, ba-Juif.

¹⁸⁰ Kuna Nzambi mosi yango kumonisamaka na nzutu yina butamaka na mwense yina Yandi vangaka na kivumu ya Marie, mpe zingaka mpe vwandaka mpe tulaka tenta ya Yandi, mutindu ya vwandaka, na kati-kati ya bantu. Mpe Nzambi mosi yango kumaka nsuni mpe zingaka na kati-kati ya beto. Biblia ke tuba yawu. “Nzambi vwandaka na kati ya Klisto.” Nzutu vwandaka Yesu. Yesu, “Na kati ya Yandi vwandaka zinga muvimba ya Bunzambi na nzutu.” Yina ke sala ve Yandi bantu tatu, awa. Beno botika ve na Banzambi tatu. Ya kele na Nzambi mosi. Beno me mona? Nzambi mosi. Ntangu yayi, Nzambi mosi yango yayi kumaka nsuni.

Yandi tubaka, “Mu me katuka na Nzambi, mpe mu ke na kwenda na Nzambi.”

¹⁸¹ Na manima Yandi me zimbana na ntoto, na nzila ya lufwa ya Yandi, na luzikulu, mpe mvumbukulu, mpe nzanguka, Paul kutanaka Yandi na nzila ya Damas, ntangu ba vwandaka bokila ntete yandi “Saul.” Mpe Ndinga kwizaka, mpe tubaka, “Saul, Saul, samu na yinki nge ke na kutalisa Munu mpasi?”

Yandi tubaka, “Nani Nge kele?”

Yandi tubaka, “Munu kele Yesu.”

¹⁸² Mpe Yandi vwandaka Dikunzi ya Tiya, Nsemo yina kufwa meso ya ntumwa. Yandi vutukaka. Yesu mosi yango vutukaka dyaka, Nzambi, Tata. Ya kele samu na yina Yandi tubaka awa, “Mu kele ya Ngolo nyonso,” na mutindu mosi Yandi vwandaka ntete Yandi kuma nsuni; mpe na nzutu ya Yandi yina Yandi zingaka, yina ba vwandaka bokila Yesu, Muntu yina beto zaba, Yesu.

¹⁸³ Ntangu yayi, mutindu mingi ya beno bantu ya luzolo ya ba-unitaire yina ke botikaka na, “Nkumbu ya Yesu,” beno kele na foti. Ya kele na bankama ya Bayesu na yinza bubu yayi, kasi ya kele kaka na mosi Mfumu Yesu Klisto. Yandi butukaka Klisto. Bayesu mingi. Mu me kutanaka bawu mingi. Kasi ya kele na mosi Mfumu Yesu Klisto, Yandi kele Nzambi.

¹⁸⁴ Mpe Tata, Mwana, mpe Mpeve-Santu kele ve *bankumbu*. Ya kele bisalu yina ke kwendaka na Nkumbu mosi. Bawu ke botika, “Na nkumbu ya “Tata, Mwana, Mpeve-Santu.” *Tata* kele ve nkumbu, mpe *Mwana* kele ve nkumbu, mpe *Mpeve-Santu* kele ve nkumbu. Ya kele kisalu, mutindu “muntu.” Ya kele yina ya kele, Mpeve-Santu. Muntu. . . To, mpeve, Mpeve-Santu. Na yina kutuba, “Na nkumbu ya “Tata.” Beno tala na batata, mpe bana ya bana ya beno. Beno tala bantu na kati awa. Beno me mona? “Tata, Mwana, mpe Mpeve-Santu” kele ve nkumbu. Ya kele kisalu yina ke kwendaka na Nkumbu ya “Mfumu Yesu Klisto.”

185 Ya kele mutindu Dibuundu ya bantumwa vwandaka botika, na mbandukulu. Mpe mu ke lomba na muntu nyonso na kubasisa kisono mosi ya Masonuku, to mbala mosi na disolo, ti muntu kubotamaka ntete na Dibuundu ya Miklisto na mutindu yankaka na . . . kasi na Nkumbu ya “Yesu Klisto” tii dibuundu ya Katolika me salama. Mpe bawu ndimaka “Tata, Mwana, mpe Mpeve-Santu” mutindu credó. Ntangu yayi beno nata disolo ya beno, beno bayankaka ya bantu ya masolo. Yinga. Ya kele ve na kima mosi mutindu yina. Na manima ya mvula 304 ya ntangu ya beto, 304, kwizaka mbotika ya butatu samu na Nzambi ya butatu, “Nzambi Tata, Nzambi Mwana, Nzambi Mpeve-Santu.” Ya kele bumpani.

186 Ntete sabala yayi kusuka, mu ke tanga yawu na babuku mpe kulakisa beno na Biblia. Na suka yayi beto ke na kuzonzila na Luzayikisu, mpe kulakisa kisika ya kotaka, mpe mutindu ya bandaka. Beno vutuka na Kieleka, mpangi! Beto kele na kilumbu ya nsuka.

187 Beno vingila tii ntangu beto ke baka dibuundu yango ya Éphèse mpe kufwanikisa na ya Laodika, mpe kutala yinki kusalamaka na kati-kati ya bawu. Beno ke mona mutindu kima yango kukotaka. Yawu me kota na nsungi ya Luther, me tuba, “Nge ke na nkumbu yina nge ke na ‘kuzingila,’ kasi nge kele ya kufwa.” Mpova ya kieleka *Sardes* zola kutuba “ya kufwa.” Bawu zimbisaka yawu na kati ya bamvula funda mosi na bankama tanu ya Bansungi ya Mpimpa. Mosi na mosi ya mabuundu ya bawu bumbaka yawu tii ntangu yango. Na yina ntangu bawu kuzwaka Lukutakanu ya Nicée na mvula 606, mpe kuna bawu kufwaka Nkumbu yina mpe basisaka na Yawu Banzambi tatu.

188 Yandi tubaka awa, “Mu kele Yandi yina vwandaka, Yandi yina kele, mpe yina ke kwiza, ya Ngolo nyonso.” Kieleka.

189 Yandi vwandaka Moyo ya bima tatu na zulu ya ntoto. Ntangu Yandi vwandaka na zulu ya ntoto, Yandi vwandaka Moyo ya bima tatu. Na zulu ya ntoto, Yandi vwandaka Profete. Na Mazulu Yandi kele mpe, Nganga-Nzambi. Mpe ntangu Yandi ke vutuka dyaka na ntoto, Yandi ke vwanda Ntinu. Profete, Nganga-Nzambi, mpe Ntinu. Yandi yina vwandaka, yina kele, mpe yina ke kwiza. “Yandi yina vwandaka,” vwandaka Yesu, profete. “Yandi yina vwandaka ntangu yayi,” kele Nganga-Nzambi, na kusalaka minkayulu ya kimpeve, Nganga-Nzambi ya Ntete yina lenda vwanda ya kusimba na kuwa ya bifuma ya beto, mpe ke talana Yandi mosi mpe ke lakisa ti Yandi kele na kati-kati ya beto. Profete, Nganga-Nzambi, mpe Ntinu, kasi Nzambi Mosi.

190 Ntangu Yandi vwandaka na zulu ya ntoto, Yandi vwandaka Profete, Ndinga. “Mbangi ya kukwikama,” mutindu Biblia ke bokila Yandi, ntama fyoti na mantwala. Mbangi ya kukwikama, kele profete. Yandi vwandaka Nganga-Nzambi, mpe ntangu . . .

Yandi kele Nganga-Nzambi ntangu yayi, mpe ntangu Yandi ke kwiza, Yandi ke vwanda Ntinu.

¹⁹¹ Kana beno ke tanga, beno tanga Apocalypse 15:3, beno lenda mona na Apocalypse 15:3. Beto baka awa mpe kumona yinki Yandi . . . kana Yandi ke vwanda Ntinu, kana Yandi kele Ntinu ntangu Yandi ke kwiza. Ntangu yayi beto ke baka Apocalypse, kapu ya 15 mpe nzila ya 3.

Mpe bawu yimbaka nkunga mosi ya Moïse kisadi ya Nzambi, mpe nkunga ya Mwana-dimeme, na kutubaka, Nene mpe ngitukulu kele bisalu ya nge, Mfumu Nzambi ya Ngolo nyonso; ya kudedama mpe kieleka kele banzila ya nge, nge Ntinu ya basantu.

¹⁹² Yinki Yandi vwandaka na zulu ya ntoto? Profete. Wapi mutindu bantu zabaka ti Yandi vwandaka Profete? Yandi salaka kidimbu ya Mesiya, yina vwandaka Profete. Oh, lusakumunu vwanda na Nkumbu ya Mfumu! Wapi mutindu bawu kondwaka Yandi? Samu ti bawu vwandaka tala na kima mosi yankaka. Mpe Yandi salaka kidimbu ya Mesiya, mpe bawu zolaka ve kuwa yawu. Yandi vwandaka Profete.

¹⁹³ Moïse tubaka, “Mfumu Nzambi ya beno ke telemisa Profete mutindu munu. Yawu ke luta kana bawu ke kuwa ve Profete yayi, ba ke katula bawu na kati-kati ya bantu.”

¹⁹⁴ Yandi vwandaka Profete na zulu ya ntoto, ntangu yayi, samu ti Yandi vwandaka yinki? “Mbangi ya kukwikama ya Ndinga ya Nzambi.” Amen. Yandi vwandaka Ndinga ya Nzambi yina me monisama.

¹⁹⁵ Santu Jean, kapu ya 1te.

Na mbatukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi.

Mpe Ndinga kumaka nsuni, mpe zingaka na kati na beto, . . .

¹⁹⁶ Yandi vwandaka mbangi ya kieleka mpe ya kukwikama na Ndinga ya Kukonda nsuka ya Nzambi. Yandi vwandaka Ndinga, vwandaka Ndinga ya Nzambi. Mpe, na kuvwandaka Ndinga, Yandi vwandaka Profete. Samu ti Ndinga ya Nzambi vwandaka luta na nzila ya Yandi. Yandi zolaka tuba kaka Kima. “Mu lenda sala kima ve na Munu mosi, kasi yina Tata ke lakisa Munu na kusala. Munu ve ke salaka bisalu. Kasi Tata yina ke zingaka na kati ya Munu, Yandi ke salaka bisalu. Munu mpe Tata ya Munu kele Mosi. Tata ya Munu kele na kati ya Munu,” tubaka Yesu, Muntu, Tabernacle.

¹⁹⁷ Nzambi kele na bisalu mingi: Yehowa, Yehowa-Yile, -Rapha, -Manassé. Oh, mingi! Yandi kele na bankumbu sambwadi ya mpulusu yina ba me vukisa. Yandi kele na bisalu mingi: Rose ya Saron, Lis ya Vallée, Mbwetete ya Suka; Tata, Mwana, Mpeve-Santu. Nyonso yina. Kasi Yandi kele na Nkumbu

mosi ya bumuntu. Nzambi kuzwaka kaka Nkumbu mosi, mpe ya vwandaka “Mfumu Yesu Klisto.”

198 Ntangu Yandi butamaka, Klisto, Mfumu. Bilumbu nana na ntwala, Mpeve-Santu bokilaka Nkumbu ya Yandi “Yesu.” Mama ya Yandi kwendaka zenga Yandi, mpe bokilaka Yandi “Yesu.” Yandi butamaka Klisto.

199 Mutindu, mu butamaka Branham. Mu vwandaka Branham ntangu mu butamaka, mpe ba pesaka munu nkumbu ya “William.”

200 Amen. Mpe Yandi butamaka Klisto, Mvulusi. Mpe ntangu Yandi vwandaka na bamvula nana, ba pesaka Yandi nkumbu ya “Yesu.” Mpe Yandi vwandaka Mfumu ya Nkembo, yina monisamaka. Na yawu, Yandi kele Mfumu Yesu Klisto, Nzambi ya Nkembo yina monisamaka na kati-kati ya beto. Oh, beno tala Yandi!

201 Na zulu ya ntoto, Yandi vwandaka Profete. Na Nkembo, Yandi kele Nganga-Nzambi. Ntangu Yandi ke kwiza, Yandi ke vwanda Ntinu. Oh! Mu zola yawu.

Profete, “Mbangi ya kukwikama ya Ndinga.”

Nganga-Nzambi, “Na Menga ya Yandi Mosi na ntwala ya Nzambi.”

Ntinu, “Ntinu ya basantu.” Ve ntinu ya yinza, ntangu yayi. Yandi kele Ntinu ya basantu. Beto kele na bantinu ya yinza yina ke yalaka na zulu ya bantu. Kasi beto kele na Ntinu, mpe, mpe Kimfumu. Ya kele samu na yina beto ke salaka mutindu yankaka.

202 Mutindu mu vwandaka me tuba ntama mingi ve, samu na kento ya munu, beto vwandaka kwenda na magazini awa mpe beto monaka kimangu, na kutala. Ya vwandaka été, kento mosi lwataka robe. Mpe mu tubaka, “Ya kele kima ya ngitukulu.” Mu tubaka, “Kana mu vwandaka na kamera ya munu, mu zolaka baka mama yayi foto.” Beno me mona? Samu ti beto. . . Ya vwandaka kento ya ntete beto monaka ya kulwata jupe, beno zaba, ya kulwata mutindu mama zolaka vwanda, bakento nyonso.

203 Yandi tubaka, “Mbote, samu na yinki ya kele, Bill, ti bantu ya beto ke lwata, ya kele—ya kele samu ba tumaka beto yawu?”

204 Mu tubaka, “Ya kele ve bantu ya beto. Ya kele bantu ya Nzambi. Busantu ke lombama, na bantu ya Nzambi.”

Yandi tubaka, “Mbote, bawu ke kwendaka ve na dibuundu?”

205 Mu tubaka, “Ya kele na mama kaka *kuna*, yina ke yimbaka na chorale ya dibuundu mosi awa.”

“Mbote, na yina, samu na yinki mutindu?”

206 Mu tubaka, “Samu ba me tubaka ve na yandi mutindu yankaka.” Ya kele kaka kieleka.

207 Ya kele dibuundu yango ya nsuni, beto ke kota na yayi sabala yayi; Dibuundu ya kimpeve, dibuundu ya nsuni. Bawu nyonso ke na kuvutuka kaka na dibuundu ya mama, mutindu Biblia ke tuba, na Apocalypse 17, bawu ke sala yawu. Bawu ke na kuvutukaka kaka ntangu yayi, bawu nyonso, na kusalaka mutindu yawu, na kubongisaka. “Mbote, beto kele *mutindu* . . . Beto ke bongisa. Beto kele *yayi* mpe beto kele *yina*.” Ya vwandaka ve mutindu yina na mbandukulu. Ke katula ngolo nyonso na dibuundu mpe ke tula yawu na zulu ya évêque to pale. Nzambi kele na kati ya Dibuundu ya Yandi, na kati-kati ya bantu ya Yandi, ke monisama Yandi mosi na nzila ya bantu mpe bisika nyonso, ntangu yayi. Kasi na kilumbu yayi . . .

Yandi tubaka, “Mbote, beto kele bantu ya Amerika ve?”

208 Mu tubaka, “Ve. Beto ke zingaka awa, kasi beto kele ve bantu ya Amerika. Beto kele Miklisto. Kimfumu ya beto kele na Zulu”

209 Mpe kana baluzingu ya beto me katuka na zulu Kuna, na yina beto ke sala mutindu yina. Samu ti, beto me katuka . . . Luzingu ya beto me katuka na Kisika ya santu. Ya ke talana mutindu yankaka. Ke lwata mutindu yankaka. Bakento na zulu Kuna kele na nsuki ya yinda. Mpe bawu ke tulaka ve bima ya kubongisa kizizi ya bawu. Mpe—mpe bawu ke lwataka ve bakupe. Bawu—bawu ke lwataka bakupe, mpe ba-jupe ya yinda mpe ba-robe. Mpe bawu kele na nsuki ya yinda, mpe nyonso. Na yawu nkadulu ya yawu, na zulu Kuna, ke bula na zulu ya beto.

210 Bantu ke kunwaka tabaka ve, ke tafunaka tabaka ve, ke vunaka ve, ke yibaka ve. Bawu ke katuka, bampeve ya bawu, ke katuka na Kisika ya santu, ke sala bawu kusala na mutindu ya santu, ke zaba mosi na yankaka mutindu bampangi. Uh-huh. Kaka yina.

211 Beto kele ya Kimfumu mosi, mpe beto kele na Ntinu. Mpe Yandi kele Ntinu ya basantu. Mpe mpova *santu* ke katuka na mpova “bayina kele ya kusantisama.” Na yina ntangu muntu kele ya kusantisama, Klisto, Mpeve-Santu ke kwiza kota na ntima mpe ke kuma Ntinu na zulu ya yandi. Oh, la la! Yina ke simba dyambu ya ngundi. Oh! Ntangu ndonga ya Nzambi . . . Klisto, Ntinu, Mpeve-Santu, ke kota. Mpe Yandi . . . Ntinu kele na kisika ya Yandi. Amen. Mpe moyo ya beno ya muvimba kele ya kuyala na Ntinu ya basantu. Kimfumu! Konso kimfumu na zulu ya ntoto ke ningana, ke beba na ngolo ya atomique. Kasi Biblia ke tuba, “Beto ke kuzwa Kimfumu yina lenda ningana ve.” Amen. Yandi yayi, Ntinu ya basantu.

212 Mu zola beno tala bidimbu ya Klisto, mpe, na Biblia mpe awa na zulu ya ntoto. Na zulu ya ntoto, Yandi vwandaka Profete. Beno ke kwikila yawu? Profete kele Ndinga. Beto zaba yawu. Mpova *profete* zola kutuba “mutendudi ya Kinzambi ya Ndinga.” Ndinga ya Kinzambi kele ya kusonama, mpe profete kele na Mpeve ya Kinzambi ya Nzambi na kati ya yandi. Mpe,

beno zaba, ba vwanda bokilaka profete na Ngwisani ya Ntama “nzambi.” Bantu yikwa zaba yawu?

213 Yesu tubaka, “Kana ba bokilaka bawu banzambi. . . Ya kele ve ya kusonama na musiku ya beno, bawu kele. . . ‘Beno kele banzambi?’ Mpe kana ba bokilaka bawu ‘banzambi,’ bawu na bayina Ndinga ya Nzambi kwizaka, profete, wapi mutindu beno ke fundisa Munu na yina mu ke tuba Mu kele Mwana ya Nzambi?”

214 Samu ti, ba vwanda bokila yandi “nzambi,” samu ti yandi vwandaka nata na kati ya yandi Ndinga ya Nzambi, MUTINDU YAYI ME TUBA MFUMU. Na yawu, mpova *profete* zola kutuba, “ti kusimba ve na ntendulu ya yandi—ya yandi.” Beno me mona? Kana Nzambi. . . Yandi ke tuba, “Kana ya kele na mosi na kati ya beno, yina kele ya kimpeve, to profete, Munu Mfumu ke zonza na yandi. Kana yina yandi ke tuba kusalama, na yina beno kuwa yandi, samu ti Mu kele na yandi. Kasi kana ya salama ve, na yina beno kuwa yandi ve; Mu me fidisa yandi ve.” Ya kele mutindu beno ke zaba yawu. Mpe na yina, beno me mona, Ntendulu ya Kinzambi ya Ndinga fwana kuvukana na luzayikisu ya nsuka yayi na dibuundu.

215 Yandi kele Nzambi, ya Ngolo nyonso. Na zulu ya ntoto, Yandi vwandaka Profete, yina kele ngononi. Bantu yikwa zaba ti ba ke talaka profete mutindu ngononi?

216 Ngononi kele ndeke ya kulutula ngolo yina kele na beno, ya kufulukana na ngolo. Bayankaka ya mapapu ya bawu ke kumaka bametele yiya, na yinda. Yandi lenda baka mpe kupumbuka zulu mingi ti kana mosi yankaka ya bandeke meka na kulanda yandi, yandi ke pasuka, mapapu ke kubwa yandi mpe yandi ke kuma bitini-bitini. Samu na yinki? Yandi kele ya kutunga mutindu yankaka. Mpe wapi mbote ya ke sala yandi na kukwenda zulu zulu mutindu yina kana yandi lenda mona ve yina yandi ke na kusalaka ntangu yandi kele kuna na zulu? Beno ke zonzila na disu ya faucon? Beno fwana mona disu ya ngononi.

217 Faucon lenda, lenda mona nsusu. Ya kele kieleka. Beno tala dyambu yina kele na bayankaka ya bangoyi-ngoyi yayi bubu yayi. Uh-huh. Kasi, mu ke tuba na beno, ngononi ke kwendaka mutindu yina, kana faucon meka na kulanda yandi, yandi ke kufwa. Yandi ke tala mpasi na kupema. Yandi ke lenda ve kukota na bitezo yina ngononi ke kotaka.

218 Mpe na yina yandi kele na disu, ti yandi lenda mona ntama mingi, na yina yandi kele na zulu kuna. Na yawu ya kele samu na yina Nzambi bokilaka *ba*profete ya Yandi, “bangononi.” Yandi ke mata kuna, mpe yandi kele ngononi. Yandi lenda mona, ntama mingi.

219 Mpe Klisto, na zulu ya ntoto, vwandaka Ngononi. Ntangu Yandi kufwaka, Yandi vwandaka Nganga-Nzambi, na yawu yina salaka Yandi Mwana-dimeme. Ya kele kieleka? Mpe ntangu

Yandi ke kwiza dyaka, Yandi kele Ntinu, na yawu Yandi ke vwanda Nkosi, amen, Nkosi ya dikanda ya Juda. amen. Yandi kele Ngononi, Mwana-dimeme, mpe Nkosi; amen; Tata, Mwana, mpe Mpeve-Santu; Profete, Nganga-Nzambi, mpe Ntinu; Yandi yina wandaka, yina kele, mpe ke kwiza; ya Ngolo nyonso; Alpha mpe Omega, kubanda mbandukulu tii nsuka, Nzambi ya Seko.

220 Mu zola kuyufula beno, ndambu ya beno ya bantu ya Katolika ya ntalu, bayina ke bokilaka yawu, “Bumwana ya Seko ya Nzambi; bumwana ya Seko ya Yesu Klisto na Nzambi.” Wapi mutindu beno lenda tuba kima ya mutindu? Mu zaba mingi ve, mu sukaka kaka na lukolo ya fyoti, kasi mu zaba ya kulutula na yina. Mpova mwana fwana kuzwa mbandukulu. Na yawu wapi mutindu Yandi lenda vwanda ya Seko mpe kuvwanda mwana? Seko kele na ata mbandukulu to nsuka. Na yawu, Yandi lenda vwanda ve mwana, mwana ya Seko, mpe dyaka kuzwa mbandukulu, samu ti ya kele ve na kima mutindu mwana ya Seko. Mwana kuzwaka mbandukulu, na yawu yandi lenda vwanda ve ya Seko.

221 Beno me mona, Yandi kele Nzambi ya Seko, mwana ya Seko ve. Nkembo! Ya Ngolo nyonso, Yehowa-Yile, Yehowa-rapha, yina monisamaka na nsuni, “Na kati ya Yandi wandaka zinga muvimba ya Buzambi na nzutu.”

222 Mpe na Kilumbu ya Pantekote, ntangu Dikunzi ya Tiya kulumukaka na zulu ya bantu, beno talaka, Yawu kukabukaka Yawu mosi? Mpe milaka ya Tiya kwizaka vwanda na zulu ya mosi na mosi ya bawu. Tiya, mutindu milaka, ya kuvwanda na zulu ya mosi na mosi ya bawu. Yinki Nzambi wandaka sala? Kabulaka Yandi mosi na kati ya Dibuundu, na kati ya mosi na mosi, na kupesaka bakento, babakala, mpe bawu nyonso; ya wandaka bandambu ya Mpeve ya Yandi, na kukabulaka Yandi mosi na kati-kati ya Dibuundu ya Yandi.

223 Wapi mutindu muntu lenda belama mpe kutuba, “Muntu ya santu kele pape. Muntu ya santu kele évêque”? Muntu ya Santu kele Klisto, Mpeve-Santu na kati ya beto. Wapi mutindu beno lenda tuba ti muntu ke na dyambu ve ya kutuba? Mosi na mosi ya beno kele na kima ya kutuba. Mosi na mosi ya beno kele na kisalu ya kusala. Mosi na mosi ya beno fwana nata Nsangu. Nkembo!

224 Mpeve-Santu kukabukaka Yawu mosi na Kilumbu ya Pantekote. Nzambi, kukabukaka Yandi mosi. “Na kilumbu yina beno ke zaba ti Mu kele na kati ya Tata, Tata na kati ya Munu; Munu na kati ya beno, mpe beno na kati ya Munu.”

225 “Na kilumbu yina,” Mpeve-Santu, “na zulu ya beto nyonso, na kati ya beto nyonso, na nzila ya beto nyonso.” Amen. Yawu yina. Mpeve-Santu kele na muswa ya kusala na kisika nyonso yina Yandi zola, na zulu ya muntu nyonso Yandi zola. Beno fwana baka ve yina évêque mosi me tuba to nganga-Nzambi mosi me tuba. Yandi kele kaka Nganga-Nzambi, kieleka,

Nganga-Nzambi ya Ntete. Ntangu yayi: Profete, Nganga-Nzambi, mpe Ntinu.

226 Ntangu yayi:

Mpe . . . Yesu Klisto, yina kele mbanzi ya kukwikama, . . . ya ntete yina vumbukaka na lufwa, . . . (Beto ke kota na yawu.) mpe mfumu ya bantinu ya ntoto. Na yandi yina zolaka beto, mpe sukulaka beto na masumu ya beto na menga ya yandi mosi,

227 Mpova *sukulaka* kuna, kieleka, na Grec, zola kutuba “kukangula.” Yandi kangulaka beto na ya beto . . . Beto vwandaka ya kukangama na ntoto, na disumu ya beto. Beto vwandaka mona ve, beto vwandaka kuwa ve, beto vwandaka na ata dibanza ya Mazulu to kima mosi ve. Kasi ntangu Menga kulumukaka, Yawu zengaka nsinga mpe beto kangukaka. Oh!

228 Mu tangka disolo mosi kilumbu mosi, ya kele . . . ya lendaka simba mbote kaka awa. Kisadi bilanga simbaka ngoyi-ngoyi mosi mpe yandi kangaka yandi. Mpe yandi tubaka, “Mu ke pesa leso na bangoyi-ngoyi yankaka.” Na yawu yandi kangaka ngoyi-ngoyi yango, mpe na dikulu, na nsinga, mpe ndeke yango ya mawa mutindu vwandaka kufwa na nsatu. Yandi vwandaka mingi ya kulemba, na mpasi yandi vwandaka lenda kutambula.

229 Ya kele yina, bayankaka ya ba-organisation yayi mpe mabuundu, me kangaka bantu. “Beno lenda kaka ve! Mbote, yayi kele ntama nyonso yina beno lenda kwenda. Bilumbu ya bimangu me luta.” Yinga. Beno kele kaka ya kukanga. Kaka yina. “Ya kele ve na kima mutindu Mpeve-Santu. Yandi ke zonga ve na bandinga mutindu Yandi vwanda salaka.”

230 Yandi kele Nzambi. “Yandi kele kaka mutindu mosi mazono, bubu yayi, mpe kukonda nsuka,” Hébreux 13:8, ke zinga na kati ya mabuundu nyonso. Beto ke baka yawu na manima ya kuvwanda ya suka yayi. Beno me mona? Yandi kel Nzambi, yina ke zingaka na konso nsungi ya dibuundu. Yandi ke zinga na konso nsungi ya dibuundu, mpe ke zinga na kati ya bantu ya Yandi mutindu . . . tii Seko. Samu ti beno ntangu yayi kele, na kati ya beto, Luzingu ya Kukonda nsuka.

231 Na yawu, dénomination yayi kangaka yandi, beno me mona, “Mbote, bilumbu ya bimangu me luta. Ya kele ve na kima mutindu kubeluka ya Kinzambi.” Ndeke yango ya mawa vwandaka kwenda tengu-tengu ti yandi vwandaka ya mawa mingi ti na mpasi yandi zolaka tambula.

232 Mpe kilumbu mosi ya vwandaka na muntu mosi ya mbote yina lutaka kuna, mpe yandi tubaka, “Beno zaba, ngoyi-ngoyi yango ya mawa, mu ke tala yandi kyadi mingi. Na manima ya nyonso, ya lendaka vwanda ti yandi vwandaka baka disangu ya yandi, kasi ya kele kaka mutindu yandi ke salaka na kuzinga. Yandi fwana kuzwa kima ya kudya. Na yawu yandi zabaka ve mutindu mosi yankaka, yandi kele kaka kuna na ngaanda na

kubakaka disangu. Na yawu kana . . .” Na yina yandi bakaka ya yandi. . . mpe bakaka mbele ya yandi mpe kangulaka ngoyi-ngoyi yango.

²³³ Mpe beno zaba, awa me kwiza bangoyi-ngoyi yankaka, bawu me kwiza, bawu me tuba, “Kwiza, Ngoyi-ngoyi Johnny. Beto kwenda na Sude. Kisifu ke na kwiza.”

²³⁴ Beno zaba yinki? Ngoyi-ngoyi yango zolaka kwenda kaka ntama mutindu yandi zolaka basika kuna. Yandi tubaka, “Mu lenda sala yawu ve. Ya kele ve, ya kele kaka ve samu na beto na kilumbu yayi. Beto—beto lenda kaka ve kusala yawu” Beno me mona? Yandi vwandaka ya kukangama bilumbu mingi, tii yandi banzaka ti yandi vwandaka dyaka ya kukangama. Beno me mona?

²³⁵ Mpe ya kele mutindu na bantu mingi, beno kele ya kukangama na ba-credo mpe ba-dénomination, na kubandaka na mama ya ndumba ya ntama na manima kuna, na kutubaka na beno, ti, “Yesu Klisto kele ve mutindu mosi. Mpe ya kele ve na kima mutindu kubeluka. Ya kele ve na mbotika ya Mpeve-Santu. Ya kele ve na kima yayi mutindu yina.” Ba ke meka na kutuba yawu na beno. Beno me vwanda bilumbu mingi ya kukangama ti beno ke banza dyaka ti beno kele ya kukangama.

²³⁶ Muntu ya mbote, Klisto, pesaka Menga ya Yandi ti Yandi lendaka sukula beto mpe kukangula beto na disumu ya beto. Yinki kele disumu? Mu ke yufula muntu nyonso na kutuba na munu. Yinki kele disumu? *Disumu* kele “kukondwa lukwikilu.” Ya kieleka. “Yandi yina ke kwikila ve kele yimeni ya kufundisa.”

²³⁷ Mpe disumu ya beno kele kaka kima yina ke kanga beno na kuvwanda na kimpwanza. Samu ti Nzambi kangulaka beno na kukondwa lukwikilu ya beno, kasi beno kele mingi ya kukangama na ba-credo ti beno ke banza dyaka ti beno kele ya kukangama. Beno ke na kufwa kaka na nsatu, beno me mona, beno ke kwenda kaka tengu-tengu, “Mu kele Presbytérien. Mu kele Méthodiste. Mu kele Baptiste. Bawu ke tuba na munu (Mu kele ya Dibuundu ya Klisto), ‘Bilumbu ya bimangu me luta. Ya kele ve na kima ya mutindu.’”

²³⁸ Beno ngoyi-ngoyi ya mawa yina ke na kufwa na nsatu! Samu na yinki beno lenda kwiza ve na suka yayi? Samu na yinki beno lenda pumbuka ve? Alleluia! “Beno telama na mapapu ya suka, mpe beno pumbuka na Mwini ya Ludedomo, na kubeluka na mapapu ya Yandi.” Amen. Kaka yina. Kaka yina, mpangi ya bakala, mpangi ya kento. Oh! “Yandi yina Mwana me kangula, kele kieleka na kimpwanza.” Yinga, tata!

²³⁹ “Mbote, pasteur ya munu . . .” Mu ke na dyambu ve na yawu. Biblia ke tuba, “Beno kele na kimpwanza.” Ya kele kieleka. Beno kele na kimpwanza.

“Dibuundu ya munu . . .”

²⁴⁰ Mbote, beno vwanda ya kukanguka. “Yandi me sukula beto mpe me kangula beto na ba-dénomination, na Menga ya Yandi Mosi,” mpe me pesa beto kimpwanza samu ti beto banza samu na beto mosi, mpe kusala samu na beto mosi, mpe kuzonza samu na beto mosi, mpe kusala samu na beto mosi.

²⁴¹ “Mbote, kana mu vutuka mpe mu tuba na pasteur ti mu fwana kuzwa dyaka mbotika, yandi ke . . .”

²⁴² Wapi mutindu samu na, “Benó kele na kimpwanza”? Yayı kele luzayikisu, beno zaba. Mbote mingi. Benó kele na kimpwanza.

²⁴³ Kana ba mwangisaka beno mwa maza ya ndonga ya fyoti ya mungwa mutindu *yayı*, na nkumbu ya “Tata, Mwana, mpe Mpeve-Santu,” awa kele na kiziba ya maza awa, ya kuyilama na suka yayi, na maza na kati ya yawu. Benó me mona? Yinga, tata. Ya kele kieleka.

²⁴⁴ Na yawu, beno kele dyaka ve ya kukangama. Benó kele na kimpwanza, kasi ya lenda vwanda ti beno zaba yawu ve. Kasi beno bika munu kutuba na beno na suka yayi, Biblia ke tuba, “Yandi kangulaka beto na masumu ya beto, na kukondwa lukwikilu ya beto, ti beto lendaka kuzwa Luzayikisu ya Yesu Klisto.” Benó kwenda, kimpwanza! . . . beno fwana baka ve yina dibuundu mosi ke tuba samu na Yawu. Benó baka yina Nzambi ke tuba samu na Yawu. Awa kele Luzayikisu ya Yandi na kumonikisaka Nani Yandi kele.

²⁴⁵ “Mu ntangu nyonso ke kwikilaka ti Nzambi Tata vwandaka na mandefo ya yinda, ya mpembe, na nsuki ya mpembe; mpe ti Mwana vwandaka ntwenya ya bakala; mpe Mpeve-Santu vwandaka mwana ya bakala yina ke pesaka siansi.” Mpangi, yina kele bumpani. Ya kele bumpani kana beno ke kwikila na Banzambi tatu.

²⁴⁶ Lutumu ya ntete ya kieleka, yinki kele Lutumu ya ntete? “Kuwa, O Israël: Mu kele MFUMU Nzambi ya nge, Nzambi mosi.” Kaka yina.

²⁴⁷ Yandi kele Nzambi mosi, banzambi tatu ve. Yandi zingaka na kati ya bisalu tatu, sadilaka bisika tatu. Yandi kele Profete, Nganga-Nzambi, mpe Ntinu. Yandi kele Ngononi, Mwana-dimeme, mpe—mpe Nkosi. Yandi kele Lis ya Vallée, Rose ya Saron, Lis ya Vallée, mpe Mbwetete ya Suka, Nsimbulu mpe Nkuna ya David. Yandi kele kubanda A tii Z. Yandi kele Tata, Mwana, mpe Mpeve-Santu. Yandi kele nyonso yina, kasi Yandi kele Mosi. Yandi kele Nzambi mosi. Ya kele bisalu ya Yandi yina ke kwendaka na Yandi, kasi ya kele na Nzambi mosi.

²⁴⁸ Ata mbala mosi ve ti muntu mosi, page mosi ya Biblia to na disolo, tii na ntangu ya dibuundu ya Katolika, kubotamaka ntete na kukotaka na maza na nkumbu ya “Tata, Mwana, Mpeve-Santu.”

249 Kana beno lakisa munu page to kima mosi, beno sonika yawu, beno tula yawu na zulu awa samu na munu, na nkokila yayi, mpe mu ke basika na dibuundu yayi, na kutubaka, “Mu kele muntu ya luvunu; mu me tuba luvunu na bantu.” Kana beno lenda lakisa munu kisono mosi ya Masonuku, to beno natila munu disolo mosi, disolo ya kieleka, yina ke lakisa munu ti kisika yina bantu kubotamaka ntete, na Biblia, na nkumbu ya “Tata, Mwana, Mpeve-Santu.” To, beno natila munu mosi ya Maso- . . . to, buku mosi ya disolo, page mosi, disonuku mosi na disolo, kisika muntu mosi kubotamaka na nkumbu ya “Tata, Mwana, Mpeve-Santu,” tii na ntangu ya Concile ya Nicée ya dibuundu ya Katolika. Beno kwiza, beno natila munu yawu; mpe mu ke tula kidimbu na manima ya munu mpe ke tambula Jeffersonville nyonso, mpe beno na manima na klaxon, ke sala makelele. Mu ke tula na zulu kuna, “Profete ya luvunu, yina ke twadisa bantu na luvunu.”

250 Mpe, pasteur, kana beno kele awa na suka yayi, kana beno ke sala yawu, beno fwana bika munu kusala yawu na beno. Beno me mona? Beno kwiza, lakisa munu. Kasi beno kele na boma.

251 Ntangu yayi, yinki ya kele? *Yayi* kele Luzayikisu. *Yayi* kele Luzayikisu. Mpe yayi kele Mpeve-Santu, Klisto, yina ke na kufidisa Nsangu ya Yandi na mabuundu. Beno kuwa Yawu. Beno kuwa Yawu. Ya kele yina Biblia ke longa.

252 Wapi kisika yawu me kumina? Kana beno ke dasuka kaka ve, ke kwenda ve, nzila nyonso ya sabala, beno—beno baka Balukutakanu ya Nicée. Beno baka *Les deux Babylones* ya Hislop. Beno baka . . .

253 Ntangu yayi, disolo ya Josèphe ya kele mbote, kasi yandi sonikaka kaka paragraphe mosi na zulu ya Klisto, yandi tubaka, “Ya vwandaka na muntu mosi na nkumbu Yesu yina vwandaka kwenda bisika, vwandaka belusa bantu. Mpe—mpe yandi kufwaka, to, ve, Pilate kufwaka yandi, mpe—mpe, to Hérode, to pesaka yandi na lufwa. Mpe na manima bilandi kwendaka mpe yibaka nzutu ya yandi, mpe bumbaka yawu. Mpe na manima konso nkokila bawu vwandaka kwenda mpe vwandaka zenga yawu na bitini mpe vwandaka kudyaka yawu.” Yandi tubaka, “Bawu vwandaka bantu yina ke kudyaka bantu.” Na yawu, bawu vwanda baka kominyo, beno me mona. Dibanza ya nsuni! Josèphe kele ve muntu ya kuwa.

254 Kasi beno baka *Le Livre Des Martyrs De Foxe*. Beno tala mosi ya mbote ya kieleka. *Le Livre Des Martyrs De Foxe*, bantu yikwa me tangaka ntete yawu? Kieleka. *Les Âges Primitifs* ya Pember, to—to *Les Deux Babylones* ya Hislop, to—to mosi ya kieleka ya nene. To, mosi ya kulutila nene yina kele na beto kele Concile ya Nicée, Concile ya ntete ya Nicée mpe Concile ya Nicée. Mpe beno ke tala kuna, ya vwandaka ata mbala mosi ve ya kutanga, na ata muntu ve.

255 Beno baka Masonuku ya Santu mpe beno mona kana ya me vwandaka na muntu na Biblia yina me botamaka, na kubakaka bisalu yango, ya nkumbu “Tata, Mwana, mpe Mpeve-Santu.” Ya ke lakisa banzambi tatu. Ya kele samu na mukembo ya mimpani. Mpe Bukatolika kele kima yankaka ve na yinza kasi Buklisto na mutindu ya mumpani. Mpe na dibuundu ya Katolika kwizaka Martin Luther, John Wesley, ba-Baptiste, ba-Presbyterien, mpe nyonso yankaka.

256 Kasi na bilumbu ya nsuka ya vwandaka na mwelo ya kutula na kati-kati kuna, yina ke zibulaka dyaka Kieleka, ti, “Biblia ke tuba mutindu,” mpe profete ya nene yina vwandaka kwiza na zulu ya ntoto na bilumbu ya nsuka. Mpe beto ke kwikila ti yandi ke na kwiza. Beno tala mbote. Mpe yandi ke kuzwa Dibuundu mosi. Ntangu yayi, beto ke mona yayi.

257 Ntangu yayi—ntangu yayi, beno bambuka moyo, yayi kele Luzayikisu. Beno lenda katula na Yawu ve. Ntangu yayi, wapi mutindu ya dyambu! Beno kuzwa muntu mosi na Biblia, kisika mosi ba botikaka muntu na nkumbu ya “Tata, Mwana, Mpeve-Santu,” to ba mwangisaka mwa maza na muntu, beno kuzwa yawu na Biblia, samu na lemvo ya masumu ya bawu. Ata mbala mosi ve. Mpe muntu nyonso, ata mutindu ba botikaka bawu, zolaka kwiza mpe kuvwanda ya kubotika, mbala mosi dyaka, na Nkumbu ya “Yesu Klisto,” samu na kuzwa Mpeve-Santu.

258 Actes 19, “Paul lutaka na simu ya zulu ya Éphèse, talaka mwa bilandi.” Yandi tubaka... Bilandi, bawu vwanda kuzwa lukutakanu ya nene. Bawu vwandaka landa muntu mosi ya nkumbu Apollos, yina vwandaka muntu ya musiku yina ndimaka; Baptiste yina kwikilaka na Jean Mubotiki, mpe yina vwandaka lakisa na nzila ya Masonuku ti Yesu vwandaka Klisto.

259 Paul lutaka kuna mpe monaka Aquilas mpe Priscille, na kapu ya 18 ya Actes. Mpe na manima yandi kwendaka kuna na kudya na nkokila, to kima yankaka, na Aquilas mpe Priscille. Bawu tubilaka yandi na muntu ya nene yayi. Bawu kwendaka kuwa yandi. Yandi kuwaka yandi na nkokila yina. Yandi tubaka, “Yandi kele kieleka mbote. Ya kele kieleka mbote. Ya kele mbote. Kasi,” yandi tubaka, “beno kuzwaka Mpeve-Santu tuka beno kwikilaka?”

260 Wapi mutindu samu na beno ba-Baptiste ya mawa kuna na manima, beno ke kwikila beno ke kuzwa Mpeve-Santu *ntangu* beno ke kwikila?

Yandi tubaka, “Beno kuzwaka Mpeve-Santu *tuka* beno kwikilaka?”

Muntu tubaka, “Yina vwandaka ve ya kusonama na kati ya yawu.”

261 Mu ke telemina yawu. Mu kele na bisono ya Grec ya kieleka kaka awa, ya Hébreu, mpe. Biblia ke tuba na nyonso zole Grec, mpe, Hébreu, mpe dyaka na Araméen. Na kati ya yawu nyonso

tatu, mu kele na yawu kaka awa, yina ke tuba, “Beno kuzwaka Mpeve-Santu tuka beno kwikilaka?” Ya kele kieleka. “Beno kuzwaka Mpeve-Santu tuka beno kwikilaka?”

²⁶² Ntangu yayi, yandi tubaka, “Beto zaba ve kana ya kele na Mpeve-Santu mosi.”

Na yina yandi tubaka, “Na wapi mbotika ba botikaka beno?”

²⁶³ Bawu tubaka, “Beto botamaka yimeni na muntu yina botikaka Mfumu Yesu Klisto. Beto botamaka na mbotika ya Jean,” na maza kaka mosi ya nene, mu banza, “muntu kaka mosi.”

²⁶⁴ Paul tubaka, “Yina ke simba ve. Yandi botikaka kaka samu na kubalula ntima, ve samu na lemvo ya masumu.”

²⁶⁵ Ntangu yayi, bayankaka ya beno ba-Unitaire ke kwiza mpe—mpe ke botika mutindu, ya yimbi. Beno ke botika mutindu, samu na mpulusu. Maza ke vulusaka muntu ve; ya kele Menga, kubalula ntima. Ve na nzila ya mbotika samu na kuvutuka ya moyo. Ve, tata. Kuvutuka ya malu-malu ke kwizaka na nzila ya Mpeve. Mbotika kele—kele kutuba na ngaanda kisalu ya kuvutuka ya moyo yina me salama na kati. Beno me mona? Mbote mingi. Beno tala.

²⁶⁶ Yandi tubaka, “Beno kuzwaka Mpeve-Santu tuka beno kwikilaka?” Bawu tubaka . . .

Yandi tubaka, “Beto zaba ve kana ya kele na Mpeve-Santu mosi.”

Yandi tubaka, “Wapi mutindu ba botikaka beno?”

Yandi tubaka, “Beto botamaka na ya Jean.”

²⁶⁷ Yandi tubaka, “Kieleka Jean botikaka samu na kubalula ntima, samu na kubalula ntima, na kutubaka ti ‘beno fwana kwikila na Yandi,’ Mwana-Dimeme, Munkayulu vwandaka kwiza, na Mfumu Yesu Klisto.” Mpe ntangu bawu kuwaka yayi, bawu kubotamaka dyaka na Nkumbu ya Yesu Klisto. Mpe Paul tulaka maboko ya yandi na zulu ya bawu mpe bawu kuzwaka Mpeve-Santu, mpe zonzaka na bandinga mpe pesaka baprofesi.

²⁶⁸ Beno tuba na munu ti ya kele Masonuku ve, mpe beno lakisa munu kisika mosi, yina muntu kubotamaka ntete na mutindu mosi yankaka na Ngwisani ya Malu-malu kasi na Nkumbu ya Mfumu Yesu Klisto. Beno lakisa munu.

²⁶⁹ Santu Agabus mpe mingi, kuna vwandaka bayankaka, bayina botamaka tii na ntangu ya—ya—ya Concile ya Nicée, mpe mosi na mosi ya bawu vwandaka ya kubotama na Nkumbu ya Yesu Klisto. Ba-missionnaire salaka bilanga na Nkumbu ya Yesu Klisto.

²⁷⁰ Kasi ntangu Concile ya Nicée kwizaka, bawu zolaka kuzwa banzambi tatu. Bawu katulaka Paul . . . to katulaka Jupiter,

mpe tulaka Paul. Ba katulaka Venus, mpe tulaka Marie. Bawu vwandaka na mitindu nyonso ya banzambi, mitindu nyonso ya basantu mpe nyonso yankaka, mpe salaka mbotika ya butatu mpe disaka yawu na ba-Protestant. Mpe bawu ke na kulandila na kumina yawu.

²⁷¹ Kasi Bansemo ya nkokila me kwiza ntangu yayi. Profete tubaka, “Ya ke vwanda na Nsemo na ntangu ya nkokila.”

Ya ke—ya ke vwanda na Nsemo na ntangu ya nkokila,
 Beno ke mona kieleka nzila ya Nkembo;
 Na nzila ya maza, yina kele Nsemo bubu yayi,
 Luzikulu na Nkumbu ya ntalu ya Yesu.
 Ntwenya mpe kuluntu, beno balula ntima na masumu ya beno nyonso,
 Mpeve-Santu kieleka ke kota;
 Bansemo ya nkokila me kwiza,
 Ya kele dyambu ti Nzambi mpe Klisto kele Mosi.

²⁷² Beno ke kwikila Yawu? Pierre tubaka, na Kilumbu ya Pantekote, “Ti yayi vwanda ya kuzaba, na kati ya beno, yinzo ya Israël, ti Nzambi me sala Yesu mosi yayi, Yina beno komaka na kulunsi, nyonso zole Mfumu mpe Klisto;” nzila ya 16 ya kapu ya 2. Yinga. “Nzambi me sala Yesu mosi yayi, Yina beno komaka na kulunsi, nyonso zole Mfumu mpe Klisto. Ti yinzo nyonso ya Israël kuzaba, na bukieleka.”

²⁷³ Mu vwandaka me zonza na Juif mosi ntama mingi ve, na zulu awa na Yinzo ya David, yandi tubaka, “Beno Bantu ya makanda lenda zenga ve Nzambi na bitini tatu mpe kupesa Yandi na Juif. Beto zaba ya kulutila yina.”

²⁷⁴ Mu tubaka, “Ya kele kaka yawu, Labi. Beto ke zengaka Nzambi ve na bitini tatu.” Mu tubaka, “Nge ke kwikila na bapofete?”

Yandi tubaka, “Kieleka.”

Mu tubaka, “Nge ke kwikila na Ésaïe 9:6?”

Yandi tubaka, “Yinga.”

Mu tubaka, “Na nani profete vwandaka zonzila?”

“Na Mesiya.”

Mu tubaka, “Wapi kiwisa ke vwanda na Mesiya na Nzambi?”

Yandi tubaka, “Yandi ke vwanda Nzambi.”

Mu tubaka, “Ya kele kieleka.” Amen.

Beno me mona, beno bawu yayi. Beno me mona, beno lenda zenga Yandi na bitini tatu ve.

²⁷⁵ Kana beno ba-missionnaire awa...Mosi ya bawu ke na kwenda awa na ba-Juif, mu banza, muntu yayi ya kuvwanda awa. Beno meka ata mbala mosi ve na kupesa Juif “Tata, Mwana,

mpe Mpeve-Santu.” Yandi ke tuba kaka na beno na nswalu, ti yandi zaba kisika yawu me katuka, “Na Concile ya Nicée.” Yandi ke kuwa ve yawu. Kasi beno bika yandi kumona kisika yina Nzambi Nzambi kumaka nsuni, mpe Yandi kele kaka Nzambi yina kele. Nzambi, kumaka nsuni na nzutu ya muntu mpe zingaka na kati-kati ya beto, samu na kusantisa beto; yina ba zangulaka, samu ti Yandi Yandi mosi lendaka kwiza na mutindu ya Mpeve-Santu. Nzambi, Tata, Mpeve-Santu, kele Muntu mosi.

²⁷⁶ Biblia ke tuba na—na balubutuku ya Yesu Klisto, na kapu ya Ite ya Matthieu, Ya ke tuba, “Abraham butaka Isaac. Isaac butaka butaka Jacob.” Mpe me landila, na kutuba, mpe na manima na . . . Beno bika munu kutanga yawu, mpe na manima awa beno ke zaba kaka yinki mu vwandaka zonzila. Matthieu, kapu ya Ntete. Mpe beto ke . . . Ntangu yayi beto banda na nzila ya 18.

*Ntangu yayi Yesu Klisto butukaka mutindu yayi:
Na yina . . . mama ya yandi Marie vwandaka fiancé na
Joseph, ntete bawu kuvwanda kintwadi, yandi kuzwaka
kivumu ya . . .*

²⁷⁷ “Nzambi Tata””? Ya ke tangama mutindu yina? [Dibuundu me tuba, “Ve.”—Mu.] Kuzwaka Kivumu ya Nani? [“Ya Mpeve-Santu.”] [Kisika ya mpamba na bande.] Mu banzaka ti Nzambi Tata vwandaka Tata ya Yandi? Na yina, Nzambi, Tata mpe Mpeve-Santu, kele Mpeve mosi, to Yandi kuzwaka Batata zole.

*Kuna Joseph bakala ya yandi, na kuvwandaka muntu
ya kudedama, . . . na kuzolaka ve kutalisa yandi nsoni
na meso ya bantu, vwandaka yindula . . . kufwa makwela
na yandi na mansweki.*

*Kasi na yina yandi vwandaka banza na bima yayi,
beno tala, wanzio ya Mfumu monikaka na yandi na
ndosi, na kutubaka, Joseph, nge mwana ya David,
kuvwanda na boma ve . . . kubaka na nge Marie kento ya
nge: samu ti kivumu yina kele na yandi kele ya . . .*

²⁷⁸ “Nzambi Tata””? Huh? [Dinbuundu me tuba, “Ve. ‘Ya Mpeve-Santu.’”—Mu.] “Ya Mpeve-Santu.” Na yina nani vwandaka Tata ya Yesu Klisto? [“Mpeve-Santu.”] Mpeve-Santu. Yinki Yina kele na kati ya beno? [“Mpeve-Santu.”] Mbote, ya kele Nzambi, Tata, mpe. Ya kele Yawu ve? Kieleka.

*Mpe yandi ke buta mwana ya bakala, mpe nge ke pesa
yandi nkumbu YESU: . . .*

²⁷⁹ Awa kele Nzambi Tata, awa kele Nzambi Mpeve-Santu, mpe awa kele Nzambi Mwana, beno me mona, ya kele Banzambi tatu. Biblia ke tuba yawu ve. Zole yayi fwana vwanda mosi, to Yandi kuzwaka batata zole. Beno me mona? Yandi lenda vwanda na batata zole ve. Beno zaba yawu.

Ntangu yayi, *yandi ke buta mwana ya bakala, mpe bawu ke pesa yandi nkumbu YESU: samu ti yandi ke vuukisa bantu ya yandi na masumu ya bawu.*

Na yina nyonso yayi vwandaka ya kusalamaka, ti ya kulungisa yina Mfumu kuzonzaka na nzila ya profete, na kutubaka,

...mwense ke vwanda na kivumu, mpe ke buta mwana ya bakala, mpe ba ke bokila yandi Emmanuel, yina ntendulu keke, Nzambi na beto.

280 Yina keke kapu ya 1te ya Matthieu.

281 Matthieu 28:19, kisika Yesu tubaka, “Beno kwenda, botika na Nkumbu ya Tata, Mwana, mpe Mpeve-Santu.” Yinki keke Nkumbu ya Tata, Mwana, Mpeve-Santu? Yesu Klisto, ya kieleka.

282 Beno ke tanga disolo ya zola, ya ke tuba, “Jean mpe Marie zingaka na kyese na manima.” Nani keke Jean mpe Marie? Beno vutuka na ntwala ya disolo, mpe beno tala.

283 Kana ya keke ve na kima mutindu, ata nkumbu, “Tata, Mwana, to Mpeve-Santu,” na yina Nani, Nkumbu ya Nani ya keke? Beno vutuka, na ntwala ya disolo, mpe beno mona Nani Yandi vwandaka zonzila.

284 Pierre, na Kilumbu ya Pantekote, tubaka, “Beno balula ntima, mosi na mosi ya beno, mpe beno botama na Nkumbu ya ‘Yesu Klisto’ samu na lemvo ya masumu.” Yandi vwandaka na luzayikisu.

Jean vwandaka na luzayikisu.

285 Yesu vwandaka Luzayikisu, Yandi basisaka Yandi mosi kaka awa na Masonuku, “Mu keke Yandi yina vwandaka, yina keke, mpe ke kwiza, ya Ngolo nyonso.” Fiu! Mbote mingi.

286 Ntangu yayi, beto baka nzila ya 7, kaka na nswalu ntangu yayi, ntete beto basika, na nswalu kaka mutindu beto lenda. Ya Ngolo nyonso.

...lutu-...nkembo mpe lutumu samu na ntangu nyonso mpe ntangu nyonso. Amen.

Mpe...kumisa beto bantinu mpe banganga-Nzambi samu na Nzambi...Tata ya yandi; mpe na yandi vwanda nkembo mpe lutumu samu na ntangu nyonso mpe ntangu nyonso. Amen.

287 Beno me mona luzayikisu yango kuna, mutindu Yawu keke ya kumonikisa? Mutindu Nzambi...Bantu ke kalata bayintu ya bawu mpe ke benda nsuki ya bawu, mpe nyonso, na kumekaka na kutala yinki “Tata, Mwana, Mpeve-Santu” keke, ya ke sala tatu, na kati ya mosi.

Beno benda nsuki ya beno ve mpe beno kalata yintu ya beno ve. Beno tala na zulu. Luzayikisu ke katukaka na Zulu. Mpe ya keke kieleka. Yandi ke monikisa, ti ya keke ve “Tata, Mwana, mpe

Mpeve-Santu.” Ya kele bisalu tatu na kati ya yina Nzambi mosi ke zinga.

²⁸⁸ Yandi vwandaka na kosalu, “Mpeve,” na Yandi mosi, samu ti muntu ya moyo ntangu nyonso kele na kukukulumusaka, na yina Yandi salaka Yandi mosi nzutu, zingaka na kati ya yawu, samu na kubasisa Menga ya Yandi Mosi; ve na nzila ya kuvukisa banzutu, mutindu ya vwandaka na nsaba ya Eden, kasi salaka nzutu ya kuvanga. Mpe na nzila ya nzutu yina butamaka na mwense, Yandi pesaka Menga yina santisaka beto mpe kangulaka beto na kukondwa lukwikilu ya beto, samu na kukwikila na Yandi. Na yina, beto ke salaka yawu, beto ke yambaka Yandi na kati ya ntima ya beto, ya kele Nzambi na kati ya beto; Nzambi: Tata, Mwana, mpe Mpeve-Santu. Beno me mona? Kaka mutindu Profete, Nganga-Nzambi, mpe Ntinu, ya kele kima mosi. Mbote mingi.

²⁸⁹ Ntangu yayi, nzila ya 7, yayi kele nsamununu. Nsamununu kele:

Beno tala, yandi ke na kukwiza na matuti; mpe disu nyonso ke mona yandi, . . . bawu mpe bayina tobolaka yandi: mpe makanda nyonso ya ntoto ke dila samu na yandi.

²⁹⁰ Oh! Ntangu yikwa me bikana na beto? Ya kele kitoko kuna. Beno lenda lutisa baminuti makumi ta- . . . baminuti makumi zole dyaka? [Dibuundu me tuba, “Yinga.”—Mu.] Beno zola? [“Amen.”] Mbote mingi. Ntangu yayi, na yina, mbasi. . . Na nkokila yayi, beto ke meka na kubaka yankaka ya *Vision ya Patmos*, na nkokila. Bubu yayi, beto ke suka na nsamununu.

²⁹¹ Oh! Beno ke kuwa mbote? [Dibuundu me tuba, “Amen.”—Mu.] Beno ke zolaka Biblia ya ntama yayi? [“Amen.”] Ya kele Luzayikisu. Yinki, yinki ya kele? Nzambi kulumukaka, na Buku yayi, mpe katulaka vwale, tubaka, “Yandi yayi: Profete, Nganga-Nzambi, Ntinu; Tata, Mwana, Mpeve-Santu; Yandi yina vwandaka, yina kele, mpe yina ke kwiza. Bima nyonso yayi, Yawu kele Nzambi.”

²⁹² Ntangu yayi, ti beto katula vwale, kaka samu na baminuti fyoti ntangu yayi, Mfumu na kusadisa beto, na kukatula vwale na meso ya beto. Mpe kubaka. . .

Beno tala, yandi ke na kukwiza na matuti; . . .

²⁹³ Ntangu yayi, wapi mutindu Yandi ke na kukwizaka? “Na matuti.” Wapi mutindu ya dituti? Matuti ya nkembo. Ve mosi ya matuti ya mvula ya ngolo yayi, dituti ya mvula, kasi matuti ya nkembo.

²⁹⁴ Beno ke tala mbote wapi mutindu ya dituti fukaka Yandi ntangu Pierre mpe bayankaka monaka vision ya Yandi na zulu ya Mongo ya Kukituka, dituti fukaka Yandi. Bilele ya

Yandi lezimaka. Yandi vwandaka ya kufuka na dituti, ngolo ya Nzambi.

²⁹⁵ Oh, beto ke kuma na yawu, na kati awa na bansungi ya dibuundu yayi. Mu ke tuba na beno, ya ke sepedisa kaka—kaka moyo na kati ya munu, na kubanza na yawu. Yina nkwizulu ya Yandi. . . Mu ke mona kilumbu yayi yina beto ke zinga, kisika kima kele ve, ata kivuvu me bikana kasi Nkwizulu ya Yandi.

²⁹⁶ Ntangu yayi beto ke baka yayi na nswalu. Ntangu yayi beno bambuka moyo.

. . . disu nyonso ke mona yandi, . . .

²⁹⁷ Ntangu yayi, yina vwandaka ve Enlevement kuna, ya vwandaka? [Dibuundu me tuba, “Ve.”—Mu.] Beno me mona? Ya vwandaka ve Enlevement. Ya vwandaka ve Enlevement. Yinki Yandi vwandaka zonzila? Na Nkwizulu ya zole.

. . . mpe bawu mpe bayina tobolaka yandi: mpe makanda nyonso ya ntoto ke dila samu na yandi.

²⁹⁸ Ntangu yayi beto ke vutuka mpe ke baka mwa disolo. Beto vutuka na Zacharie, mpe kuzwa kapu ya 12 ya Zacharie. Zacharie. Mbote mingi.

²⁹⁹ “Mpe Mfumu vwandaka bwela na dibuundu kilumbu nyonso yina zolaka kuzwa mpulusu.” Mutindu beto ke vutula matondo samu na luzayikisu ya mbote ya Yesu Klisto! Beno kele ve na kyese samu na Yandi? Ntangu yayi, beto ke sala yayi na mutindu ya buku kaka na nswalu mutindu beto lenda, samu na bantu, mpe kuna beno lenda kuzwa yawu, kutanga yawu swi na kivinga ya beno mpe nyonso, mpe kulongoka yawu, beno mosi. Mbote mingi.

³⁰⁰ Zacharie, Zacharie, kapu ya 12 ntangu yayi ya Zacharie. Mpe beto zola, kubaka yayi kieleka ntangi yayi na kati ya mpeve ya kusambila. Mpe mu zola kubaka yayi samu na nkembo ya Nzambi. Ntangu yayi, Zacharie 12, beto banda na nzila ya 9. Beno kuwa mbote ntangu yayi. Yandi ke na kuzonzilaka na Nkwizulu. Zacharie 12, mpe beto ke banda na 9, na nzila ya 9.

Mpe ya ke salama . . .

Zacharie, ke na kupesaka profesu, bankama yiya mpe makumi nana na sambwadi ya bamvula ntete nkwizulu ya Klisto.

Mpe ya ke salama na kilumbu yina, ti mu ke sosa kubebisa bayinsi nyonso. . . yina ke kwiza telemina Jérusalem. (Beno banza na yawu.)

Mpe mu ke tsyamuna kuna na zulu ya yinzo ya David, mpe na zulu ya bantu ke vwandaka na Jérusalem, mpeve ya lemvo mpe ya bisambu: mpe bawu ke tala na munu yina bawu tobolaka, . . .

³⁰¹ Ntangu yayi, na wapi ntangu Nsangu ya mbote ke vutuka na ba-Juif? Ntangu kilumbu ya Bantu ya makanda ke manisa, kuna Nsangu ya mbote me yilama, na kukwenda na ba-Juif. Oh, mu lenda, kana mu lenda tuba kaka na beno na ntuala mwa kima yina ke na kubongamaka na kusalama kaka awa, beno me mona, kaka na kilumbu yayi. Beno me mona? Ya ke na kubongamaka na kusalama. Beto ke tala yawu na Nsungi ya Dibuundu. Mpe kima ya nene ke na kubongamaka na kusalama, ke kwenda tii Apocalypse 11 mpe ke baka bapofete zole yango, Élie mpe Moïse bayina ke vutuka dyaka samu na ba-Juif. Beto me yilama samu na yawu. Nyonso ke na kubakaka kisika, me yilama kaka. Nsangu ya Bantu ya makanda yayi, mutindu ba-Juif nataka yawu na Bantu ya makanda, Bantu ya makanda ke vutula kaka dyaka yawu na ba-Juif. Mpe Enlevement ke kwiza.

³⁰² Ntangu yayi beno bambuka moyo, yayi awa ke na kwiza, na manima ya Lukwamusu . . . Dibuundu ke luta ve na Lukwamusu. Beto zaba yawu. Biblia ke tuba yawu. Beno me mona? Mbote mingi.

³⁰³ Ntangu yayi, Yandi ke tsyamuna na zulu ya yinzo ya Israël, (yinki?) Mpeve-Santu mosi, beno me mona, na manima Dibuundu ya Bantu ya makanda me kwenda.

. . . mpe bawu ke talaka na munu yina bawu tobolaka, mpe bawu ke dila samu na yandi, mutindu muntu yina ke dila samu na mwana ya yandi mosi kaka, mpe ke dila na mawa samu na yandi, mutindu muntu yina kele na mawa samu na mwana ya yandi ya ntete.

Mpe na kilumbu yina ya ke vwanda . . . mafwa ya nene na Jérusalem, . . . mpe mafwa . . . na—na kiwanda ya Meguidon.

Mpe—mpe yinsi ke vwanda na mafwa, konso dikanda na lweka; dikanda ya yinzo ya David na lweka, mpe . . . dikanda ya yinzo ya Nathan na lweka, mpe mosi na mosi ya bayinzo bakento na lweka; (ntangu bawu ke mona, yina ke salama, yina ke baka kisika ntangu Yandi ke kwiza na matuti ya nkembo, na kumonika ya Yandi ya zole.)

³⁰⁴ Mpe ntangu ba-Juif yango bayina tobolaka Yandi . . . Beno zaba, Masonuku yankaka ke tuba bawu ke yufula Yandi, wapi kisika Yandi me kuzwa bamputa yayi.

Yandi ke tuba, “Na yinzo ya nkundi ya Munu.”

³⁰⁵ Mpe ya ke vwanda kaka ntangu ya mafwa ve samu na ba-Juif bayina mangaka Yandi, mutindu Mesiya, kasi ya ke vwanda ntangu ya mafwa samu na Bantu ya makanda bayina ke bikana na manima kuna, bayina ndimaka . . . bayina mangaka Yandi mutindu Mesiya ya bawu na kilumbu yayi. Bawu ke vwanda na manyongo mpe ke dila. Mwense ya kulala ke vwanda na manyongo. Ya kele dibuundu yango yina mangaka na kuzwa

Mafuta na mwinda ya yawu. Ya vwandaka na bamwense kumi yina basikaka, bawu nyonso bantu ya mbote, kasi tanu ya bawu vwandaka na Mafuta na minda ya bawu. Tanu yankaka vwandaka bantu ya mbote, bantu ya mbote, kasi kondwaka na kuzwa Mafuta na minda ya bawu. “Mpe ba losaka bawu na kati ya mpimpa ya ngaanda kisika ya ke vwanda na kudila, manyongo, mpe kukwetisa meno.”

³⁰⁶ Yawu yayi awa, “Bawu ke vwanda na manyongo.” Biblia ke tuba awa, “Bawu ke vwanda na manyongo, mpe ntima ya kulwala mingi, ti mpe. . .”

³⁰⁷ Beno tala, mu ke pesa beno yankaka, Genèse 45, kana beno zola kubaka yawu. Beto baka kaka yawu ntangu fyoti mpe kutanga mpe yawu na Genèse, . . . Mu banza, na kapu ya 45 ya Genèse. Mu ke zola kubaka yawi awa, Joseph ke na kuzabanaka yandi mosi na bantu ya yandi—ya yandi. Mpe beto ke baka yayi, samu na kulakisa bifwanukusu ya yina ke salama na kilumbu yina, na manima beto ke vukisa yawu kintwadi.

Na yina Joseph lendaka ve kukanga nzutu ya yandi na ntwala ya bawu. . . yina telamaka pene ya yandi; mpe yandi bokaka, Beno sala muntu nyonso kukwenda. . . na ntwala ya munu kubasika.

³⁰⁸ Ntangu yayi beno bambuka moyo, Joseph, na kuzabanaka yandi mosi, yandi bokaka, “Muntu nyonso na ntwala ya munu kubasika.”

Mpe kuna telamaka ata muntu na yandi, ntangu Joseph kuzabanaka yandi mosi na bampangi ya yandi.

Mpe yandi dilaka na ngolo: mpe ba-Égyptien mpe yinzo ya Pharaon kuwaka yandi. (Yandi zolaka dila na ngolo.)

Mpe Joseph tubaka na bampangi ya yandi, mu kele Joseph; tata ya munu kele dyaka moyo? Mpe bampangi ya yandi lendaka ve kupesa yandi mvutu; samu ti bawu vwandaka ya kuyitukisa na ntwala ya yandi.

Mpe Joseph tubaka na bampangi ya yandi, Beno kwisa pene-pene. . . munu, lemvo ya beno. Mpe bawu kwendaka pene-pene. Mpe yandi tubaka, mu kele Joseph mpangi ya beno, yina. . . yina beno—yina beno tekaka na Égypte.

Ntangu yayi na yawu beno vwanda na mpasi ve, to ya kudasuku na beno mosi ve, samu ti beno me tekisaka munu awa: samu ti Nzambi fidisaka munu na ntwala ya beno samu na kuvuukisa luzingu. (Oh, mutindu ya kele kitoko!)

Samu ti bamvula zole yayi me. . . nzala na yinsi: mpe. . . na kati ke vwanda, yina ke vwanda ve na disangu to kuyonzika.

Mpe Nzambi fidisaka munu na ntuala ya beno samu na kubumba samu na beno bana na ntoto, mpe samu na kuvuukisa baluzingu ya beno na nzila ya luvulusu ya nene.

³⁰⁹ Beno bika kaka munu kubaka yawu ntangu yayi mpe kufwanikisa yawu na Zacharie, 12, kaka ntangu fyoti. Ntangu yayi, beto zaba yawu, mutindu kifwanukusu. Kana beno ke longaka bifwanukusu, na yina beno ke kuzwa kaka yawu ntangu nyonso mbote, mu banza, na—na kifwanukusu.

³¹⁰ Ntangu yayi, Joseph, ntangu yandi butukaka, bampangi ya yandi vwandaka yina yandi. Ya kele kieleka? Ntangu yayi mu zola kulakisa beno, Joseph ke monikisa Dibuundu ya kufulukana na Mpeve. Joseph vwandaka ya kuyina na bampangi ya yandi. Samu na yinki? Samu yandi vwandaka ya kimpeve. Joseph zolaka sala kima ve samu yandi vwandaka mona ba-vision. Yandi zolaka sala kima ve samu yandi vwandaka lota bandosi, beno me mona, mpe vwanda tendula bandosi. Yandi, ya vwandaka yina vwandaka na kati ya yandi. Yandi zolaka lakisa kima yankaka ve kasi yina ti vwandaka na kati ya yandi. Mbote, na yina, bampangi ya yandi kuyinaka yandi, kukondwa dyambu. Kasi tata ya yandi zolaka yandi, samu ti tata ya yandi vwandaka profete.

³¹¹ Beno me mona mutindu ya vwandaka na Yesu? Nzambi zolaka Mwana ya Yandi. Kasi bampangi, ba-Pharisien mpe ba-Sadducéen, yinaka Yandi, samu Yandi vwandaka belusa bambevo, mpe vwandaka tuba na ntuala mambu, mpe vwandaka mona ba-vision, vwandaka tendula. Beno me mona yina mu zola kutuba? “Bawu yinaka Yandi, kukondwa dyambu.”

³¹² Mpe yinki bawu salaka na Joseph? Bawu ndimaka ti yandi vwandaka ya kufwa, mpe bawu losaka yandi na kati ya dibulu. Bawu bakaka kinkuti ya menga, ya bantinta sambwadi, yina tata ya yandi. . .

³¹³ Ya kele kaka na bantinta sambwadi na kati ya mukyama. Mpe mukyama, beto zaba yina, ti beto ke kuma na yawu fyoti na ntuala, mu banza, na nkokila yayi. Mukyama na zulu ya Yandi awa, Yesu, awa, “Yandi vwandaka talana mutindu jaspe mpe ditadi ya sardoine, mpe mukyama.” Mukyama kele ngwisani.

³¹⁴ Mpe yina vwandaka ngwisani ya Nzambi na zulu ya Joseph. Mpe na yina bawu bebisaka kinkuti ya yandi na menga, mpe vutulaka yawu na tata. Mpe yandi zolaka vwanda ya kufwa. Mpe. . .

³¹⁵ Kasi ba basisaka yandi na dibulu mpe ba tulaka yandi na . . . tekisaka yandi na Pharaon, na muntu na Égypte, mpe mfumu mosi—mosi ya basoda bumbaka yandi. Mpe na yina bawu salaka, kima ya yimbi kuminaka yandi, mpe ba losaka yandi na boloko. Mpe kuna yandi pesaka profesi, mpe tubaka na bantu zole kisika mosi zolaka kwenda mpe kisika mosi yankaka zolaka kwenda;

kapita ya malafu mpe—mpe kapita ya mampa landila ndosi ya bawu.

³¹⁶ Mpe na manima ba zangulaka yandi katuka kuna, na diboko ya bakala ya Pharaon. Mpe muntu ve zolaka belama na Pharaon, kaka na nzila ya Joseph. [Kisika ya mpamba na bande—Mu.]

³¹⁷ Beno tala yayi. Ntangu yayi, . . . ntangu Joseph kuna vwandaka ba me teka na ba-Égyptien. Mpe, beno tala mbote, nyonso yandi salaka vwandaka fwanikisa Klisto. Beno tala kapita ya malafu yayi mpe kapita ya mampa yayi na kati kuna, mpe bawu zole kuzwaka bandosi. Mpe Yesu, ntangu Yandi vwandaka na boloko ya Yandi. Beno bambuka moyo, Joseph vwandaka na boloko. Mpe ntangu Yesu bwandaka na boloko ya Yandi, (wapi mutindu?) ya kukangama na kulunsi, ya vwandaka na mosi yina vuukaka mpe mosi zimbanaka. Joseph, ntangu yandi vwandaka na boloko ya yandi, mosi vuukaka, mosi zimbanaka.

³¹⁸ Mpe beno tala. Na yina na manima ba katulaka Yesu na kulunsi, Ba zangulaka Yandi na Mazulu, mpe vwandaka na diboko ya kibakala ya Mpeve ya nene, Yehowa. “Muntu ve lenda kwiza na Nzambi kana na nzila ya Munu.” Ve *Mu ke pesa nge mbote Marie*, ve kyese na *yayi* to kyese na *yina*. Kasi, na nzila ya Yesu Klisto, “Muvukisi kaka yina kele na kati-kati ya Nzambi mpe bantu,” nzutu yango ya ntalu yina Nzambi zingaka na kati, na kati-kati ya beto, yina me baka Nkumbu ya Nzambi. Mpe Nzambi bakaka nkumbu ya bumuntu. Nzambi bakaka . . .

³¹⁹ Beno tala awa. Na mbandukulu, ntangu Adam . . . Mu lenda kaka ve kubika yawu na lweka. Ya ke monana mutindu muntu mosi ke na kubakula Yawu ve, kisika mosi. Beno tala. Na mbandukulu . . . Beno bika munu kulakisa beno kima mosi dyaka. Mpeve-Santu me pesa munu malongi na kusala yayi. Mu ke bika dilongi ya munu minuti mosi. Ntangu bansangu ya ntete kwendaka na Nkembo, ti mwana me zimbana, Adam, Nzambi fidisaka Wanzio? Yandi fidisaka mwana? Yandi fidisaka muntu mosi yankaka? Yandi kwizaka, Yandi mosi, na kuvulusa mwana ya Yandi yina zimbanaka. Alleluia! Nzambi pesaka yawu na muntu ve kasi na Yandi mosi. Nzambi kumaka nsuni mpe zingaka na kati-kati ya beto, mpe vulusaka muntu, Yandi mosi. Ya kele . . . “Beto kele ya kuvuluka,” Biblia me tuba, “na nzila ya Menga ya Nzambi.” Yina ke kufwaka, Nzambi vwandaka . . . Nzambi yina ke kufwaka ve kumaka yina ke kufwaka, samu na kukatula disumu, na kuvwanda Mwana - dimeme, Yandi mosi; samu na kukota na Nkembo, na vwale, mpe na Menga ya Yandi Mosi na ntwala ya Yandi, na manima ya vwale.

³²⁰ Ntangu yayi, Joseph, yandi ke na kukwenda na Égypte. Mpe kuna ba zangulaka yandi katuka boloko, na diboko ya bakala ya Pharaon, mpe kumaka intendant. Mpe nyonso kwendaka na ntwala na bilumbu ya Joseph.

321 Ntangu yayi, ntangu Yesu ke vutuka, ntoto ya kuyuma mpe ke mena mutindu rose. Yandi kele Mwana ya bimvwama, kifwanukusu ya Joseph.

322 Bawu tulaka Joseph na . . . Mfumu ya basoda kuzwaka yandi na yinzo ya yandi; nyonso yandi vwandaka sala, yandi vwandaka kwenda na ntwala. Ba tulaka yandi na boloko, mpe boloko ya muvimba kwendaka na ntwala. Nyonso bawu salaka, yandi kwendaka na ntwala. Mpe ntangu yandi zangukaka, zulu mingi, na Pharaon, pene-pene ya Pharaon, nyonso na Égypte kwendaka na ntwala na zulu ya nyonso na yinza.

323 Ntangu Yandi ke vutuka, ya ke vwanda yinsi ya bimvwama. Bantoto ya kuyuma ke mena, mpe ya ke vwanda na madya bisika nyonso. Mpe beto lenda, mosi na mosi, kuvwanda na yisi ya yinti ya beto ya fike, mpe kuseka mpe kusepela, mpe kuzinga ntangu nyonso na Mvwandulu ya Yandi, ntangu Yandi ke vutuka mutindu Ntinu.

324 Yandi vwandaka Mwana ya muntu, Profete. Amen. Yandi vwandaka Mwana ya muntu, Munkayulu, Nganga-Nzambi. Yandi kele Mwana ya muntu, mutindu Ntinu, Mwana ya David ya kuvwanda na zulu ya kiti ya ntinu ya bunene ya Yandi. Mwana ya muntu, Yandi kele ya kuta- . . . Nzambi monisamaka mutindu Mwana ya muntu. Yandi kulumukaka mpe kumaka muntu, samu na kukatula masumu na yinza. Yandi kumaka muntu, mutindu Profete. Yandi kumaka muntu, mutindu Nganga-Nzambi. Yandi kumaka muntu, mutindu Ntinu; Ntinu ya Mazulu, Ntinu ya basantu, Ntinu ya Seko; ntangu nyonso vwandaka Ntinu, ntangu nyonso ke vwanda Ntinu, Ntinu ya Seko.

325 Ntangu yayi beno tala, kuna, Joseph. Ntete Joseph kukwenda kisika, ba zolaka bula ntete, mpungi. Mpe bantu vwandaka boka, “Beno fukama na ntwala ya Joseph.” Ata yina muntu vwandaka sala, kana yandi vwandaka teka kima na bala-bala, ntangu mpungi vwandaka bula, yandi ke fukama. Kana muntu vwandaka pene ya kubasisa mpe kubaka mbongo ya yandi, kasi yandi zolaka fukama, Joseph vwandaka kwiza. Oh! Kana muntu ya base- . . . muntu ya basene vwandaka kaka pene ya kusala sene ya yandi, mpe yinki yandi zolaka sala? Yandi zolaka bika. “Joseph ke na kwizaka.” Kulumenta vwandaka bula.

326 Mosi ya bilumbu yayi, nyonso, mpe ntangu, ke suka. “Ntangu mpungi ya Nzambi ke wakana, mpe mafwa na Klisto ke vumbuka, mpe suka ya Seko ke talana, na kulezimaka na kitoko” Nyonso ke fukama. “Dikulu nyonso ke fukama, mpe konso ndinga ke ndima Yawu.”

Beno banda ntangu yayi. “Masumu ya bantu yankaka ke kwendaka na ntwala, ya bayankaka ke landaka.”

327 Kasi ntangu yayi beno tala yina salamaka. Mutindu ya kele ya nkembo! Ntangu Joseph kuna . . . na manima yandi me kwela Muntu ya makanda mpe me kuzwa dibuta,

Éphraïm mpe Manassé, bana ya yandi. Beno talaka na nsuka? Ntangu Joseph . . . Jacob bandaka na kusakumuna Éphraïm mpe Manassé. Ntangu yandi bandaka na kutula maboko ya yandi, yandi tulaka Éphraïm na lweka ya bakala, Manassé na lweka ya kento, samu na kupesa lusakumunu na diboko ya kibakala na kuluntu. Kasi ntangu yandi bandaka na kusambila, maboko ya yandi kubalukaka, mpe yandi pesaka ya ntwenya diboko ya bakala ya lusakumunu na kisika ya yina vwandaka na diboko ya kibakala.

³²⁸ Mpe Joseph tubaka, “Mutindu yina ve, Tata.” Yandi tubaka, “Nge me tula lusakumunu na zulu ya Manassé na kisika ya Éphraïm.”

Mpe yandi tubaka, “Nzambi me balula maboko ya munu.”

³²⁹ Yinki? Na ba-Juif, bakuluntu, ya ntete yina Nzambi solaka, na nzila ya Kulunsi me kwiza lusakumunu na Bantu ya makanda, samu na kuzwa Kento ya makwela. Lusakumunu me kwiza na nzila ya Kulunsi, na ba-Juif tii na Bantu ya makanda. Mangaka, bawu mangaka Kulunsi, na yawu Yandi kuzwaka Kento ya makwela na Bantu ya makanda.

³³⁰ Ntangu yayi ntangu Joseph, na ntwala ya yayi, ntangu yandi vwandaka . . . kuwaka bansangu ya bampangi ya yandi, bayina . . . Bawu vwandaka na ngaanda ya kubundana bamvula mingi, ba-Juif.

³³¹ Ntangu yayi beno tala mbote. Beto ke na kuvutukaka na Zacharie ntangu yayi, kisika bawu ke vwanda na manyongo, mpe mafwa mpe manyongo. Mpe makanda ke kabuka bawu mosi na makanda yankaka, ke basika, ke tuba, “Wapi mutindu beto salaka yawu? Wapi mutindu beto lendaka na kusala yawu?” Ntangu bawu ke tuba, “Wapi kisika Nge me kuzwa bidimbu yayi, bidimbu na maboko ya Nge yayi?” Mpe bayina tobolaka Yandi. “Yandi ke kwiza na matuti. Mpe bawu ke mona Yandi, mpe bayina tobolaka Yandi. Mpe yinzo nyonso ke vwanda na mafwa, mpe bawu ke vwanda na manyongo.” Bawu ke zaba ve yinki ya kusala.

³³² Mpe ntangu Joseph . . . Beno zaba disolo. Ntangu yandi monaka bampangi ya yandi, mpe yandi salaka mutindu ti yandi lendaka zonga ve Hébreu, mpe bakaka mutendudi samu na kutendula samu na yandi. Mpe yandi salaka mutindu, yandi lendaka ve kuzonza Hébreu; kasi yandi vwandaka zola kuzaba. Mpe na yawu ntangu na nsuka, kilumbu mosi, ntangu ba nataka ntwenya ya mpangi ya yandi, beno talaka? Ya vwandaka Benjamin yina tulaka tiya na moyo ya Joseph?

³³³ Yinki ya kele, bubu yayi, yina ke tula moyo ya Yandi na tiya, ya Joseph ya beto, Yesu? Dibuundu yango ya ntwenya yina vwandaka kuna na Iran, yina zitisaka balutumumu ya Nzambi. Mpe ya kele bantu yina me butama malu-malu yina me vukana na Palestine, mpe yina me vutuka dyaka. Mbwetete yango

ya bansongi sambanu ya David, dalapo ya kulutila ntama na yinza, yinsi mosi me butama na bamvula fyoti ya nsuka. Yawu yayi Israël.

Bayinsi ke na kukabukaka, Israël ke na kuvumbukaka,
Bidimbu yina Biblia zabisaka na ntwala;
Ba ke na kutanga bilumbu ya Bantu ya makanda, ya kifuluka na boma ya nene;
“Vutuka, O nge yina me zimbana, na yina ya nge.”

Kilumbu ya Mpulusu me belama,
Bantima ya bantu ke na kubwa na boma; (Beno tala kaka yawu, bawu nyonso me kuma kidi-kidi.)

Beno vwanda ya kifuluka na Mpeve, mwinda ya beno ya kuyilama mpe ya kutsya,
Beno tala na zulu! Mpulusu ya beno me belama.

Baprofete ya luvunu ke na kuvuna, ba ke na kumanga Kieleka ya Nzambi,
Ti Yesu Klisto keke Nzambi ya beto;
(Nkembo!) Kasi Luzayikisu me kwiza.
Na yawu beto ke tambula kisika bantumwa tambulaka. (Kaka na kisika mosi ya bawu.)

Samu ti Kilumbu ya Mpulusu me belama,
Bantima ya bantu ke na kubwa na boma;
Beno vwanda ya kifuluka na Mpeve ya Nzambi, mwinda ya beno ya kuyilama mpe ya kutsya,
Beno tala na zulu! Mpulusu ya beno me belama.

³³⁴ Oh! Oh, Joseph, ntangu yandi monaka ntwenya Benjamin kutelama kuna! Yina vwandaka mpangi ya yandi ya ntwenya. Beno ke mona ntwenya Benjamin ntangu yayi kuna...?. . . na zulu kuna, ya kuvwanda na zulu kuna? Makanda ya—ya ntot, ya ba-Juif, kuvutuka kuna kisika ya ke vwanda na nkama mpe makumi yiya na yiya ya mafunda ya bawu ya kutelama kuna, samu na kuyamba Klisto ntangu bawu ke mona Yandi Kukwiza. Bawu ke tuba, “Beno tala, yayi keke Nzambi ya beto Yandi yina beto vwandaka vingila.” Na manima bawu ke tala kutobola... “Wapi kisika yayi me katuka?”

Yandi tubaka, “Na yinzo ya nkundi ya Munu.”

³³⁵ Mpe bawu ke vwanda na manyongo mpe bawu ke dila. Mpe konso dibuta, makanda ya bawu ya David mpe ya Nephtali mpe nyonso, ke kabuka bawu mosi, konso dibuta, mpe ke dila bawu mosi ntangu bawu ke mona Yandi kutelama na zulu, Yandi yina bawu tobolaka.

336 Yinki ke vwanda nsangu ya Yandi? Beno tala mbote yina Joseph tubaka. Ntangu yandi tubaka . . .

337 Beno tala mbote kima yankaka. Ntangu Joseph kuzwaka bana na ntuala ya yandi, yandi talaka bawu, yandi monaka ntwenya Benjamin. Yandi monaka Éphraïm, yandi monaka bayankaka ya bawu kuna, Gad mpe bawu nyonso. Mpe makanda kumi na zole, makanda kumi kuna, ya kutelama na ntuala ya yandi. Yandi monaka bawu nyonso ya kutelama kuna. Yandi zabaka ti bawu vwandaka bampangi ya yandi. Mpe yandi talaka ntwenya Benjamin, mbala mosi, laka ya yandi bandaka na kufuluka. Yandi zabaka ti bawu vwandaka baya yandi. Yinki yandi tubaka? “Ti muntu nyonso bika munu.” Yinki salamaka na kento ya yandi mpe bana? Bawu vwandaka na kati ya yinzo ya ntinu.

338 Wapi kisika ke kwenda Dibuundu ya Bantu ya makanda na Enlevement? Na kati ya Yinzo ya nene ya ntinu. Kento ya makwela, Alleluia, ba ke katula Kento ya makwela na ntoto, na Enlevement. Na yina ntangu Yandi ke vutuka, Kento ya Yandi ya makwela kele ve kuna ntangu Yandi ke sala Yandi mosi kuzabana na bampangi ya Yandi, ba-Juif, bayina tobolaka Yandi, bayina mangaka Yandi.

339 Kasi kento ya yandi mpe baya yandi ya luzolo, bankundi ya yandi ya luzolo kuna, bampangi ya yandi—ya yandi mosi yina Nzambi fidisaka vwandaka na tempelo. Mpe ntangu yandi talaka, yandi tubaka bawu vwandaka . . . Bawu zabaka ve. Bawu tubaka, “Oh, mwana ya ntinu yayi ya nene!” Bawu bandaka na kutuba, mosi na yankaka, oh, na zulu ya bima yayi yina bawu salaka.

340 Mu banza ya vwandaka Éphraïm, to Éphraïm ve, kasi mu me zimbana nani ya vwandaka ntangu yayi, yina—yina tubaka, “Mbote, beto zolaka kufwa ve mpangi ya beto, Joseph.” Bawu kutubaka, “Beno me mona, beto ke na kuzwa difuta.” Ruben, Ruben me tuba, “Beto zolaka kufwa ve mpangi ya beto,” yandi tubaka, “samu ti, beno me mona, beto ke na kuzwa difuta ya yina beto salaka.”

341 Mpe Joseph na kutelamaka kuna; bawu vwandaka zaba ve ti yandi lendaka kuwa Hébreu. Kasi yandi zabaka yawu.

342 Bayankaka ke banzaka, lenda ve kuzonza . . . ke bakula kuzonza na bandinga, kasi Yandi zaba nyonso ya yawu. Inga, Yandi zaba. Kimfumu ya Bantu ya makanda me kwiza na kuzonza na bandinga mpe bantendulu, na ntangu ya yintu ya wolo (yintu ya ntete) ntete yawu kubwaka. Yinki sukisaka kilumbu yango ya ntete ya Bantu ya makanda? Kisono ya bandinga ya kuzabana ve na zulu ya kibaka, mpe muntu mosi kuna lendaka kutendula yawu mpe kutuba yinki ya vwandaka. Yawu ke suka mutindu mosi. Amen. Ke banda mpe ke suka mutindu mosi.

343 Bawu vwandaka banza ti yandi vwandaka kuwa ve bandinga ya bawu yina bawu vwandaka zonza, kasi yandi zabaka yawu. Bawu tubaka, “Beno me mona yina beto me kuzwa?”

Mpe kuna Joseph monaka ti bawu vwandaka na nsoni samu na yina bawu salaka.

344 Ntangu yayi Yandi ke mona mawa mpe kunyonga ya bawu samu na kumangaka Yandi, na yawu Yandi ke na kulendaka ve na laka ya Yandi ntangu yayi. Yandi me yilama na kukatula Dibuundu ya Yandi na ntoto, samu na kunata Yandi na Nkembo. Na manima kuvutuka, mpe kuna makanda nyonso ya ntoto ke vwanda na mafwa.

345 Yinki bawu salaka? Ruben, bawu nyonso, bandaka na kudila, bawu tubaka, “Oh! Oh!” Bawu kuzwaka boma mpe tubaka, “Yayi kele yandi. Ntangu yayi beto zaba ti ya me lunga na beto. Ntangu yayi yandi ke kufwa beto. Ntangu yayi yandi. . . Beto zaba ti ba ke kufwa beto ntangu kaka yayi, samu ti ya kele Joseph yina me vwanda bilumbu mingi ntama na beto. Ya kele Joseph, mpangi ya beto, ntangu yayi ya me lunga na beto.”

346 Yandi tubaka, “Beno dasukila beno mosi ve. Nzambi salaka yayi samu na kubumba luzingu.”

347 Yinki Nzambi salaka? Samu na yinki ba-Juif mangaka Yesu? Samu ti beto Bantu ya makanda, samu, ti, bantu yina Yandi bokilaka na kubasika samu na Nkumbu ya Yandi, Nzambi salaka yawu samu na kubumba luzingu ya Dibuundu ya Bantu ya makanda, Kento ya makwela.

348 Makanda nyonso yina mangaka Yandi ke vwanda na mafwa. Bawu ke bumbama bawu mosi na kati ya bintadi, mpe na kati ya matadi, mpe nyonso, bawu ke tuba, “Myongo, bumbisa beto, kubwa na zulu ya beto.” Bawu mangaka Yawu, Yandi. Makanda nyonso ya ntoto ke vwanda na mafwa samu na Yandi. Mpe konso dibuta na Israël bawu ke kabuka bawu mosi. Mabuta ke kabuka, mosi na yankaka, mpe ke tuba, “Samu na yinki beto salaka yawu? Wapi mutindu beto kumaka na kumanga Yandi? Wapi mutindu? Kuna Yandi me telama. Beno tala Nzambi Yina beto vwandaka vingila. Mpe Yandi yayi, na bidimbu ya banonso na maboko ya Yandi, mpe beto salaka yawu.”

349 Ya kele kieleka yina bampangi yango vwandaka tuba kaka kuna, ntangu bawu vutukaka mpe tubaka, “Beno tala Joseph, yandi yina beto tekaka.”

Yandi tubaka, “Mu kele Joseph, mpangi ya beno, yina beno tekaka na Égypte.”

350 “Oh!” Bawu vwandaka na boma. Mpe bawu vwandaka na mafwa mpe manyongo, mpe vwandaka kwenda na mosi na yankaka, “Yinki beto lenda sala?”

351 Yandi tubaka, “Beno vwanda ya kudasuka na beno mosi ve, samu ti Nzambi salaka nyonso yayi. Nzambi fidisaka munu na ntwala.”

352 Nzambi vangaka bantu nyonso; mindele, bantu ndombe, bantu ya mbwaki, bantu ya jaune, muntu nyonso. Nzambi vangaka muntu nyonso. Yandi vangaka Muntu ya makanda, vangaka Juif. Yandi vangaka bawu nyonso. Ya kele nyonso samu na nkembo ya Yandi. Mpe ba zolaka manga ba-Juif samu na kuzwa Kento ya makwela ya Bantu ya makanda.

353 Ya kele samu na yina kele bifwanukusu nyonso yayi. Na yawu Kento ya makwela ya Bantu ya makanda mpe bankuna ya Yandi na Yandi, Dibuundu yango ya nkembo ya pantekote ya kusukula na Menga ya Mwana-dimeme, na ngolo nyonso ya mvumbukulu na kuzingaka na kati ya bawu, ke vumbuka kilumbu na Enlevement (na ntangu mosi ya fyoti, na kukanga ya disu) samu na kwenda vwanda na Mvwandulu ya Yesu, ntangu Yandi ke vutuka (mpe ke sukisa nyonso) samu na kuzabana Yandi mosi na bampangi ya Yandi.

354 Beno tala mbote yina Masonuku ke tuba awa, na kumanisa. Oh!

Beno tala, yandi ke na kukwiza na matuti; mpe disu nyonso ke mona yandi, (awa yandi ke na kuzonzila na Nkwizulu ya zole, Enlevement ve), mpe bawu mpe bayina tobolaka yandi: . . .

355 Kapu ya 7, nzila ya 1te . . . To, nzila ya 7 ya kapu ya 1te.

. . . mpe disu nyonso ke mona yandi, mpe bawu mpe bayina tobolaka yandi: mpe makanda nyonso ya ntoto ke dila samu na yandi. Kieleka mutindu yina, Amen.

356 Na manima Yandi ke pesa masonuku yango ya nene. Nani kele Yayi? Nani kele Yayi bawu ke vingila?

Mu kele Alpha mpe Omega, Mu kele A mpe Z, (A mpe Z ya Grec, na bisono ya Grec) . . .

357 Actes 2:36, . . . Pierre tubaka, “Ya kele ve na nkumbu yankaka yina pesamaka na yisi ya Mazulu na yina bantu fwana kuzwa mpulusu.” To, ve, beno lemvočila munu; mu me tuba yawu mbote ve. Yandi tubaka, “Ti yinzo nyonso ya Israël kuzaba kieleka, ti Nzambi me sala Yesu mosi yayi, yina beno komaka na kulunsi, nyonso zole Mfumu mpe Klisto.”

358 Jean 14:7 mpe 12, Thomas tubaka, “Mfumu, lakisa beto Tata, mpe ya ke sepelisa beto.”

359 Yandi tubaka, “Mu me vwanda bilumbu mingi na beno, mpe nge zaba Munu ve?” Yandi tubaka, “Yandi yina me mona Munu me mona Tata. Samu na yinki nge ke tuba, ‘Lakisa munu Tata?’ Munu mpe Tata ya Munu kele Mosi.”

360 Mu tubaka yawu kilumbu mosi na muntu mosi. Mama yango tubaka, “Kaka minuti, Tata Branham.” Yandi tubaka, “Nge mpe kento ya nge kele mosi, mpe.”

Mu tubaka, “Kasi na mutindu mosi ve.”

Yandi tubaka, “Lemvokila munu.”

Mu tubaka, “Nge ke mona munu?”

Yandi tubaka, “Yinga.”

Mu tubaka, “Nge ke mona kento ya munu?”

Yandi tubaka, “Ve.”

361 Mu tubaka, “Na yina, Bawu kele mutindu yankaka. Yandi tubaka, ‘Ntangu beno me mona Munu, beno me mona Tata.’” Na yawu yina lungaka samu na yawu.

362 Na yawu na Santu Jean, to ya Ntete ya Jean 5:7 na 8, beno nyonso yina ke na kusonika yawu. Ya Ntete ya Jean 5:7 na 8, Biblia ke tuba. Muntu yina vwandaka zonga, muntu kaka mosi yina sonikaka Luzayikisu yayi yina Yesu pesaka yandi, yandi tubaka, “Ya kele na bima tatu yina ke pesaka kimbangi na Mazulu: Tata, Ndinga (Ndinga kele Mwana). . . Tata, Ndinga, mpe Mpeve-Santu, mpe bima tatu yayi kele mosi. Ya kele na bima tatu yina ke pesaka kimbangi na ntoto: maza, Menga, mpe Mpeve, mpe bawu ke wisanaka; kele mosi ve, kasi bawu ke wisanaka na mosi.”

363 Beno lenda ve kuzwa Tata kukondwa kuzwa Mwana. Beno lenda ve kuzwa Tata to Mwana kukondwa kuzwa Mpeve-Santu. Kieleka. Kasi beno. . . Mpe maza, Menga, mpe Mpeve, ya kele bima ya ke lombaka na kukota na kati ya Nzutu ya Yandi.

364 Ntangu lubutuku na yinza ke salamaka, wapi kima ya ntete ke salamaka ntangu kento ke butaka bébé? Kima ya ntete, ya kele maza. Kima ya zole, kele menga. Ya kieleka? Kima yina ke landaka, kele mpeve. Bébé ke kuzwa kupema ya yandi, ke banda na kupema. Maza, menga, mpe mpeve, yina ke sala lubutuku na yinza.

365 Mutindu mosi, Lubutuku ya kimpeve. Mbotika na maza na Nkumbu ya Yesu Klisto; mvedolo na lukwikilu, na kukwikilaka na Mfumu Yesu Klisto. Maza! Yinki ke landa? Menga; kusantisama, kusukulama, kubasisa yandi na ngaanda.

366 Ya kele kisika beno ba-Nazaréen kubwaka; beno kwendaka kaka ntama yina mpe kwendaka ve ntama mingi. Vase yina kele ya kusantisa na zulu ya autel, me yilama samu na kisalu, kasi kele ve na kati ya kisalu. “Kyese na bawu,” bakyese, “bayina kele na nsatu mpe mpwila ya ludedomo, samu ti bawu ke vwanda ya kifuluka.” Vase kele ya kusantisama. Ya kele kieleka.

367 Ya kele mutindu mwense. Mpova *mwense* zola kutuba “kutsya, santu, kukondwa kuvukisa, ya kusantisama.” Tanu vwandaka na mafuta, tanu vwandaka ve; tanu vwandaka ya

kufulukuka, mpe bayankaka yina vwandaka kaka na kusantisama. “Beno kuzwaka Mpeve-Santu *tuka* beno kwikilaka,” beno ba-Baptiste, ba-Presbytérien?

“Beto zaba ve kana ya kele na Mpeve-Santu mosi.”

“Na yina wapi mutindu ba botikaka beno?” Uh-huh.

³⁶⁸ Na manima yandi me tula maboko ya yandi na zulu ya bawu, kuna ba vwandaka, na manima ya kuvwanda ya kufulukuka mpe ya kusantisama, bawu vwandaka ya kufulukuka na Mpeve-Santu. Kieleka.

³⁶⁹ Maza, Menga, Mpeve! Yesu kwizaka samu na kusukula mpe samu na kuvedisa, mpe samu na kusantisa Dibuundu, ti Yandi lendaka kwiza mpe kuzinga na kati. Na Menga ya Yandi Mosi; Yandi pesaka Menga ya Yandi Mosi Nzambi yina butukaka, ti Yandi lendaka vedisa beto na lubutuku ya beto ya kuvukisa banzutu, mpe pesaka na beto vase ya kusantisama, ya santu yina Yandi Yandi mosi lendaka kwiza.

³⁷⁰ “Na ntangu fyoti, mpe yinza ke mona Munu dyaka ve; kasi beno ke mona Munu samu ti Mu,” kiyingilu ya muntu, “ke vwanda na beno, mpe na kati ya beno, tii nsuka ya nyonso.” Amen. “Nzila nyonso, Mu ke vwanda na beno mpe na kati ya beno. Bisalu yina Mu ke sala beno mpe ke sala. Bidimbu yayi ke landa na bawu yina ke kwikila.” Nzambi na kati ya Dibuundu! Oh, la la! Buzambi! “Ya kele na bima tatu yina ke pesaka kimbangi na Mazulu: Tata, Ndinga (Mwana), Mpeve-Santu. Bawu kele Mosi.”

³⁷¹ Ntangu yayi, beno lenda vwanda ya kuzwa mpulusu kukondwa kuvwanda ya kusantisama. Beno lenda vwanda ya kusantisama mpe kuvwanda ve na Mpeve-Santu; kieleka, mpeve ya kusantisama, kukondwa kuvwanda ya kufulukuka. Kusantisa ntima ya beno, kuvedisa ntima ya beno, kukondwa kufululusa yawu na kima mosi. Ya kele yina Yandi tubaka, “Ntangu mpeve ya mvindu me basika na muntu, yawu ke kwenda na bisika ya kuyuma. Yawu ke vutuka, ke tala yinzo ya yandi nyonso ya kubongisa, mpe yawu ke kota. Mutindu ya nsuka ya muntu yina ke vwanda bambala mingi, bambala sambwadi, yimbi mingi kulutila yina ya vwandaka na ntete.”

³⁷² Ya kele yina salamaka na beno ba-Pèlerin ya Sainteté, ba-Nazaréen, mpe nyonso yankaka. Beno ndimaka. Mpe ntangu Mpeve-Santu kwizaka, bandaka na kuzonza na bandinga, mpe pesaka bidimbu mpe bimangu, beno bokilaka yawu “dyabulu” mpe vvenzaka bisalu ya Nzambi, bokilaka yawu “kima ya mvindu.” Mpe beno me mona kisika dibuundu ya beno me kwenda? Beno basika na yandi! Ngunga yawu yayi, Luzayikisu ya Yesu Klisto me tubama, Nzambi me monikisa na ngolo ya bakumonisa ya Yandi ya Mpeve-Santu. Amen. Kilumbu ya mpulusu me belama.

³⁷³ Ntangu yayi, Buzambi na Yandi, ya Ntete ya Timothée 3:16.

...kukondwa ntembe dinsweki ya kinzambi kele nene: samu ti Nzambi talanaka na nsuni, . . .kumonana na bawanzio, . . .kukwikila na yinza, ba zangulaka na nkembo.

374 Oh, landila kaka mpe landila mpe landila. Kasi wapi kisika beto kele ntangu yayi? Na nsuka ya nzila ya 8.

375 Na nkokila yayi beto ke banda nzila ya 9, *Vision Ya Patmos*. Oh, ya kele na bima ya nene na kibumbulu samu na beto. Beno zola Yandi?

Mu zola Yandi, mu zola Yandi
Samu Yandi zolaka munu ntete
Mpe futaka mpulusu ya munu
Na yinti ya Calvaire.

376 Kieleka beno ke sala yawu? Nzambi me talana Yandi mosi na beno, me monikisa ti Yandi kele Mwana ya Nzambi, Yesu Klisto, Nzambi monisamaka na nsuni, samu na kukatula disumu? Yandi ke na kumonikisaka Yandi mosi na bilumbu yayi ya nsuka na mabuundu ya Yandi, na kusalaka Yandi mosi kuzabana.

377 Ntangu yayi, bima kaka yayi yina ke na kusalamaka na Dibuuundu, beno tala mbote mpe beno mona, na nsuka ya Nsangu yayi, ti kana Biblia ke tuba ve ti bima yayi ke salama, kaka kieleka. Beno mona kana yawu salamaka ve kieleka, na Nsungi ya Éphèse, mpe ya Pergame, ya Thyatire, nzila nyonso, na konso nsungi.

378 Ke tuba na beto mutindu Luther zolaka sala, mpe mutindu Wesley zolaka sala. Mpe mutindu dénomination ya Pantekote yayi, ke kota na mutindu ya madidi ve tiya ve ya Laodika, kasi, na kati ya yina, Yandi ke benda bantu. Ya kele kieleka. Ya kele kaka. Beto kele na nsuka. Oh, mu kele na kyese mingi! Mpe, oh, mutindu mu ke mona munu mosi kulemba, mpe kutala bankundi ya munu mpe nyonso, mpe kumona yinza mpe—mpe poto-poto yina kele na kati ya yawu, mpe na yina mu ke banza ti Nkwizulu ya Mfumu me belama. Beto kele na nsuka ya nsungi.

379 Bantima ya bantu ke na kubwa na boma. Bisika nyonso, muntu nyonso, ya kele na bansangu ya boma na ladyo, ntangu nyonso, “Beno yilama na attaque aérienne. Beno baka *yayi*, beno baka *yina*, mpe beno kwenda na yisi ya yinzo.” Wapi mutindu beno ke bumbama na yawu? Beno lenda bumbama na yawu ve. Mbote, kima yina ke kota makumi tanu ya bametele na yisi ya ntoto, na kare mosi, ya bankama zole na makumi yiya ya bakilometele. Samu, yinda ya yawu ke. . .Kana ya bula awa, ya ke ningisa Indianapolis na ntoto. Samu, ya ke mwangisa kaka Indianapolis na bitini-bitini, kana ya bula kaka awa na Louisville, beno me mona, mosi ya yawu. Ya ke mpasi na kutuba yina bawu kele dyaka na yawu.

380 Mpe, beno tala, beno fwana ve. . .Beno zaba, Russie fwana sala yawu ve. Cuba lenda sala yawu. Konso kisika ya fyoti,

kisika ya fyoti ya nene ya Alcatraz kuna, lendaka sala yawu, mpe kufuka yinza ya muvimba. Kima kaka yina me fwana sala kele kaka kusala yawu nzila mpe kubenda nsinga mosi. Beno kele na nsatu ya ata basoda. Beno kele kaka na nsatu ya fanatiki mosi na kusala yawu, na maboko ya dyabulu. Ya kele kaka kieleka. Yandi ke sala yawu, mpe kuna kima ya muvimba me suka. Nyonso kuna ke suka.

³⁸¹ Kasi, oh, beno bika munu kupesa beno kima ya kusakumuna yayi. Ntangu beto ke mona yawu kubelama mingi, ntangu beto ke mona ti ya lenda salama na ntwala ya suka. Beno bambuka moyo, Dibuundu ke kwenda na yinzo ntete yawu kusalama. Enlevement ke salama ntete.

³⁸² Ntangu yayi, samu ti beno kota na poto-poto ve, beno bambuka moyo, Yesu tubaka, “Mutindu ya vwandaka na bilumbu ya Noé, mutindu ya vwandaka na bilumbu ya Lot.” Beno bambuka moyo, ntete mvula mosi kubwa, Noé vwandaka na kati ya nzasa. Beno me mona? Noé vwandaka na kati ya nzasa. Ba nataka yandi na zulu, na nzila yayi. Mpe ntangu yayi, Noé vwandaka kifwanukusu ya ba-Juif. Kasi Énoch kwendaka na yinzo kukondwa kufwa. Mpe ntangu Noé monaka Énoch kukwenda, yandi zabaka ti ya vwandaka ntangu, ya kubanda na nzasa yango. Ya kele kieleka. Yina vwandaka kidimbu ya Noé, ntangu Énoch kwendaka na yinzo. Mpe ntangu kaka ba ke katula Dibuundu ya Bantu ya makanda, kuna Yandi ke zabana Yandi mosi na Israël. Beno me mona? Ya kele kieleka.

³⁸³ Beno bambuka moyo, na bilumbu ya Lot, mutindu Yesu tubaka, ntete ditona mosi ya tiya bula ntoto, Wanzio yina tubaka, “Nswalu. Sala nswalu. Basika awa, samu ti Mu lenda sala kima ve tii ntangu nge ke kwenda awa.” Ntete tiya mosi kubula, Lot mpe dibuta ya yandi vwandaka na ngaanda mpe kwendaka. Na yawu, Enlevement ke salama ntete ti Lukwamusu baka kisika.

³⁸⁴ Lukwamusu, bantu mingi ke vukisaka yawu. Beto ke sungika yawu, sabala yayi, kana Mfumu zola, na nzila ya lusalusu ya Mfumu. Beno bambuka moyo, beno ke vingila na kutala Lukwamusu ya Ntangu ya nene, yina vwandaka, kana beno ke sosa kifwanukusu ya yawu na Biblia, ya vwandaka bilumbu ya mpasi ya Jacob, beno me mona, ntangu yandi vwandaka na mpasi. Yina vwandaka ve na kima ya kusala na Bantu ya makanda. Bantu ya makanda kele na kima ve ya kusala na yawu. Ata kifwanikisu na Biblia samu na yawu. Dibuundu ya Bantu ya makanda ke Zanguka.

³⁸⁵ Mpe beno ke na kuingila na kutala “maza na kukituka na menga,” mpe bima mutindu yina. Ya ke na kwiza dyaka na Israël, kuna na Moïse mpe Élie, ntangu bawu ke vutuka. Élie, samu na mbala ya yiya, ke vutuka na mpeve. Ata mosi ya bawu kufwaka, to, Moïse kufwaka, ba zabaka ve kisika ba zikaka yandi. Yandi kieleka vumbukaka kisika mosi na kati-kati ya ntangu, samu ti,

na Mongo ya Nsobolo, kuna yandi vwandaka, vwandaka zonza na Yesu, yandi vwandaka ve? Beno me mona?

³⁸⁶ Na yawu bawu ke vutuka mpe ke kufwa, mpe ke lala na bala-bala ba ke bokilaka na kimpeve “Sodome,” kisika ba komaka Mfumu ya beto na kulunsi, Jérusalem. Bawu ke vwanda na kulonga na ba-Juif, mpe ke bula ntoto, mpe ke kanga mazulu, mpe nyonso ya mutindu. Mpe nsuka ya kisalu ya Bantu ya makanda ke landila mpe ke vukana na yawu, mpe Bantu ya makanda ke kwenda na yinzo, mpe kisalu yango ke landila. Ya ke vwanda na mawa na bima nyonso. Zole na zulu ya tatu na ntoto ke kubwa, mpe nyonso yankaka. Ntangu banzutu ya bawu ya kufwa ke lala na bala-bala, bilumbu tatu, beno tala mbote wapi mutindu ya vwandaka.

³⁸⁷ Beno tala na bafoto yayi yina mu kuzwaka kuna na Sude ya Amerika, ntangu bawu kufwaka missionnaire ya Pantekote kuna, kento ya yandi, ya kulala na bala-bala, mpe yandi mpe bana zole ya fyoti. Mwana yango ya fyoti ya kento, mpe kivumu ya yandi ya kuvimba mutindu *yina*. Bawu zolaka mpe ve kuzika bawu. Bawu vwandaka luta, vwandaka kulosila bawu mate mutindu yina, bilumbu tatu to yiya. Mpangi Kopp bakaka foto. Mu ke na yawu na yinzo, beno me mona, mutindu bawu ke kusala.

³⁸⁸ Na manima bawu ke fidisa makabu, na mosi na yankaka. Beno tala mutindu yawu ke fwanana na Biblia, beno ke mona wapi dibuundu ke sala yawu. Ya kele kieleka, me belama kaka, mpe ke na kukotaka kaka mutindu nyoka ntangu kaka yayi, kaka na mayela mutindu ya lendaka vwanda, kidimbu ya bima ntangu kaka yayi.

³⁸⁹ Beno tala profesi Mfumu pesaka munu na mvula 1933, mutindu ya ke salama, “Bawu ke pesa muswa na bakento na kusala vote. Na kusalaka vote, bawu ke sola muntu ya yimbi.” Bima sambwadi kupesamaka, mpe tanu ya yawu me salama yimeni. Kima yina vwandaka landa vwandaka kento ya nene, dibuundu, ngolo to kima mosi, ke yala na zulu ya États-Unis yayi, samu na kutwadisa. Na manima mu monaka yawu mutindu bombi, kuna, kisika ya kumaka na nsuka. Ya vwandaka nsuka ya ntangu.

³⁹⁰ Ya tubaka, “Bawu ke vwanda na masini yina ke lenda kutambula. Bawu ke vwanda ve na nsatu ya kunata yawu.” Bawu me sala kaka yawu ya kulunga. Ya tubaka, bamvula kumi na mosi. . .

³⁹¹ Ya kele Mpeve-Santu tubaka na munu. Ya kele kuna na zulunale. Beno lenda ve. . .Ba lenda manga yawu ve. Ya kele kuna na zulunale, mutindu Mpeve-Santu tubaka.

³⁹² Bamvula kumi na mosi na ntuala ba tunga Nzila ya Maginot, mu tubaka, “Bantu ya Allemagne...Amerika ke kaka. . .

Mfumu ya luyalu Roosevelt ke vwanda muntu ya yimpi na bawu nyonso.” Mpe ya kele kieleka. Yandi vwandaka.

³⁹³ Mu ke na kunyongisa beno ve ba-Démocrate, kasi mu—mu ke na kutubila beno. Ya kele ve Démocrate to Républicain ntangu yayi. Ya kele Yesu Klisto, Mwana ya Nzambi, ti beto ke na kuzonzila. Mu kele Démocrate to Républicain ve. Mu kele Muklisto. Na yawu kuna, bawu, ata nyonso yina ya vwandaka, kasi beno tala kuna.

³⁹⁴ Mpe beno tala awa, kilumbu yankaka yina, kana beno zola kumona wapi mutindu ya nkonga ya bantu yina ke mangaka ya bawu ya kele. Bawu na kubakaka bamasini yango mpe bongisaka yawu, kisika, konso ntangu beno ke sala vote samu na Tata Nixon, beno fwana sala vote samu na muntu yankaka yayi, na mbala mosi. Ed- . . .J. Edgar Hoover katulaka bamasini. Bantu yikwa vwandaka me tanga yawu? Kasi, kieleka, ya kele nyonso na zulu ya mikanda nyonso, na bazulunale, mpe nyonso yankaka. Beno me mona kisika beto kele?

³⁹⁵ Ya kele dyaka ve na kima ya kieleka kasi Klisto. Amen. Oh, Buku yango ya ntama ya kusakumuna! Yawu yayi. Ya kele kaka Mosi yina ke tuba na beno nani beno kele, wapi kisika beno me katuka, mpe wapi kisika beno ke na kukwenda (Yinga, tata.), ya kele Buku ya ntama ya kusakumuna yayi, oh, ya ke sala munu kuzola Yandi. Yawu ke sala beno ve?

Lukwikilu na Tata, lukwikilu na Mwana,
Lukwikilu na Mpeve-Santu, tatu yayi kele
Mosi;
Bampeve ya yimpi ke tekita, mpe misumuki ke
vumbuka;
Lukwikilu na Yehowa ke sala nyonso kutekita.

³⁹⁶ Amen. Wapi kilumbu ya nene kele na ntwala ya beto, bankundi! “Luzayikisu ya Yesu Klisto yina Nzambi pesaka na wanzio ya Yandi, mpe kwizaka mpe tubaka yawu na Jean, ti ya vwanda ya kuzabana na Bansungi ya Dibuuundu, kima yina kele na kibumbulu samu na beto.”

³⁹⁷ Ti Mfumu sakumuna beto ntangu yayi, na yina beto ke telama. Mpe samu na muntu yina ke na kubulaka piano, nge zola kupesa beto mwa noti samu na, *Baka Nkumbu Ya Yesu Na Nge*.

³⁹⁸ Ntangu yayi beno kuwa. Ya kele, kukondwa ntembe, ya kele na banzenza awa na kati ya beto na tabernacle na suka yayi. Mu zola beno kupesa bawu maboko. Beno bokila bawu, na kukwenda na yinzo na beno, mpe yinki dyaka. Mpe beno sala muntu nyonso kuvwanda mbote. Mu zola muntu nyonso kundima kusala yawu.

³⁹⁹ Mpe beno bambuka moyo lukutakanu ke banda na ngunga ya sambwadi, na nkokila. Mpe na ngunga ya sambwadi na ndambu, mu ke vwanda na kuzonza na *Vision Ya Patmos*. Mbasi na

nkokila, kana Mfumu zola, mu ke zonzila na nsungi ya dibuundu ya ntete, Éphèse, ya Nsungi ya Dibuundu.

⁴⁰⁰ Ntangu yayi beto ke yimba *Baka Nkumbu Ya Yesu Na Nge*, nkunga ya mwa tabernacle ya beto samu na kubasika. Mpe ti muntu nyonso kuyimba ntangu yayi. Mbote mingi.

Baka Nkumbu ya Yesu na nge,
Nge mwana ya mawa mpe ya kiadi;
Yawu ke pesaka nge kyese mpe ngolo,
Baka Yawu bisika nionso nge ke kwenda.

Nkumbu ya Ntalu, O Nkumbu ya kitoko!
Kivuvu ya ntoto mpe kyese ya Mazulu;
Nkumbu ya Ntalu, (Nkumbu ya Ntalu!) O
Nkumbu ya kitoko!
Kivuvu ya ntoto mpe kyese ya Mazulu.

⁴⁰¹ Ntangu yayi ntete beto yimba nzila yina ke landa, mu zola ba-Méthodiste, ba-Baptiste, bantu ya Pantekote, bantu ya Katolika, ba-Nazaréen, ba-Pèlerin ya Sainteté, na muntu nyonso kaka yina beno lenda pesa diboko, beno pesa maboko na muntu na ntwala ya beno, na lweka ya beno, na manima ya beno, beno tuba, “Nkundi, kizyeti ya Muklisto, mu kele na kyese ya kuzwa nge awa na suka yayi. Nsayi na kubundana na nge, na kizunga ya bima ya Nzambi. Mu zaba beto me kuzwa ntangu ya nene. Mu banza kumona nge awa dyaka na nkokila yayi.” Kima mutindu yina, na yina beno ke pesana maboko na bantu, na ntwala ya beno, na manima ya beno, na kizunga ya beno.

Beto ke fukimina Nkumbu ya Yesu, (Beto ke monana na nkokila, Mpangi Neville. Beto ke monana na nkokila.)

. . . makulu,

Ntinu ya bantinu, na Mazulu, beto ke byadisa
Yandi,

Ntangu nzietolo ya beto ke suka.

Oh Nkumbu ya Ntalu, O Nkumbu ya kitoko!
Kivuvu ya ntoto mpe kyese ya Mazulu;
Nkumbu ya Ntalu, O Nkumbu ya kitoko!
Kivuvu ya ntoto mpe kyese ya Mazulu.

Tii beto ke kutana! Tii beto ke kutana!
Tii beto ke kutana na makulu ya Yesu; (Tii beto ke kutana!)

Tii beto ke kutana! tii beto ke kutana!
Nzambi vwanda na beno tii beto ke kutana
dyaka!

Ntangu yayi na yina beto ke kulumusa bayintu ya beto:

Tii beto ke kutana! tii beto ke kutana!



LUZAYIKISU YA YESU KLISTO KNG60-1204M
(The Revelation Of Jesus Christ)

BANDANDANI YA LUZAYIKISU YA YESU KLISTO

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 4 ya Ngonda ya kumi na zole, na mvula 1960, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org